

**DIE EPISTEL AN
DIE COLOSSER S.
PAULS ZU SPEIER
GEPREDIGT AUFF
DEM...**

Johannes Agricola




77. Aa. 166

MENTEM ALIT ET EXCOLIT



K.K. HOFBIBLIOTHEK
ÖSTERR. NATIONALBIBLIOTHEK

77.Aa.166



77. Cla

MENT



K. K. H
OSTERR

7




77. Aa. 166.


MENTEM ALIT ET EXCOLIT



K.K. HOFBIBLIOTHEK
ÖSTERR. NATIONALBIBLIOTHEK

77. Aa. 166








Die Epistel an
die Colosser/S. Pauls/
zu Speier gepredigt
auff dem Keychso-
tage/von Joann
Agricola Lyß-
leben.

Durch Doctor Martinum
Luther übersehen.

Wittemberg.

1527.



Dem Durchleuchten

Hochgebornen Fürsten vnd Herrn / Herrn
Philipsen / Landgrauen zu Hessen / vnd
Grauen zu Katzenelnbogen &c.
meinem gnedigen Herrn.

A Ryde von Gott:

Gnediger Fürste vnd Herr / Dies
weyl mich Got vō meiner schulen zu Kyß-
leben / durch wunderliche mittel vñ wege /
gerissen / vnd gen Speyr auff den nechsten
Reychstag beruffen hat / nemlich / das ich
alda meinē dienst am Euāgelio nyemant
versagen solte / vñ ich sahe / das das Euan-
gelion daselbs noch new / vngehört vñ sel-
zam war / gedachte ich / man künde denē
die zum Euangelio villeicht solten kōmen
durch vnsern dienst am wort / nichts bes-
sers thun / den das man ain ganze Epistel
Pauli / darinne ain Christlich leben kurz
verfasst were / vnd die lere vom glauben /
hoffnung vñ wercken / getriben wurde / für
sich neme / Auf das sy ordentlich der erkent-
nuß gottes durch Christū / vnd aller gūter
die wir durch Jesu christ empfangen habē

bericht vnd vnterweyset worden / Den̄ ich
befinde auß täglicher erfariūg / wie wenig
die leute / die auch in Gottes namē wöllen
Christen haissen / vō Got vnd vom Euang-
gelio wissen / den̄ sy haben nur löcherig vñ
stückweyse diß alles gelernet / obenhin / one
grund vnd rechte art / So den̄ nu die Epi-
stel zun Colossern ain außbündige / rayne /
lere ist / des glaubēs / vnd wes man sich zū
Got versehen soll / auch was vñ wer Chris-
tus sey / Auch wie man sich innerlich vnd
eüsserlich gegē got / menschen / vñ im creütz
haltē soll / habe ich die selbigē der gemaine
zū gūt / nach der mässe meiner gnade / auß
gelegt vnd fürgetragē / Welche ich will vn-
ter E. S. G. namen als ains lebendigē zeū-
gen / die solchs angehört hatt / durch den
druck außgeen lassen / des armen heufflins
zū Speyr hunger vñ durst nach dem wort
etlicher massen zū stillen / wolt Gott / wir
küntē in auch settigē / Got stercke E. S. G.
in dem erkentnuß Jesu Christi / vñ mache
in E. S. G. durch seinē hailigen gayst / ain
fürgang von klarhait zū klarhait / inn das
Ewige leben Amen. Datum Eysleben.

E. S. G.

Gehorsamer Johan
Agricola Eysleben.

Vorrede.

DA S. Paul im ge
layte lag zu Rom/ was er vol em
siger sorge für alle gemainē/ die durch sein
predige dem Euangelio geglaubt hetten/
auff das sy ja nicht verführet wurden vñnd
widerüb abfielen/ vñnd in der emsigen sorge
erfert er / ain sonderliches Gottes werck/
das Gott auch seine lieben hailigen nicht
wissen läßt/ Nemlich das/ welche am fe
stesten stunden in seinē beywesen/ die fielen
am aller greulichsten / als die Galather
thäten/ vñnd vor in die Corinthen / Herwi
derumb/ die in seinem raysen durch Asiam
das Euāgelion vñnd seine lere weder hören
noch sehen wolten / ja auffss eusserste ver
achten/ die werdē in seinē abwesen stercker
den die am ersten feste stunden/ Vñ an den
er verzweyfelt hette/ die steen auff/ Wider
umb auff die er groß vñ hart getruget hat/
sy wurden steen/ die fallen dahin/ Den die
Colosser seind fast im. 35. oder. 36. jar des
Predigampts vñnd berüffens Pauli nach

Christus leyden / auch durch Epaphrian
Paulus junger bekert wordē / vnd so langt
sam / das er nichts von jnen gewüßt hatt /
biß er im Epaphria gen Rom geschriben
hat / Darumb ist er auch überauß frölich /
vnd leßt sich wol sehen / wie vol freude sein
herz gewesen ist / da er seine freude so reych
lich auß schüt in den zwayen Episteln / die
er in Asiam schreybt / den Ephesern vnn
Coloffern / vō Rom auß seinē gefengtnuß
Also ließ Got Adam fälen in Cain / Abra
ham in Ismael / da er spricht / Ach möchte
Ismael leben vor dir. Itē Isaac in Esau /
Joseph in Manasse / den Propheten Sa
muel in Davids brüdern / vnd die Juden
in Johanne dem Täufer. Vnd das redlin
treibt er darumb / das er vns die augen vō
den dingen reysse / die wir sehen / vnd gewe
ne vns allaine auff sein wort acht zū haben
darinne er erfunden / vnd erkandt sein will
vnd sonst nyrgend.

Zū dem / So lernē wir auch / wie an nie
mandt zū verzagen sey / ob er woll langsam
herzū komet / wie die parabel lernt. Mat
thei am 20. Da den letzten so vil ward als
den ersten / denn wer da stehet / der sehe zū

das er nicht falle. 1. Corinth. 10.

Paulus treybt auff zwey punct sonderlich vor andern. Zum ersten erzelet er die güte vnsers Herzgots / die er vns erzayget hatt / vnd sagt auff was weyse / wie / wa / wenn / durch wen / warumb / vnd wem das alles zu gütt geschehen sey / Er thüt aber mit rechten güten Worten / wie wir hören werdē. Zum andern dringt er mit gewalt auff die Colosser den völlige verstand / des reychthumbs im erkentnuß des gehaimnuß Gottes / das sy darinne bleyben / vnd müßig mit freunden beharren sollen / vnnnd sich durch kein Engel gesicht noch hüpsche rede / noch philosophey / noch Gottes gesetze selbst nicht binden noch verführen lassen / noch von diser fülle der schatzkammer Gottes / von Ihesu Christo / abwenden lassen / Vnd in dem zu irem trost vnnnd stercke / beschreybt vnd malet er / den Triumph vnd herlichen syg Christi Iesu / mit seinen feyn den / welchs wir zu seiner zeit / wa vns Got gnade dartzu verleycht / hören vnnnd sehen werden.

Die Epistel ann die

Collosser/S. Pauls/ zů Speyer gepre
digt / auff dem Keychstage/
von Joann Agricola
Lyßleben.

Das erste Capitel.

Paulus ein Apostel Jesu Chri
sti/durch den willē Gottes/
vnd brüder Thimotheos.

Lieben freünde / Se dann ich zum text
greysse/will ich zwů bitte thůn/an euch al
le/die alhie Gt zů dem Euāgelio versam
let hat/Erstlich bitte ich durch die barm
herzigkait Gottes / alle / die von Gottes
gnaden also weyt kōmen seind/das sy mei
ner vnd anderer leer vnd ermanung nicht
mer bedürffen/das sy vns wöltē vnser toz
hait zů gůt haltē/vnd gůtwillig anhören/
das/das zů nuge der ainsältigen/Kindisch
vñ ainsältig geredet werd/den ich syhe hie
zů Speier/mit was begir dz volck/Gottes
wort nach laufft/ Darůb dieweyl mir ain

grosse thür ist eröffnet/vnd seind hie vil widerwertiger/ So will mir / meinem dienst nach/den ich am Euangelio habe/gebüre bayde den schwachen vnnnd starcken / den ainfeltigen vnd gelerten/vñ den die hohes vnd nydern standts seind/gewissen/züraten vnd zû helffen.

Zum andern/bitte ich vmb Gottes willen/alle die/ auß der widerwertigen lester meulern/die auf vns liegen/ man verbiete yetzund gûte werck zuthûn/man solle nymer beten/ nymer fasten/man lestere Mariam die liebe Juncfrawen / vnd solle der oberkeit nymer gehorsam sein/die lere die ne zû auffrûr/vñ der gleichē vnnerschamten lügen mer/ verbittert vnd ergrymmet seind/auff vnser leer vnd raynes Euangelion / das sy wolten jr vitayl ain zeytlang bey jnen behalten / vnd dise Epistel vō fornen an biß zû ende außhören/dinnē sy lernen werde/ wie solche schmähung vō jnen fälschlich dem Euangelio/das wir predigen/wirt auffgelegt.

Das sollet jr aber vor allē dingen wissen das die lere vō glaubē durch die Aposteln im anfang/vō der lere vō wercken/so weyt

abgesündert ist/ als der hymel von der er-
den ist/ Aber im ende fast nach bey ainan-
der ist/ Darumb auch S. Paul/ wen er den
glaubē leret/ der werck gar nicht gedencet.
Wen nu yemañt dasselbige in etlichen Ca-
piteln alhie hören wirt/ der gedencke also/
Es werd da von eyttel glauben / glauben
vñ trawen geredt/ ich bins gewarnet/ Ich
wils ain ende warten/ wa es doch hinauß
will/ Den in disem stücke stossen vñ ergern
sich yezund die grösten haupter auferdē/
die aller hailigsten vñ gelertesten / Natur
kan nicht anders richten / den es sey feyn/
wen ich also faste/ also bette/ also singe ic.
den das sihet sy vnd greyffts / So kan der
hailige gayst im Euangelio dasselbige nit
leyden/ sonder verdampt es/ vnd sagt/ Es
sey darinne kein gerechtigkeit/ Johan. 15.
Wer aber Gott gefallen wölle / der müsse
zum ersten wissen / wer Gott sey / vnd wie
freüntlich er es mit vns maine / in dem dz
er seinen sun Jesum für vnser sünde dahin
gybt / darauß wir gewisse seind / Er wölle
vns das liebste vnd das beste thun/ in ley-
den vnd sterben / Vnd wen er das wayßt/
So ist Gott zu jm eingangen / bleybt vnd

wonet bey jm/erleuchtet in/dz er sich selbs
kennet/die sünd empfindet/die selbige got
klaget/das er auch Got kennet/vñ bey jm
hilffe süchet/den wirt er gesterckt/vñ hatt
fride in seim gewissen mit got / mit der sün
de/mit allen Creaturen/Wenn ain solchs
herz sihet/ wie trewlich Got mit jm han
delt/ So gehet es auß/ vnd dienet wem es
kan/vñ wa es kan / Sein hauptstucke ligt
am erkentnuß der güte Gots/ dadurch ist
er selig/die volge der werck aber ist nur ain
lebendigs zeügknuß der güte Gots/ das sy
vorhanden ist/vnd treybet den dienst zum
nechsten/ Der hailige gayst sagt/ du müst
zñ vor glaubē/ darnach wirken/wiltu dar
zñ kōmen/das dich Got liebe. Disen hader
wirt dise Epistel schayden/das helff vns
Gott Amen.

Die grosse not dringt Paulū darzñ/ das
er sich müß ainen Apostel schreyben Ihesu
Christi/den man sihet allenthalben in sei
nen schrifftten/wie er sich schlecht vnd ha
dert mit den falschē Aposteln/die jm seine
lere nicht wolten gūtt lassen sein/ dieweyl
er von Christo nicht erwōlet were/ zñ dem
so weren sy der rechten Apostel junger/vñ

diuweyl Petrus vnd die anderen schon fū-
ren / vnd hielten das geseze (wie den diß
stucke auffß außbindigste zun Galathern
getriben wirt) So solte man Paulū nicht
hören / der das geseze so gar verwurffe / vñ
allain auf die gnade / durch Christū erarnt
mit solchem gewalt vñ ernst drunge / Soll
aber nun S. Paul seiner leer nicht abstecken
sonder wie er gewiß / es sey Gottes leer vñ
wort / für Gottes lere in die welt predigen
So muß er auff den sich berüssen / der jm
das wort hat in mund gelegt vñ befolhen /
Darumb wen sy sich rhümeten / Sy weren
Aposteln Christi / So rhümet er sich ja so
starck als sy / Er sey ain Apostel Jesu Chri-
sti / vnd in dem dz er seins worts gewiß ist /
es sey Gottes / Sy aber vngewiß / so treybe
er sy in jr gewissen / dz sy sich auffß wenigst
in in selbst entsezē / vñ erschrecken müssen.

Apostel hayßet auff Griechisch ain bot-
te / Nemlich der ain mündtliche werbung
thut / vñ seins herin wegen an andere leute
Also füret Paulus den hohen Tittel / Ain
botte Jesu Christi / der kainen andern be-
felch hat / denn Jesus Christus Creütz vnd
Auferstehung / zūpredigē / wie er sagt Ro. i

Paulus 2c. auß gesündert zu predigen das
Euangelion Gottes von seinē sun/ der im
geborn ist von David nach dem fleisch/ vñ
kressftiglich erweyset ain sun Gottes 2c.
den die zwü Natern Christi/ sollē die Apo
steln predigen/ da er spricht/ Ir solt meine
zeügen sein. Davids sun stirbt. Gottes sun
stehet vom tode auff/ Davids sun leydet/
wirt geschmähet/ vnd also verachtet/ als
sey er von Got auch verlassen/ Gottes sun
macht auß der maledeyung vnd tode/ das
leben vnd seligkait/ Vnd eben das ist es/ dz
Luce am letzten geschriben steet/ da Chri
stus sagt/ Also müste Christus leyden vnd
auferstehung vō todten am dritten tage/
vnd predigen lassen in seinem namen/ büß
vnd vergebüg der sünden/ vnter allen völk
ern/ vnd anheben zu Jerusalem/ Ir aber
seyt des alles zeügen.

Wenn Davids sun geprediget wirdt/ so
wirt in Christus namen Büß geprediget/
den eben wie Christus vor der welt vñ sein
selbs augē am Creütz hanget/ vermaledey
et von Gott vnd allen engeln/ Also das in
auch der spruch des gesetzes trifft/ Verma
ledeyet sey von Gott/ der am holz stirbt/

auff welchē der teuffel alle seine gyfft auß
speyet/der tod versücht sein hayl/ die helle
schreckt/ Gottes zorn drückt in/vol blüts/
verwundt vñ heßlich anzusehen eusserlich
Also seind aller menschē hertzē gestalt vor
Gottes augē innerlich/ Wenn man nu sagt
Syhe mensche/ so groß war deine sünde/dz
Gottes sun/ Dauids sun im flaisch werden
müßte/die selbigen hinzunehmen/den Got-
tes zorn von dir abzulaynen/ So erschrickt
er vor jm selbs/ erkennt seinen jamer/ vnd
wolt gerne nicht also sein/ vnd büßet.

Wenn man nu weytter prediget/ verzage
drumb nicht mensche/ob du wol ain solchē
grewel bey dir findest/ denn sihe über dich/
der also tyeff ernydert ist worden/ Dauids
sun/welchs dir gilt/der ist auch gottes sun
Er bleybet nicht also geschmähet/den ain
zeytlang / Gott hat auch kein myßfall an
dem heßlichen spiegel seyns suns innerlich
ob er in wol sincken vnd verderben lasset/
eusserlich/ Er reyßet in wider herauß/ vnd
schlecht durch in/ dem tod die zeene auß/
nympt dem teuffel vnd der hellen allē iren
gewalt/vnd setzet in zū seiner rechtē hand/
vnd gibt jm ain namen über alle namē ꝛc.

Wie er nu disen grewel seins suns nicht tadelt/ Also will er dir den grewel deines herten auch schencken/ vñ vmb seins suns willen/ der nun fürhin dein ist/ mit allen seinẽ gütern/ zũ gũt halten vnd zũ decken/ Das ist vergebung der sünde predigen.

Wer aber dise zway stücke nicht also fñhret / der ist kein Apostel / Er predige sonst was er will/ Den das ist das zaychen Jonnas des Propheten / das allaine solle der welt gegeben werden/ vñ sonst kein anders.

Wen er spricht/ vnd brüder Timotheus macht er zũ schandẽ/ alle die zũ vnsern zeyten Papst/ Cardinál/ vnd Bischoffe haisen / denn Timotheos was ye im ansehen auch im gayst vil weniger denn Paulus/ noch laßt er in seinen brüder sein/ vnd nennet sich nicht ain Erzbischoff/ vnd Timotheum ain schlechten Bischof oder weychbischoff/ im glauben seind sy alle gleych/ diener an der gemaine. 1. Corinth. 4.

Den hailigen zũ Colossern / vnd den glaubigẽ brüdern in Christo. ¶ S. Paul wayßt von kainẽ hailigen zũ sagen/ denn die da leben/ vnd in den Gortes gnad vñ gayst durchs wort im glauben le-

bet/Also auch die ganze schrift hat nichts
gewiß von den hailigen die im glaubē zeyt
lich gestorben seind/denn das sy schlaffen/
Den also sagt die schrift von den vātern/
Christ entschlaffen vnd hingelegt worden
mit seinē vātern. Item Act. 7. Stephanus
ist im Herren entschlaffen. Item Luce. 16.
wirt Lasarus gefürt in Abrahams schoß.
2. Corin. 8. Die handraychung die da ge-
schicht den hailigen/ So ist auch kain eere
damit die hailigen wöllen geeret sein/ den
das wir lebendige exempel habē/der gütte
vñ barmherzigkeit Gottes/nämlich also
Maria die werde mütter vnd rayne Jungf
rau/Paulus/Petrus/Abraham/Isaac/
David/vñnd alle hailigen / seind eben des
flaisch vnd blüts gewesen / das in sünden
geborn wirt/wie du bist/genaygt zñ schan-
de vnd vnglück von natur / vnd Gott hat
sy begnadet so reychlich/das sy über sündē
vnd teuffel/seind zñ starck wordē/vnd auß
grossen Gottes gnaden selig worden. Ich
will auch güt hoffnung habē/Gott werde
mir auch also gnedig sein/das wir an inen
lernen/die weyse / damit Got seine hailigē
selig macht/Welche ettwas anders an in

fuchen / die schenden sy vnd eeren sy nicht /
Also sagt der aller hailigste der vō weyben
geborn ist Johānes der täuffer / dem Chris-
tus selbs das zeligknuß gibt / Ioan. 3. Ain
mensche kan nichts nemen / es werde im
den gegeben von hymel ꝛc. Wer die Braut
hat / der ist der breutgam / der freünd aber
des breutgams steet vnd höret im zū / vnd
frewt sich hoch über des breutgams stym-
me ꝛc. Die hailigen werdē vom hören selig.
Roma. 10. Psalm. 45. Höre tochter / schaw
drauff vnd nayge deine oren / So wirt der
Künig lust zū dir gewinnen.

Es seind ertliche / die hie her führen den
Artickel des glaubens / Ich glaube ain hai-
lige gemaine Kirche / das ist / Ich glaube /
das alle glaubigen ainen gemainen Got /
Herin / glauben / tauff / vnd vatter / gayst /
lieb vnd hoffnung / wort / zaychen haben /
Denn eben in dem wort des Euangeli von
Christo / da Abel ist gerecht vnd selig wor-
den / müssen auch wir alle vnnd der letzte
hailige gerecht vnd selig werden. Ephe. 4.
1. Cor. 10. vnd sagen / Diuweyl ain gemain-
schafft aller hailigē ist / so geet die gemain-
schafft über lebendige vnd todten / Vñ wie

ich sagen kan zu ainem lebendigen menschen
der Peter haysset/ Peter bitte Gott für
mich/ also kan ich auch sagen zu S. Petro
der verstorben ist/ vnd entschlaffen/ S. Pe-
ter bitte Gott für mich. Diser schwachait
muß man tragen ain zeytlang/ denn man
muß in disen grund lassen gutt sein/ Aber
sagen soll man in/ das sy sich fleyssigen sol-
len/ der ding die gewiß seind/ vnd inn der
schriffte gegründet. Zu dem/ das sy sich auf
Christū den ainigen gnaden thron vnd für-
sprechen/ Bischoff vnd Priester/ gewenen
der sy nicht triegē wirt/ Den wa sy es thun
werdē/ wie sy den müssen/ wölle sy anderst
selig werdē / So werden sy feyn von disem
mißbrauch vñ vneere in der anruffung der
hailigē gebraucht lange zeyt/ abfallen/ vñ
dem gewissern wege volgen/ Das rede ich
den zu gut/ die ich wayß/ das sy noch in di-
sem stücke gefangen ligen/ vñnd schier gar
darinnen ersoffen seind.

Gnade sey mit euch vnd fride/
von Gott vnserm vatter/ vnd
dem Herzen Ihesu Christo.

¶ Gnade ist gunst/ die Gott zu vns tregt/

B

on alle vnser verdienst/ auß lautern gnade
Vnd wer da erkennet/ das jm got also gün-
stig ist / vnnnd sein hertz erfaret die gnedige
gunst/ welche Gott in seinem sunē Christo
Jesu versigelt hat/ der lernet Gott vatter
nennen/ vnd versyhet sich zū jm des liebste
vnd besten/ wie ain kind sich zū seinē vater
alles gütten versyhet / Er erkennet seinen
schaden / Er sibet die hilffe / damit Gott
seinen schaden gewendet hat / vnd wayßt
wa er hilffe vñ trost holen soll/ es fechte jm
gleich an/ armüt/ sünde oder der Teüffel/
Das hilffe süchen aber / vñ sich vor kainer
anfechtung entsetzen/ ist fride/ Also wün-
schet nu Paulus den Colossern / die gunst
Gottes vnd den Friden / welche von Gott
dem vatter kompt / vnd der Herre Ihesu
Christ erworben hat.

Wa die gunst vnseres Herzgots nu erken-
net wirt/ da ist fride/ Herwiderüb/ wa die
gunst nicht erkennet wirt / da ist vnfride/
den Gott ist ain gayst/ vnd vnserē seele ist
auch ain gayst/ Gott ist ewig/ vnserē seele
auch ewig. Nun kan sich ewig mit ewigē/
vnd gayst mit gayst nymermer vergleichē
Es geschehe denn auch durch ain ewiges

vnd gaystliches/ Nämlich/ durch Gottes
wort/ welchs der welt die gunst vñ den fry
den/ anbeüt vñ verkündiget/ Darumb kün
den werck/ vernünfftige leer/ vnd geseze/
Kappen/blatten/ graw/blaw/rotte clay/
der/ kolben/ vil har/ flaisch oder fisch essen/
nyemandts frölich vnd frydlich machen/
den dise ding seind alle zeytlich vnd flaisch
lich/ das sagt Esaias/ Die Gotlosen habē
kainen friden/ vñ Hiere. 17. Vermaledeyet
sey der mensch/ der auf menschen trawet/
vnd setz seinē arm aufs flaisch/ sein hertze
weycht vom herzen 2c. Item/ Gebenedeyet
sey der man/ der auf den Herin trawet/ vñ
der Herie wirt sein zūuersicht sein/ wie ain
baum der an das wasser gepflanzt wirt/
vñ seine wurzel zeücht ansich die feüchtig
keit/ vnd wirt sich nit fürchten/ wen schon
die hize kompt/ vñ sein bletter werdē grün
sein/ vnd wirt sich nicht ain mal besorgen/
in der trucknē zeyt/ zū dem so wirt d baum
nicht auf hören/ frucht zūbringen/ Der got
lose wirt sein wie die hayde in der wüsten/
vnd wirt das güt nit sehen/ wen es kompt
sonder wirt wonen im trucknen/ in den wü
sten/ im schilfflande / vñnd da nyemandt

wonen kan/Psal. 143. Sy haben diß volck/
das diß hatt/selig genennet/ Aber selig ist
das volck/ welchs der Herz sein Got ist.

Gott haisset Paulus ain vater/vñ Jesu
Christ vnsern Herrn/Auff dz er vnterschay
de/die reych Christi/den dieweyl das Euā
gelion gepredigt wirt/ dadurch den schwa
chen vnd leydenden gewissen/trost verkün
diget wirt/vñ noch ymmerdar leute seind/
die man stercken/ trösten/ vnd herzü brin
gen muß durchs wortt / So lange regieret
Christus / vnd sichtet mit der selbigen leut
ten flaisch/blüt/vernunfft/ vnd was sy vō
Adam an sich haben / schickt jnen seinen
gayst/ Der sy erleuchte/füre/ lebendig vnd
gerecht mache. Wen nun der Jungste tag
komet/so wirt er diß regiment dem Vater
übergeben / auff das da Gott sey in allen
dingen 1. Cor. 15. Darnach dz ende/weñ er
dz reich Got vñ dem Vater überantwortē
wirt/ weñ er aufheben wirt alle herschaft
vñ alle oberkait vñ gewalt / Er muß aber
herschē biß dz er alle seine feind vnter seine
füsse legt/ Da beschreybt Paulus dise zway
reych mit klaren Worten/ das Christus re
gieren muß im wort des Euāgeli / in aller

Christen herze / biß so lang der wellt ende
kompt/ Das sagt Christus zu seinen Jun-
gern/ Ich wil bey euch sein/ biß an das end
der welt/ dieweyl lente auf erden leben/ die
sich vor Gotes zorn fürchten/ die jr gewis-
sen naget/ vnd ire sünd drückt/ dieweyl re-
gieret Christus als ain gewaltiger Herze/
vnd wöret dem teuffel/ wendet ab Gottes
zorn/ tröstet die gewissen / vnd vergibt die
sünde/ vñ das alles durchs wort des Euā-
geli/ das wirdt Paulus bald hernach baß
außstreychen/ wenn er von seinen banden
sagen wirt.

Wir dancken Gott/ vnd dem va-
ter vnser Herin Ihesu Christi/
vnd betten allzeyt für euch.

¶ Wen ain Christlich herze/ das got groß
achtet/ sihet/ wie getrewlich/ die gotlosen
wider Gottes wort/ wüten/ toben/ lestern
vnd schmehen/ vñ wöllen Got nicht recht
haben lassen / So wirt es ungedultig vnd
schreyt auß grossen vnwillen zu Got/ vnd
spricht/ Herze wie verbirgest du dich / Wie
lange wiltu den gotlosen zusehen/ vñ jr vn-
gerecht nicht wören. Ach herze wie lang ica

psal. 35. Herwiderumb wenn es sihet/das
yrgent ann ain örclin / das füncklein des
Euangeli auffgeet/ vñ holet etliche seelen
So ergetüst es sich vor freuden/ vnd singet
Got ain liedlein vnd danckt jm/ vñ frewet
sich herglichen mit denen / die zur warhait
vñ liechte der grossen wunder gnadē Got-
tes berüffen werdē/ vnd bitt on vnterlaß/
Got wölt sein wort in den wachsen vnd zū-
nemen lassen/ Wie der. 45. psalm singet/
Es müsse dir gelingen / mit deiner zierde
far einher ꝛc. Also ist Paulus voller freude
Sintemal er höret/ das die zū Euangelio
berüffen werden / welche zūvor also lange
zeyt/ nichts darvon hören noch sehen wol-
ten/ vnd bittet das das erkentnuß Christi
in inen wachse vnd zuneme.

Diß seind auch die zway ampt der rechtē
Bischoffe/ Got loben vnd preysen über sey-
ner gnade/ die er den leuten gibt/ Darnach
bitten / Got wölt über seinem wort haltē/
vnd die leute in seinē erkentnuß fortfaren
vnd zunemen lassen. So thäten die Apo-
stel Act. 4. Vnd nu Herze sich/ Sihe an ir
tröwen/ vnd gib deinen knechtē/ mit aller
fraydigkait zūreden dein wort ꝛc.

Nach dem wir gehöret haben vō
ewrem glaubē an Christū Jesum/
vñ von ewer liebe zū allen hailigē.

¶ Die ursach wirt hie angezaiget/dadurch
Paulus verursacht ist / Gott zū loben vnd
für sy zū bitten/den er hat gehöret vō irem
glauben an Jesum Christ/ vnd von irer lie
be/an alle hailigē. S. Paul fasset hie kurz
die hauptsumma der Christlichē leer/weñ
sy frucht bringt / vñnd im hailigen gayste
wircket/nämlich/herzlich vertrauen auf
Jesu Christ / vnd liebe zum nächsten/Wie
er auch sagt. 1. Timo. 1. Den die hauptsum
ma des gebots ist / Liebe von raynē herten
vnd von gutem gewissen / vnd von unge
ferbtem glaubē / Lieben von raynem hertze
ist die liebe/die nach irer art rayn ist/vñnd
nichts sihet noch süchet/den andern leut
ten zū dienen/ on alle besüchung vñ beslec
ung jr selbs/ wie denn Christus auch sagt.
Math. 5. Selig seind/die ains raynen her
zen seind/denn sy werden Gott sehen. Ain
rayn hertz sihet Gott/das ist/ es laßt sich
allaine gnügen an den dingen / die es von
Got empfahet/ vñ achtet sich sonst kains

dings auff erden/denn allain Gots/ sihet
auch auff nichts/denn was Got redt vnd
wircket / Vnd eben wie hie ain rayn hertze
Got allain groß achtet/ vnd allain sihet/
Also thüt auch die liebe von raynem hertze
vnd sihet vnd achtet nichts/denn allaine
auff den dienst vñ hilffe des nächsten/den
die rayn liebe hat kein ander objectū denn
das/das ist/Sy erzaigt liebe vnd freündt-
schafft/da sy kein vrsach hat/weder zū lie-
ben noch zū freünden/sonder da vernunft
über zürnte vnd straffte/Wie auch Got in
Christo vns allen/von raynem hertzen/ge-
liebet hat Ro. 5. Da wir feynde waren vnd
sünder/da ist er für vns gestorben. Ioan. 3
Also hat Got die welt geliebet 2c. Die liebe
von vnraynem hertzen/ thüt nur den wol/
die jr wol thün/vnd lobet die/ die sy loben/
die sy nicht loben / schilt vnnd schendet sy/
Welchs auch die zolner vnd Zayden thün
Math. 5. Liebet ewere feynde 2c. Auff das
jr kinder seyt ewers Vatters 2c.

Vmb der hoffnung willen/die
euch beygelegt ist im himmel.

¶ Glaube geet stracks auff Got/ vnd auff

alles was Gott redet vnd thut / daran er
hanget / vñ ist derhalben selig / das er Got
trawet vnd glaubet als seinem lieben Va-
ter / vnd ain solcher mensch bedarff nichts
mer / weder an leyb noch an seele / Sein leib
wirt ernöret vnd beklaydet / vmb der glau-
bigen seelen willen. psal. 146. Der den hun-
gerigen brot gibt / Den jungen rapen die in
anruffen / Vnd psal. 37. Sy werden nicht
zú schanden in der bösen zeyt / vnd inn der
thewrung werden sy gnüg habē / Sein seele
wirt erleuchtet / gerechtfertigt / vnd leben-
dig gemacht / Gottes tochter vnd Braut /
Habacuc. 2. Der gerechte wirt seines glau-
bens leben / Den der glaube gibt vns Chri-
stum zú aygen / vnd Got seinen Vater / mit
allem dem das Gott ist vnd hat.

Die Liebe ist ain dienst vnnd pflicht die
da auß bricht vnnd sich sehen läßt / gegen
dem nächsten.

Hoffnung ist das wartten der ding die
wir geglaubt haben / das sy geschehen wer-
den. Vnd Hoffnung schleycht vnd kreücht
ymmer im grunde daher / vñ wartet der zeyt
vnd stunde / die Gott versehen hat / das zú
geben / welchs er versprochen hatt / es ge-

schehe kurz oder lang / über hundert oder
tauset jar / Er stelle sich als wolt ers nicht
geben / oder geben / Es lege sich darwider
wer da wolle / freünd oder feind / Engel od
mensch / Die hoffnung aber hat iren grund
vnd stöne / an der warhait Gotes / dieweil
Gott halten kan / was er ain mal zû sagt /
welchs er auch oft beweyset hatt / Ro. 4.
Vnd eben so wenig / als Got sich selbs leng
nen kan / das er nicht Gott ist / also wenig
kan hoffnung yemandts lassen zû schandē
werden / S. Paul. Ro. 5. macht ain feyne
ordnüg der wirkungen des hailigē gaysts
vnd spricht / Tu wir seind rechtfertig wor
den durch den glauben / so haben wir fryde
mit Gott / durch vnsern herin Jesu Christ /
durch welchen wir auch ainen zügang ha
ben im glauben / zû diser gnade / darinnen
wir steen / vnd rümen vns der hoffnüg / der
künfftigen herligkait / die Got geben soll /
Nicht allain aber das / sonder wir rümen
vns auch der trübsalen / dieweil wir wissen
das trübsal gedult bringet / die gedult aber
bringet erfahrung / die erfahrung aber bringet
hoffnung / die hoffnüg aber lasset niemān
zû schanden werden / das alles darumb /

das die liebe Gottes ist außgossen in vnser hertze / durch den hailigen gayst / welcher vns geben ist.

Das geet also zu / Gott füret Abraham auß seines vatters lande / vñ verspricht jm vnd seinem samen ain erblant zu geben / Dem wort glaubt Abraham / vñ das glauben wirdt jm gerechnet zur gerechtigkeit / da ist Abraham reych vnd selig / an leib vñ seele / eüsserlich vñ innerlich / Er ist Gotes lieber freünd / Vñ dasselbige wort Gottes daran er mit dem glauben hanget / würdt hernacher durch die eüsserliche beschneydung / als mit ainē sigel befestiget / Denn also wirt Abrahams hertze vol liechts / lebens / frydens vñ frewdē / das er kan sicher sein / Es gehe jm wie es wölle / So sey er in Gotes hand vnd schirm / Auff das aber Abraham an jm selbs lerne solchen glaubē vnd were ye mer vnd mer beweret vnd erfaren / So läst jn Got mit seinē weybe alt werden / das es jm vnmüglich sey / das er solle kinder haben / in seinem alter / Vnd in dem alter / so läst er jm sagen / Sein weyb Sara solle ain sun geberen / Soll hie Abraham glaubē / so muß er sich selbs vō flaisch

vnd blüt außziehen/ die augen zů thün/vñ
in das wort des Herzen springen/ über sein
aygen hertz vnd vernunfft/vnd sagen/ Es
duncke mich vnmöglich od̄ möglich / So
kan Got haltē/was er zůsagt/Das gugen
in die warhait/vñnd warten der warhait
Gottes/ ist hoffnüg/ Darnach hin/da nu
Got Abraham den sun gibt/ vnd läst in so
lang leben / das im Abraham solt zur Le
helffen/vñ ist sein gewiß/ got werde durch
Isaac seinen samen meeren/ Da sagt Got
zů Abraham/Myñ deinen sun Isaac/den
du lieb hast/ vnd opffer mir inen/ Da hat
Abrahā zway widerwertige Gottes wort
darzwischen er hanget/vnd schwebet also
zwischen hymel vñ erden. Zāuor sagt Got
inn Isaac soll dein same gebenedeyet wer
den/vñ yetzund sagt Got/ Er solle im Isa
ac opffern/Wie reymet sichs aber mit ain
ander/gebenedeyen vnd maledeyen/ Tod
vnd lebē? Abraham hat ain zůsage/ Isaac
solle lebē/vnd yetz hat er ain gebot vō Got
empfangen/ Isaac solle sterben/ vnd von
seins aygen vatters henden/ Da stehet der
glaub in grosser gefar/ Aber die hoffnung
wirfft sich herum/vñ schöpffet trost/ auß

der erfariung des erste geschichts/vñ spricht
Gott der mir den sun auß grossen gnaden/
in meinē alter / wider alle vernunfft vnd
natürliche weyse / geben hatt / der wirt in
auch im tode wol lebendig behallten / Er
wirt dennoch nicht liegen / Er wirdt das
wort halten / das er gesagt hat / In Isaac
vocabitur tibi semen / in Isaac soll dein sa-
me gebenedeyet werden / den Got hat lust
darzū / das er den reym mit eeren füre / Er
rüffe den dingē die nicht seind das sy seind
vnd macht die todten lebē / Vnd das ist es
das S. Paul sagt Roma. 4. Abraham hab
geglaubt auff hoffnung / da nichts zū hof-
fen war.

Das sibet man auch in dem Cananeis-
schen Weyblin / da sy für jr Tochter bittet
Math. 15. Diß weiblin höret vnd sibet wie
Christus also ain freüntlicher man sey / der
allen leuten trost vnd hilffe zûsagt / vnd be-
weyset es auch mit der that / treybt die teu-
fel von den besessenen / macht die blinden
sehen 2c. vñ läst niemant / der zū im kompt
vnbegabet widerumb von im kōmen. Auß
solchen wortten vnd wercken Christi / wirt
das weyblin geraygt / vñ Jesu also zū hal-

een/ wie sy höret vnd sihet/ der zuuerficht/
er werde sy erhören/ vñ irer tochter helffen
Zu dem so ist sy desten mütiger darzu / die
weil sy nit für sich selb/ sonder für ir tochter
bittet/ Da sy nu zu Jesu komt/ vnd bit
tet/ da redet er ir kein wort zu / da lygt ir
glaube darnyder/ vnd ir hertze sagt ir/ wie
wenes alles erlogen were/ was du vō dem
manne gesehen vnd gehöret hast/ denn ain
yetlichen duncft sein leyde das grōste/ will
er dir doch nicht zu sprechen/ wa ist nu sein
freüntligkait/ da er verspricht aller welt zu
helffen/ wer nur seiner hand begeret? Vnd
in dem da sy nicht ablast zu schreyen/ vñ
auch die Junger vmb fürbitt für sy ersücht
sagen die Junger/ Herz laß sy/ den sy schrey
et vns nach/ Jesus antwort/ Ich bin nicht
kōmen/ denn zu den schaffen die da verlo
ren seind/ vom hause Israel/ Im ersten re
det er kein wort/ wendet sich von ir/ sihet
sy sawr an / yetzund nu er redet / verwirfft
er sy gar von seinem angesicht hinweg/ vñ
sagt/ Es sey wol war/ Er sey in die welt kō
men/ der welt zu helfen/ Aber sy sey der kei
ne/ der er zugut kōmen sey/ da felt ir glau
be hinweg/ vnd springt zu stücken/ vñ hindert

den glaubē den sy zū jm hette entpfangen/
alles was an Jesu ist/wort vñ geberde/vñ
was sy sihet vnd hōret/ Ja wie mainet jr/
weñ das vns geschehe/wie wir vns stellen
wurden! Also weñ ainer in sünden ligt/vñ
berieffe sich auff Christus tod vnd sterbē/
vñ wolt dadurch von Got/durch Christū/
gnade erlangen / vnd spreche / Herre Jesu
Christe/ Ich klage dir mein gebrechē/ Ich
bit dich/ laß dein sterbē vnd blūt für meine
sünde geschehen sein/ Denn du bist ye vmb
aller menschen sünde willen gestorbē/ Vnd
Christus antworthe jm/ war ist es/ Ich bin
ye vmb der menschen sünde willen gestor-
ben/ aber nicht vmb deiner sünde willē/ du
bist der kainer/ den ich zū gūte gestorbē bin
Wie wurde der zappeln vñ zagen / Ain sol-
chen grewlichen stoß/ das jr Christus ent-
saget/ muß hie jr glaube leyden/ Aber den-
nocht stellet sich der glaube auff die hoff-
nung / Es stehet des werblins hertze noch
ymmer also / ob sy wol nicht glauben kan/
Ach were Christus also wie ich von jm ges-
ehen vnd gehōret habe/ vnd hulffe meiner
Tochter/ Ach hulffe er / Ach hulffe er mir
doch/ Denn das süncklein in dem hertzen/

das nur spricht/ Ach wer ich loß/ ach were
mir geholffen/ Ach wen̄ kompt Gott vnd
hilfft/das ist die hoffnung die den puff im
Creütz vnd anfechtung auff vnd außhelt/
vnd lest niemant zū schandē werden/ wen̄
schon der glaube schwach ist vñ not leydet
Got ist ain hertz kenneer/ vnd wenn die not
am grösten ist/ so schreyet der gayst Gotes
in vnserm hertzen/ erweckt ain sehn̄en vnd
hertzlichs verlangen nach Gott/ Vnd als
den̄ kompt Gott/ vnd gibt eben das/ dar-
nach sich das hertze sehn̄et/ ob wol der sel-
bige mensche diß weder fület noch wayßt/
dieweyl er mit seinem glaubē also hart vñ
hoch angefochten wirt/ vnd mainet es sey
auß mit jm/ Derhalben sihe auff diß weyb
lins hertz/ da der kains hilfft/ weder jr bit-
te/ noch der Junger fürbitt/ laufft sy Jesu
ins hauß nach/ vnd felt für in nyder auff
angesicht/ vnd schreyet auß den letzten zū-
gen/ Herre hilff/ Ich kan nymmer/ wa du
nu nicht hilffest/ so bin ich dahin/ Da sagt
Jesus/ Es ist nicht feyn/ das mā das brot
neme von den kindern/ vñ gebe es den hun-
den/Sihe/ das weyb sihet durch Christus
geberde vñ rede hin/ in sein hertze/ dz gleich

wol freündtlich ist / ob er sich wol anderst
stell / anderst rede vñ gebere / vnd yebet ain
recht hoffnüng werck / nemlich / Er wirt dir
helffen / hilfffe wirt dir endtlich kōmen zc.
Vnd in den wortē Christi da er sy ain hūn-
tin neint / schepffte sy trost / vnd sagt mit frō-
lichem hertzen / Ja herz / die hündlein aber
essen was vom tische fellt der herzen / Ich
lasse mich wol an den brōsamlen genügen
Ich begere nit am tisch zū sitzen / Ich lasse
mich genügen an den gerinstē stücklin dei-
ner gnaden / das sy mir widerfare / Da ist
sy loß / da steet sy wider auff starcken bay-
nen / das erkläret Christus / da er spricht /
Weyb groß ist dein glaube / Dir geschehe /
wie du wild. Also laßt hoffnung nyemant
sincken noch zū schanden werden.

Wen nun Got also ainen menschen an-
greyst / vñ will in die warhait Gottes ler-
nen / so schlecht er in mit armüt / sünde / od
foicht des todes / oder sonst mit ainer pla-
ge / so schaffen den die wort vnd werck Got-
tes / durch Christū / das wir trost habē vnd
fryde / das das hertze / das angefochtē wirt
gewiß sey / Gott maine es freündtlich / vnd
geschehe vns zū gūt. Auß dem wechst den

gedult/ das man got ain solche müter rüte
ain zeytlang zû güt helt/ Vñ wens nu Got
also oft treibt/ so nimpt die gedult im trost
ye mer vnd mer zû/ vnd wirdt stercker/ vnd
erfaret also die warhait daruon/ dz es war
sey/ Gott maine es güt/ vnnd schlahe vns
vmbes besten willen/ vnd lernet entlich hof
fen auf die warhait/ Also heüßet werd ich ge
schendet an meiner Eere / so schreie ich zû
Got/ Herre ich füle meinen gebrechen/ vnd
wiewol ich weiß/ das es von dir kompt/ so
ist es mir doch schwer zûtragē / Herre wen
de mein vngedult/ So hilfft Got bald/ vñ
endert mir mein herze / vnd macht es rü
wig/ Morgen kompt ain anders/ vnd also
vns er lebenlang/ weñ nun das vnglück kō
met/ vnd trifft mich / es sey innerlich oder
eusserlich/ vnd ich habe zûuoꝛ so oft erfare
wie Gott mir geholffen hat/ So sage ich/
Ach der Gott der mir da halff/ wirdt mir
yezund aber helfen/ entlich kompt der tod
so sag ich/ der mir da vnd da/ auff diß vnd
ihens mal halff/ der wirt mir auch yezund
das liebste vnd beste thün / vnd durch den
tod hinhelffen. Also wechselt auß trübsal ge
dult/ auß gedult erfahrung / auß erfahrung

hoffnung/die nyemandt finden noch ver-
derben laßt. Vnd diß solt sein das tägliche
brot vnd stette yebung der Christen / sonst
diweyl wir heißer seind wie ferd / vnd ist in
vns kein zunemen noch wachsen / im er-
kentnis Christi/bleiben gleich noch unge-
dultig vnd geyzig / so ist zūbesorgen / es sey
da noch nit in vns kömen / das erkentnuß
Gottes / vnd liecht des Euangeli vō Chri-
sto Jesu. Gott helffe vns.

Summa.

- 1 Der glaube gibt vns Christū zū aygen/
mit allen seinen güttern.
- 2 Die liebe gibt vns dem nächsten zū ay-
gen / mit allen vnsern güttern.
- 3 Die hoffnung ist im Creüz des glau-
bens yebung / trutz wider den Teuffel/
vnd macht nit zū schanden.

Trawe vn̄ glaube gehört gen Got / den
Gottes gnade vnnd barmherzigkait / die
durch Christū gegeben vnd außgeschüttet
ist / auff vns / geet von Gott zū vns / bleybt
in vns / sterckt vns / vnd geet zum nächsten
durch vns. Also gehört glaube zū Gott / de
müt vnd dien st zum nächsten / trutz vnnd
hochmüt wider den teuffel.

S. Peter nennet die hoffnung. 1. Pet. 1.
ain lebendige hoffnung / vnd Paul⁹ Tit. 1.
hoffnung des lebens / Tit. 2. Wir hoffen
auff die selige hoffnung / Gal. 4. hoffnung
der gerechtigkeit / den sy hat hinder jr ain
leben / seligkeit vnd gerechtigkeit / vñ laßt
nyemandt weder ann leben / an seligkeit /
noch gerechtigkeit mangel leyden.

So ist nun das S. Paul⁹ mainung / Ich
dancke Got vnd bitte für euch / Sintemal
ich gehört habe / von ewerem glauben an
Jesu Christ / vnd ewer liebe an allen haili-
gen / vmb der hoffnung willē / die euch bey
gelegt ist im hymel ꝛc. Das ist / durch den
glauben werden wir wider geboren / zu ai-
ner lebendigen hoffnung / zu der harligkeit
der kinder Gottes. Aber hie sihet vnd hatt
man sy nit / sonder man muß jr hoffen / vñ
dieweil wir jr also warten müssen / vnd vn-
ter den leuten auff erden leben / vnd gleych
wol reych vnd gewisse seind / vnser herlig-
keit / vnd jr vil seind die vnser bedürffen / so
dienen wir jnen / mit allen vnsern güttern /
wie vns Christus mit allen seinen güttern
gedienet hatt / vnd hoffen doch ymmer / es
soll schier des diensts der vnuoltkōmenhait

ain ende werden/vnd auffhören/ Der glau
be wirdt angefochten/ mancherlay weyse/
die liebe mit/vñ ist der eytelkeit vnterworff
fen/darüb hoffet der glaube / es hoffet die
lieb/die anfechtüng vnd der dienst solle auf
hören/vnd sy werden können zñ irer herlig
keit/vñ volkōmenhait Ro. 5. Deñ das ent
liche harren der creatur/wartet auff die of
fenbarung der kinder Gottes / Sintemal
die creatur vnterworffen ist der eytelkeit/
on iren willen/sonder vmb des willen/der
sy vnterworffen hat/ auff hoffnung/ denn
auch die creatur frey werden wirt/vō dem
dienst des vergenglichen lebēs/zñ der her
lichen freyhait der kinder Gottes/deñ wir
wissen/das alle creatur sehnet sich sempt
lich/vñ engstet sich noch ymmerdar/ Mit
allaine aber sy / sonder auch wir selbs/ die
wir haben des gaysts erstling / sehnen vns
auch bey vns selbs/ nach der kindtschafft/
vñ warten vnsers leybs erlösung/ deñ wir
seind wol selig/aber noch in der hoffnung/
der wir warten durch gedult. 1. Pe. 1. Zñ ai
ner lebendigen hoffnüg/auff ain erbe/das
da behalten ist im himmel auff euch/die se
durch die krafft Gottes/im glaubē bewar

ret werdet zur seligkeit/welche beraytet ist
das sy auffgedeckt werde/zū der letstē zeyt
in welcher jr euch frōwē werdet/ die jr yetz
ain Elaine zeytt (wa es seyn soll) trawrig
seyt/in mancherlay versūchung.

Vnd hie sihestu/das der dienst vnnnd die
werck die dem nächsten geschehen / lauter
notwerck seind/die geschehen müssen/vnd
doch nichts verdienen / dieweyl wir durch
den glauben selig seind / denn eben wie du
dich selbst vnd deinē leyb/ezgen vnd trenck=
en müßt/wen in hungert vnd dürst/ schlaf
fen legen/ vnd zur arbayt widerumb auff=
wecken/beklaydē/wāschen vnd baden. Al
so müstu auch deinē nächsten / der bey dir
wonet/dein gelid ist/vñ dein bedarf/ezgen
trencken/klaydē/wāschen/baden/trösten
raynigen ic. Vnd wie du nichts verdienst/
das du dirs thūst / denn du bist berayt ain
mensch/ also verdienst du da auch nichts/
dann du bist berayt sällig.

Wazū dienen denn gute werck?

Es steet geschrieben/Got wölle kein gute
werck vnbelont lassen/vnd kein böß werck
ungestrafft / darumb müssen ja die werck

etwas verdienen? Rom. 2. Welcher geben
wirt ain yegklichen nach seinen wercken/
Antwort/ du hast yezund gehört/ das alle
werck die wir thünd/ nott werck seind/ vnd
geschehē dieweyl wir berayt den hymel ha
ben/ Sintemal wir von Got/ weyl wir auf
erden leben/ der eytteltait/ vñ disem dienst
müssen wir vnterworffen sein/ vnd fodern
kein lon / wiewol inē der lon für sich selbs
volget/ vnd zügeworffen wirt/ wie wir hö
ren wollen/ Aber die werck dienē sonst (dar
umb sy auch erfordert werden vnd gesche
hen müssen) dazu/ das sy ainen yegklichen
menschen lernen/ wie nahe vnd weyt er bey
vnd von Got sey/ Erstlich findestu bey dir
ain solchs sänffts hertz / das sich über den
der dir übels thūt/ nit erzürnet/ sonder im
günstig ist/ vñ im wol thūt. So hastu ain
lebendiges zeügnuß in deinē hergen/ das
Gott bey vnd inn dir wonet/ des dancck im
trewlich/ deñ sein gayst hat dich also zü ge
richt. Also ist es auch inn andern wercken/
dienen/ radten/ helffen/ schencken/ leyhen
vñ was des dings mer ist/ darinne die nāh
sten vnserer hilffe bedürffen / Thün wirs
willig/ vnd finden in vns die philostorgia

ain solche lust andern leuten zů dienē/ das wir nitt harren/ biß man vns ersücht vmb hilffē/ sonder den leuten entgegen lauffen vnd bietten in vnsern dienst vnd hilffē an/ vnd vns nit wol ist/ so wir niemands dienē So lebet vnd wonet Got in vns/ vnd das geschicht denn alles auß der nott/ darein vns Gott wirfft/ dieweil wir hic vnterain ander leben müssen/ nit vmb lons oder ver diensts willen.

Herwiderüb findestu solche lust vnd willen/ ain andern zů dienen/ nit an dir/ so erschrick vor dir selbs/ vñ fürcht dich vor got klage es jm/ vnd bitte in/ das er dich auch also wölle machen/ denn du hast noch nye in deinem hertzen empfundē / wie groß die schätze vnd reichthumb ist der gnaden/ die Gott vns durch Christum geschencft hat/ den wa nit ain lebē ist der erkentnuß Christi im hertzen/ da kan kein dienst zum nächsten nimmermer von hertzē geschehen/ vñ ist heuchlerey alles was alle phariseer vnd werckhailigē wircken vñ thūn/ Ja dieweil sy es vmb lons willen thūn / So wirt inen weder Gottes gnade noch belonūg in ihesnem lebē. Herwiderumb/ dieweil die rech-

ten Christen wirken vnd dienen / auff die
gunst Gottes / nitt vmb lon / so werden sy
gnade vnd lon zusamen empfangen / in ihesu
nem leben.

Sihe auff die wort Christi Mat. 25. da
er die gleybigē von den werckhailigē schay
det / da er spricht zu den gleybigen / Geet in
das ewige lebē ꝛc. den da ich hungerig war
habt jr mich gespeysset / da mich durste / ha
bet jr mich getrencket ꝛc. Vnd sy sprechen /
wa haben wir dich gesehen ꝛc. Sihe hie zu /
sy haben gedienet den hungerigen vnd dur
stigen / vnd haben nichts darfür gefoderet
weder lon noch bezalung / sonst sprechen sy
Ja es ist war / wir habens thon / Sy steen
aber also / Wir glaubten Gott / vnd waren
darumb selig / vnd dieweil wir dienen muß
ten vnd leben / so haben wir auß nott vnd
pflicht vnsers lebens gedienet vñ gethon /
wie es vns für die hand kōmen ist / auf das
wir der pflicht vnsers lebens gnüg theten /
vnd vmb der gunst vnd gnade Gottes wil
len etwas theten / Dise empfahen gunst vñ
lon / den wer auff gnade dienet / dem wirt
mit barmhertzigkeit gelonet. Zu den werck
hailigen vnd lon wartern / sagt er / Geet in

das ewige fiewer 2c. Denn da ich hungerig
war/da hapt jr mich nit gespeysset/vnd da
ich durstig war / da habet jr mich nitt ge-
trenckt 2c. Da sagen sy/wa haben wir dich
gesehen 2c. Sihestu es abermals/iheue die-
neten auß not jrs lebens / auff gnade/vnd
erlangen barmhertzigkeit vñ das lebē. Dise
dienen vmb lons willē/ vnd auff bezalung
nit auff gnade/ die erlangen zorn vnd den
ewigen tod/Iheue sagen/sy habē ja gedie-
net/aber nit vñ lon/vnd Christus gibt inē
zeügnuß/sy habens jm gethon/was sy brü-
dern gethon haben. Dise sagen/sy habē ge-
dient/ Aber sy habē in nit gesehen/das ist
sy habens jm nit thon / sy habēs inen selbs
zugüt gethon/das es inen Got bezalē solt
Den gibt Christus zeügnus / sy haben jm
nichts gethon/denn sy haben auff lon nitt
auff gnade gedient/ darumb sollen sy we-
der gnade noch lon haben.

Das beweyset auch die parabel vñ hauß
vater/der arbayter dinget in seinen weyn-
garten Mat. 20. Etliche arbeiter vñ ain
bestympten pfenning / die ann der letzten
stund kamen/die arbayten auff gnade vnd
gunst des haußvatters/ die letzten kriegen

also wil als die ersten/vñ behaltē des hauß
vaters gunst dazu / Die ersten kriegen iren
lon/ vnd verlieren die gnade ires haußvat
ters / Die letsten werden durch die gunst/
darauf sy allain dienen/des lons würdig zū
ewigen leben/ die ersten werdē / diweyl sy
nit aufgnade gedienet habē/ mit dem lon
verdampft/vnd in die helle gestoffen.

Man muß auch hie lernē/wie kain werck
gūt ist/das dem nächstē nit zū nutz kompt
sy gleyssen sonst wie groß vñ hüpsch sy wöl
len/ wie Paulus auch von den gaystlichen
gaben sagt. 1. Cor. 12. 13. 14. das Prophecey
die kostlichste gabe vnd vns dz beste werck
die got aufferden gebē kan/vñ der mensch
zū dem nutz der gemaine thūn kan/vñ alle
mirakel on frucht/ja schedlich seind/wa sy
nit dem nächstē zu gūt kōmen/ wie wir da
hinden im andern ca. weyter hören werdē.

Von wellicher jr gehōret hapt/
durch dz wort der warhait im Euā
gelio/ dz zū euch kōmen ist/wie auch
in alle welt / vnd ist fruchtbar/ wie
auch in euch vō dem tag an / da ires

gehört hapt / vnd erkant die gnade
Gottes in der warhait.

Mit diser vorrede / gewinnet S. Pauls
die Colosser ein / vnd streycht maysterlich
auß / wie die leut zu Got kōmen / Das hōrē
ist das erste / Das hōrē begreyst zway stück
nämlich das wort / welchs da ist das wort
der warhait / vñ das diß wort der warhait
sey das Euangelion. Zum andern / volget
die Gnade / die on jr zu thun / die welt auß
lauterer barmherzigkeit Gottes entpfan
gen hat / Darumb sagt er / das zu euch kō
men ist / wie in alle welt. Zum dritten / die
weyl das wort von der warhait / das Euā
gelion vō Got kompt / so geet es one frucht
nit abe / sonder es wirt mit frucht gehört.
Zum vierdtē sagt er / was die frucht sey die
auß dem gehōre des worts vō der warhait
erwachsse / Nämlich erkentnuß der gnade
Gottes / vnd nit ain schlecht erkentnuß /
sonder in der warhait / das ist / dz sy wissen
es sey Gottes wort Joā. 3. Der vom himel
kompt / der ist fiber alle / vnd zeüget was er
gesehen vnd gehōret hat / vñ sein zeügnuß
nympt nyemandt auff / Wer es aber auff

nympt/der versigelt (das ist/er erfert vñ
empfindet es) das Got warhafftig sey ic.
Joan. 7. Wer des vatters willen thut/der
erkennt ob dise leer auß Got sey/ S. Paulus
gibt den Thessalonichern diser erkenntnus
der warer zeligknuß. 1. Thessa. 2. Da jr ent
pfienget von vns das wort Götlicher pred
iget/ namet jrs auff/ mitt als menschen
wort/ sonder wie es auch warhafftig ist/
als Gottes wort/welcher auch wirckt inn
ench die jr glaubet/ Disß füret Paulus mitt
klärern Worten/Roma. 10.

- 1 Gott sendet prediger auß/ wie er denn
von anbeginne der welt thon hat/ Abra
ham/Adam/Sem/Nocha/vñ alle pro
pheten/Christum sein sun/vnd alle pred
iger Joā. 1. 7. Ich bitte auch für die/so
durch jr wort an mich glauben werden.
- 2 Disen seinen freunden legt Got seinen
befelch in jren mund.
- 3 Dise befelhe haber Gottes / Predigen.
- 4 Got ist neben seinem wort/vnd schaft
zū hörer/ vñ rüret den zūhörern jr hertze
welcher er will.
- 5 Die gerürt werden / empfahen liecht/
das in weyset wer sy seind/vñ wer sy sein

sollen/Sy erkennen jr sünde/ vnd lernen
den kennen/der ire sünde hat hingenom-
men/ Christum Jesum.

6 Darnach sehnen sy sich nach der hilffe
vnd rüffen Gottes namen an/ der in al-
lein helffen kan.

7 Wer aber Gottes namen anrufft/ der
wirt selig werden/ Joelis. 2.

Das Euangelion aber hayffet billich
ain wort der warhait/ den es verkündiget
öffentlich/ wie Got gehaltē vnd gelaystet
habe/ alles was er den vātern vnd prophe-
ten zūgesagt hatt. Es ist nun der hayland
kōmen/der kōmen solt/ Gott ist warhafft-
tig/das rümet von Gott das Euangelion
Er wills auch von jm gerhūmet haben/
psalm. 115. Gott ist warhafftig/vnd alle
menschen lügenhafftig.

Wie jr denn gelernet habt von
Epaphra vnserm lieben mitdie-
ner/ welcher ist ain trewer diener
Christi/der vns auch eröfnet hat
Eure liebe im gayst.

Diß ist der Colosser Apostel/durch welches predige sy bekört seind/ da durch Got auch frucht gewirckt hatt/im erkendtnus Jesu Christi.

Er haysset der Colosser liebe on alle hailigen/liebe des gaysts/damitt er anzaigt/wie die liebe erst im gayst müß angeen/vñ darnach erst ins werck außbrechen/dauon er sagt Phili. 2. Ain yegklicher sey gesinnet wie Jesus Christus auch war ic. Das ist/seyt aines müts vnd sinnes /hapt gleyche liebe/thüt nichts durch zancf / oder eyttel eere / sonder durch die demüt / achtet euch vnterainand selbs / ainer des andern öberster/vnd ain yegklicher nit auff das seyne/sonder auff dz des ains andern ist. Hie setzt Paulus die grundfest vñ quellen der liebe/Nämlich/wenig von jm selbs halten/dar auß denn der dienst zum nächsten herauß quillet/Den wie sol ainer ain andern dienen/den er nit grösser achtet den sich selb? Also auch/solt Jesus Christus vns dienen so müßte er sich der Gotthait nit anmassen/sond eussern/die gestalt aines knechts an sich nemen/vnnd sich finden lassen an geberden vñ wandel/wie ain and menschy

Ja hinunter sencken/ in die demüt zu tode
des Creützs/ vñ hat sich geringer geachtet
vmb seins vaters gehorsams willen/ denn
alle menschē/ vnd alle menschen höher ge-
acht den sich selbs. Auff die roeyse hatt die
liebe ire basim vnd grund im hertze/ Ist es
aber anderst bey dir / das du dich höher vñ
besser haltest denn ain andern/ wie kanstu
yemandt liebe erzaigen vō hertzen? Thust
du darüber yemandts ain dienst / so ist es
heuchlerey / vnd geet nitt von hertzen/ des
wirt dir dein hertz zerrüttung geben. Ro. 12
Ir solt euch vntereinander mit eeren zuuor
kōmen/ das ist/ ir solt nitt allain die hütte
vor ainander abziehen/ vnd gūten morgen
bieten/ sonder vil meer das ain yeglicher
den andern inn seinem hertzen warhafftig
höher vnd besser achte den sich selbs/ denn
auß disem gayst erwachset ainigkeit / ain
syn/ ain mūt/ wa das nit ist/ da muß sich
spalten/ vnainigkeit/ Secten vnd Ketz-
reyn geberen/ wie es denn allzeyt gangen
ist/ mit Abel vnd Cain/ Isaac vñ Ismael/
Jacob vnd Esau/ Saul vnd David/ Mo-
ses mit Dathan vnd Abiron/ vnd mit den
weysen Pharaonis/ Christus vñ Phariseer

mit Lerern vñ Pelagianern/ vns mit dem
Bapst vnd Bischoffen / Vnd wiewol dise
vnainigkeit sein muß/ auff dz die warhait
wider die lügen obfige/ vñ der stercker dem
starcken / der sein schloß verwaret / abge-
winne vnd sein güt neme / wie Christus im
Euangelio sagt / vnd auff das die außers-
wölten bewert werde/ so soll sy doch/ vnter
den Christen / als der höchste vñnd grösste
schaden/ in den gemainē allenthalben mit
vermanūg Gottes worts vnd gebett/ aufs
fleyssigst vermitteln werde/ Ja diß ist eben
das stück/ dawider alle hailigen vnd Chri-
sten mitt grossem fleyß gebetten haben/
Psalm. 35. Laß mir nit kōmen den fuß der
hoffart/ vnd die hand der gotlosen stürze
mich nit. 2. Cor. 12. Vnd auff das ich mich
nit der hohen offenbarung erhebe / ist mir
gebē ain pfal ins flaisch/ des Satanas en-
gel ic. Den es ist der natur vnmöglich/ das
sy sich nit solt mit den gūttern Gottes be-
schmützen/ weñ sy ir vol ist/ darumb haben
hierinn alle Christen genūg zū lernen/ die-
weyl sy leben / Andere anfechtūg kan man
mit dem wort überwinden/ dise anfechtūg
kompt mit dem wort vñ felscht es/ der 90.

psalm hayßet dise anfechtung den mitags
teuffel/der vnter ainer gestalt ains engels
die sichersten stürzet vñ tödtet/ den ye we
niger flaysch vnd blüts/ye mer gaysts vnd
gaystliche gabē im menschē seind/ ye grōß
ser dise gaystliche hofart ist/ dauon wir im
Euangelio vom gleyßner vnd zolner weyt
leufftiger geredet haben/ wie jr wisset.

Derhalbē auch wir/ von dem ta
ge da wirs gehört haben/ hören wir
nicht auff/ für euch zū betten/ vñnd
bitten/das jr erfüllet werdet mit er
kēdtnus seins willens.

Da wir gehöret haben von ewrem glau
ben vñ liebe / da bitten wir on vnterlaß zū
Got/ vmb zūnemen vñ stercke ewers glau
bens/auff das jr erfüllet werdet / mitt er
kētnus seins willens ꝛc. Wer glaube ist
angangen/ vñnd hatt durchs wort frucht
bracht/die lieb hat sich herfür gethon/ vñ
sehen lassen/darumb bitten wir / Got wöl
le solchen eweren glauben befestigen vñnd
füllen/das auch die liebe nit kalt werde/zū
allen hailigen.

Es seind im Riechischen zway wörter
proscūchomenoi vnd aitumenoi / die den
ernst Pauli im gebet meldē / das erst hayst
schlechts bitten / das ander hayset im ge-
bet auffetwas dringen / also wen man vi-
sach anzaigt / dem / von dem man ettwas
bitten will / das er vns der bitte gewere / vñ
die bitte nit versagen soll / Das Paulus der
Colosser glauben vnd liebe begert vō Gott
gestercket werden / dieweyl Gott ain groß
lob seiner warhait von irem berūf der also
langtſam geschicht / in alle welt verkündi-
get vñ außgeruffen wirt / das auch die an
Gottes wort glauben / welche es zūuor ver-
folget haben / das den zeügtnuß gibt dem
wunder / das das Euāgelion krefftig treys-
bet vnd yebet.

Erkenntnuß seins willens geschicht / wie
droben zum tayl gerürt / in der gedult vnd
Trefſige / denn wen Gott seinen willen an
vns yeben will / so laßt er vns nichts gūts
sein / weder in gedanken noch wortē / noch
anschlegen / noch wercken / Es muß hinun-
ter vnd zůrücke geen / wie wirs auch fürne-
men / Wen vns aber all vnser thūn zůruck
geet vñ widerſinns / so gilt es sterbens / vñ

thüt flaisch vñ blüt wee/vnd kan es kaum
ertragen / Darumb bedürffen solche leutt
wol gütts trosts / darauß sy lernen vnters
schayd kennē/vnsers willens vnd Gottes/
willens / Vnser wille sücht was wol thüt/
Gotes wille bricht das gesüche/ vñ schaft
es mit vns/das wir müssen tragē/das vns
übel vnd wee thüt/ Wen nun der trost des
Euangelions dreyn felt/vñ zayget vns an
wie das Gottes wille sey / das wir vnsern
willen brechen vnd tödten sollē/vnd Gott
schicke vns darumb also vil vnglücks vnd
anfechtung zū / das wir dadurch müßb wer
den/an vns verzagen/ ja lernen/das er es
hertzlich güt maine / vñ künde vns vnsern
willen/der zur helle zū eylet/durch kein an
dere weyse brechen vñ dämpfen/ den durch
leyden/darinne er vns tröstet vnd gen hy
mel füret. Vnser will sagt/ Got zürnt mit
mir/darumb schlecht er mich/ Gotes will
sagt/Ich schlahe dich darumb/das ich dir
günstig bin/ den im schlahē erfarestu dein
vnuermögen / vnd lernest hilff vñnd trost
bey mir allain süchen / welcher trost/ dich
an keinem dinge/ das dir zur seligkeit von
nöten ist/mangeln laßt/vnd füre dich in

ain neues lebē/ vnd eröffne dir Gottes ge-
haimnuß/ vnd verborgene kunst stücke/ der
da gen helle fñrt/ vñ herwider/ 8 da tödtet
auff das er lebendig mache/ der da schlecht
auff das er tröste 2c. 1. Reg. 2. Ro. 12. Laßt
euch verendern durch vernewerung ewers
synnes/ auff das jr brüfen mügt/ welchs da
sey der güte/ der wolgefellige vnd der vol-
kōmene Gottes wille. Item Ro. 1. sagt S.
Paulus/ Das Euangelion werde darumb
geprediget/ das es gehorsam des glaubens
aufrichte/ Wa aber gehorsam des glaubens
sein soll/ da muß alles was im flaisch vnd
blüt/ in vernunft/ witz/ vnd verstand ist/
gar auff hören/ vnd dem wort im glauben
sich vntergeben/ vnd allain dem volgen/
was es in hayßet/ dieweile es in aber allain
das hayßet/ daß flaisch vñ blüt vnbegreyf-
lich ist/ so tödtet es im menschē alles was
flaischlich ist/ vnd füret in inn den gayst.
Also sagt Paulus auch. 2. Corin. 10. Vnser
waffen 2c. seind mechtig vor Gott/ zu ver-
stören die befestigūg/ damit wir verstören
die anschlege vnd alle höhe die sich erhebet
wider die erkentnuß Gottes/ vnd nemen
gefangen alle vernunft/ vnter den gehors

sam Christi/ Also bittet vñ fodert S. Paulus/ Gott wölle die Colosser erfüllen/ mit erkenntnuß seins willës/ das sy gewisse sein alles leyden/ Ja alle creatur/der teufel vñ der todts auch selbs/diene in zum besten.

Nym des ain solchs Exempel/ Es hat Got ain frömes kind/das hat er zum glauben berüffen/vnnd wirt also sicher/das es mainet es sey nun güt/vnd wirt laß im gebet vnd gayst/geet also hin/vnd gefellt im selbs wol/tadelt ainen andern/der also vil güter vnd glauben nit hatt/ist weyse/ vnd kan alles vitaylen / Dem kinde will Gott weysen/wie es müsse fortfare/vñ sein wesen sey nichts/vnnd das er sich allain lerne rümen/das er Got kenne/wie Hiere. 9. geschribē steet/So sagt Got zum teuffel/Du wilt doch stets schadē thun/kom her/Gee hin vnd straff mir den mit frantzheit/jage in in ain sünde/mach im ain böß gewissen/jage im ein des todes forcht ic. Der teufel thut also/ Also bald als nun diß kind in die sünde fellt/ so schreyet es / Owe wie bin ich hie herein kōmen : Herre ich bin gefallē rechne es nit/gnade herre gnade/ Mainet ich doch / ich stünde also gewiß / nun syhe

ich wie bald es geschehē ist / Herre laß mich
nit mer fallen / nym̃ deinen hailigen gayst
nit von mir / regiere du mich / ich syhe doch
wol / es ist mit mir verloren / Deñ saget got
Du woltest mir zů sicher vñ freuel werdē /
ich muß dich ain stücklin sehen lassen / vnd
muß mir ain liedlin singen / dz ich gern hō
re / Bekentnuß deiner schwachait / rüm vñ
preyß meiner gūte / Also sagt got in Jesaia
In frenabo os tuū laude ne intereas / Ich
wil dir ain zaū in maul legē / weñ dirs übel
get / damit wil ich dich auß dē vnglück her
auß reyssen / d̃ zaum soll aber mein lob sein
das du sagst im fall / Herz hilff / ich kan mir
selbs nit helffen / Desgleichen thūt er auch
mit den bösen leuten / die tag vnd nacht ge
dencken / wie sy ander leut beschedigen / Kö
ment her schendent den an seiner eere / ver
brennet im hauß vñnd hoff. Weñ nun der
sein armūt sibet / so erschüct er / es thūt im
wee / Er wayßt niendert zů bleyben / es pey
nigen in weyb vnd kind / vñnd laufft doch
endtlich zů Got vnd bittet hilffe / lernet al
so kennen / wie diß alles Gotes wille sey / in
dadurch zů demütigen / vñ das im zů dem
gūtte / vnd zů der erkentnuß Gottes willē /

der Teuffel vnd alle böse menschen dienen
müssen. Job. 41. Wen er erwecket (der Le-
uiathan) wirt/ so wirt er nitt so grawsam
sein/ denn wer ist der mir widersteen kan?
Wer hat mirs zūuor thon? Item/ der in ge-
schaffen hatt/ der wirt in mitt sein aygen
schwert angeen/ Die gotlosen aber/ wenn sy
Gott schlecht/ so lauffen sy zū rucke/ vnn
suchen hilffe bey menschen vnd wercken/
darüber auch Jesaia schreyet. 9. Das volck
hat sich nit widerumb keret / zū dem der sy
schlug / Das haben wir vnter dem Bapst
wol gesehen / der diß erkentnuß des wolge-
fellen willē Gotes gar hat außgeleschet
Es was Gottes wolgefallē / das die Wey-
ber sollen in schmerzen vnd angst ire kin-
der geberē. Ge. 3. Da weyset sy der Bapst
von Got/ auff S. Margarethen legende/
vñ auff ander narien werck. Hat ainer ain
franchhait/ so gelobet er sich/ durchs Bap-
stes leere verfürt/ zū S. Valentin 2c. Vnd da
müß zū ainem yeglichē stucke/ daran wir
Gotts willen lernen solten/ erkennen/ ain
sonderliche hailige zū dienen/ S. Anne vnd
Joachim/ müß reych machen/ vñ S. Cra-
sinus/ die lieben hailigē müssen Apotecer

vnd Barbierer werdē / als S. Rochus vñ
Sebastian / vnd das alles darumb / das ja
Gottes wille nit erkennet wurde.

Inn allerlay Gaystlicher weyßhait vnd verstand.

Weyßhait ist die lere vom glauben / vñ
vom erkentnuß Gottes / nämlich was ge-
wissen vnd herze betrifft / erkentnuß vnser
sünde / trost der gewissen / vnd das vnters-
pfand / dadurch wir versigelt werden / das
wir Gottes kinder seind / der hailige gayst
Summa summarū / weyßhait / ist das ain
mensch wisse was Got sey / vnd wie er sich
allenthalben gegen Got haltē soll / das er
nichts groß achte / den allain Gotes wort
vnd werck / daran er seine lust hat / psal. 1.

Verstand das er zū Ephesern / klügheit
nennet / ist der eusserliche wandel / vnder
den leutten / dauon man richten kan / was
Gott gefällt oder myßfällt / in eusserlichen
dingen. Vnd hierein gehören / alle verma-
nung der schrifft / wa sy hayßet wachen /
betten / dienen / ain andern leyhen / geben
eererzaigē / kinder ziehen / weyb / hauß / hoff
regieren / vnnd alles was den eusserlichen

wandel betrift/ gleich wie in die weyßhait
droben gehöret/ alles was den glauben vñ
die frucht Gottes vnd hoffnung betryfft/
Gottes dienst vñ eere/ Also steet geschribē
von David/ Er hielt sich klüglich in allen
geschafften des Königes. Ephe. 1. Hefftet
Paulus die zway aneinander/ So sehet nu
zū/ wie jr fürsichtiglich wandelt/ nitt als
die vnweysen/ sonder als die weysen 2c.

Also geet S. Paulus gebet dahin/ das er
den Coloffern erwerbe/ fülle vñ stercke des
glaubens/ innerlich vor Got/ vnd außwen
dig vor den menschen/ also das sy vor Got
vnd den menschen/ eerlich vnd seligklich/
aller welt zū besserung leben mügen.

Dise klügheit vñnd erbarer wandel vor
den leuten/ folget der weyßhait/ vñ jr selbs
ungenötiget/ den gleich wie ain vernünfft
tike hüpsche seele ainen hüpschen leib habē
will/ den sy vernünfftigklich regiere/ Näm
lich/ wa ain sänffts hertz ist von natur/ da
volget auch eusserlich ain sänfft stille ge
berde/ mit reden/ thūn vnd lassen. Wa ain
zornig hertze ist/ da ist auch ain geschray/
wüten vnd wildes lebē/ den der zorn bricht
herausß ins werck/ wort vnd zaychen/ Also

vil meer will der hailige gayst/ wo er hyn-
kompt / ain sänfftes stilles hertz / wandel
vnd geberde machen/ Darumb ist zū besor-
gen/ das bey den rohen / wilden / frechen/
leuten/ die vil vnzucht reden vnd treyben/
nit vil Gottes noch gaystes sey.

Das er aber hinzū thūt/ in aller gaystli-
cher weyßhait/ schaydet er von ainander/
Weltliche vnd Gaystliche/ Göttliche vnd
menschliche weyßhait / Gottes weyßhait
ist verborgen im creüz vñ vnglücke/ die nie
mandt kennet/ Gott eröffnen sy im den/ da-
von sagt Christus Mat. 11. Ich preyse dich
vater vnd Herre/ hymels vñ der erden/ das
du solchs den weysen vnd verstendigē ver-
borgen hast/ vnd hast es den vnmündigen
offenbart 1c. 1. Corin. 1. Wir predigen den
die beruffen seind/ Christū/ Göttliche kraft
vnd Göttliche weyßhait/ den die Göttliche
torhait/ ist weyser den die menschen seind/
vñ die götliche schwachait/ ist stercker den
die menschen seind/ dauon wollen wir/ wil
Gott/ mer dahinden sagen/ da S. Paulus
sagt/ Vnser leben sey verborgen mitt Chris-
to in Gott. Wenn nun Gott sich ernst stel-
let / wie er sich auch zū seinem geliebte sun

Jesu Christo stellet/ da er in in tod fallen
ließ / so sihet der glaub auff Gottes augen
durch das schlahē/ernst vñ zorn/hindurch
vnd wirt gewar des sänften hertzens Got
tes vnsers lieben vatters/das gesicht/das
halten/das erkennē von Got vnd zū Got
ist/gaistliche weyßhait vnd verstand/wel
ches Paulus zun Ephesern nennet/das ge
haynuß Gottes/welchs verborgē gewe
sen ist/von anbeginne der welt her/vnd al
lain in Christo Jesu offenbart.

Menschliche weyßhait vñ verstand ist
disem entgegen / Gaystliche weyßhait ist
im verborren / Flaischliche weyßhait ist in
den dingen allē/die man sihet/Gaystliche
weyßhait sagt / der mensch hatt Gott zū
freunde/der arm vom gayst/reych vō tro
ste/vol verfolgūg/ler von gūten tagen/ ist
allain das er ainen Got habe/ der sein va
ter sey/zū dem er sich gūts vnd gnade ver
sehe. Menschliche weyßhait sagt/dem es
wol geet/der reych ist/gewaltig ist/der inn
eeren vnd wollust lebet/dem ist Got gūns
stig/Vnnd herwiderumb/der arm ist/ge
schendet wirt / dem es hinden vnd forren
fält/dem ist Gott feynd. Der. 144. psalm

stellt das vrtayl/über bayde/Welcher müß
redet vnnütze / das vnser süne auffwach-
sen wie die pflanzen in irer jugent/ vnd vn-
sere Töchter wie die außgehawene ercker/
gleich wie die palläst / vnd vnser winckel
vol seyen/die herauß gebē/vorradt biß wi-
der zū vorradt / Das vnser schaff tragen
tausent/ vñ hundert tausent draussen/ vñ
vnsere Ochsen starck zū tragē/ das kein ryß
kein außgang/noch geschray auff vnnsern
gassen sey. Wol dem volck dem es also geet
(So weyt redet die welt weyßhait) Aber
wol dem volck/des der Herre ain Got ist/
so sagt Gottes weyßhait. Jun Corinthern
verbeüt Paulus/das wir nit das Joch fü-
ren sollē mit den Hayden/ das ist/ nit vns
der ding hoch verwündern/ der sich die Hay-
den verwundern/Reychthumbs/Glücks/
vnd Eere ic. denn vnser wandel ist im hy-
mel ic. Math. 6. Sorget nit ic. Denn dar-
nach trachten die Hayden.

Das jr wandelt würdiglich dem
Herren/zū allem gefallen.

Da streycht er auß die maß / der füllen
erkentnuß des willen Gottes / in allerlay

weyßhait vnnnd verstand / wie weyt sy sich
außstreckt / Nämlich / das alles was die
thün / des seind sy sicher / es gefalle Gott
wol/ vnnnd wandeln Arios / wie der Herre
auch wert ist/ das sy im zügefallen/ erbar-
lich/ vnd aller welt zur besserüg/ Got zum
rüm lebē künden/ Also auch/ das alle welt
sagen muß/ Sihe/ wie hatt Gott da ainen
menschen zügericht / Er dient/ Er hilfft/
er redt/ vnd versaget niemant seine pflicht
Got sey gelobet/ der vns ain solchen men-
schen gegeben hat/ also sagt Christus Ma-
thei. 6. Also soll ewer liecht leüchten / vor
den menschen/ auf das sy ewere güte werck
sehen/ vnd loben ewern vater der im himel
ist/ das liecht muß erst leüchten/ das hertz
muß züvor durch den glauben gerechtfert-
iget sein/ vnd erleüchtet/ darnach volgen
zum zaychen sollichs liechtes / ain erbarer
wandel/ dienst vnnnd hilffe zum nächsten/
darumb volget.

Vnd fruchtbar seyt in allem
güttem werck.

Zieher füret nun widerüb/ das wir dro-
ben gesagt haben/ warzū güte werck dienē

vñ das man ja wol mercke/wie kain werck
güt sey/es kōme den dem nächsten zū güt/
Zū dem/das die selbigen werck/ weñ sy ge-
schehen/nichts anderst seind/ den ain todt
vnd sterben der Natur / vnnd des allten
Adams / Darumb sollē hie wissen/die/die
auf wercken ligen/das Paulus zū Rōmern
also sagt/Von denen/ denen Got jr werck
belonen will/vnd die fruchtbar seind/ inn
allen gūten wercken/ Ro. 2. Welcher gebē
wirt ainem yegklichē nach seinen wercken/
Nämlich/preyß vnd eere/vnd das vnuer-
gengkliche wesen/ denen/ die mitt Gedult
in gūten wercken trachten/nach dem ewi-
gen leben. Sihe hie Paulo zū/was er gūtte
werck hayßet/vnd welche/vnd was darzū
gehōret/Gott bedarff vnfers diensts nitt/
sonder der nächste/ Darüb steet auch in ge-
bottē/das ander gebot ist dem gleych/ Lie-
be deinen nächsten als dich selbs / das ist/
Wiltu Gott dienen/ so sihe vmb dich/vnd
wa du sihest die deiner bedürffen/da hastu
Gott ersehen vnd ergryffen/ denn das gilt
also vil / Ja es ist also vil / als thettest du
es Gott selbes / Denn diser dienst ist ihe-
nem gleych/ Got sitzt hoch vnd sihet tieff/

Wer da glaubt/ der sihet auch tyeß/denn
des glaubens augen seind Gottes augen/
So will natur übersich sehen/ vnd nit vn-
tersich/ darüb gehört gedult darzü/ die al-
lain Gott geben muß/sonst wurde vns die
Natur vil zü starck sein/die da gar nit kan
anderst thün/denn sich selbs lieben.

Wa bleyben nun die Styffte? mit allen
iren Messen/ Vigilien/ vnd Ceremonien/
was ist für gedult da? Keine/Darumb kün-
den vñ mügen nit gute werck da sein. Aber
das du zü ainem seind geest/sprichst im zü
vñ dienst im/thüß im guts/da müßtu dich
enge spannen/ soltu hindurch kōmen/vnd
dein flaisch vñ blüt überwindē/ja du wirst
es wol lassen/ wa dir der hailig gayst dein
herz nit verendert/anzündet/vnd gibt dir
stercke/das du das thün mügest. Item al-
so auch/ wenn du solt deinē nächsten kran-
cken/wāschen/raynigen/ der da stinckt vñ
übelreücht/ da müßtu ain hohen sprung
thün/soltu hinüber faren/vñ das mit her-
zen lust yeben an deinē nächsten/ Derhal-
ben seind aller Clöster/styffte/Pfaffen vñ
Münche werck/des teuffels werck/daran
Gott grewel hatt/denn sy diencn nur inen

selbs/ das sagt Paulus mit hellen Worten
Tit. i. Den raynen (vnd gesunden im glauben)
ist alles rayn/ den vnrainen aber vnd
ungleubigē/ ist nichts rayn/ sonder vnrain
ist bayde jr syñ vnd gewissen. Sy sagen/ sy
erkennen Gott/ aber mit den wercken ver-
leügnen sy es / Sintemal sy seind/ an wel-
chen Got grewel hat / vnd gehorchen nit/
vnd seind zu allē gūten werckē vntüchtig.

Vñ wachset in der erkentnuß got-
tes/ vnd gestercket werdet mit aller
krafft/ nach seiner hetligkait macht
in aller gedult vnd langmütigkait
mit freuden/ vñ dancksaget dem va-
ter/ der vns tüchtig gemacht hat zu
dem erbtayl der hailigen im liecht.

Was wachsen sey im erkentnus Gotes/
haben wir droben zum tayl gesagt/ da wir
von der yebung des glaubens geredet habē
von der hoffnūg/ Es geschicht aber zway-
erlay weyse. Erstlich/ das mā an der war-
hait dem wort/ lere vnd werck Gottes fest
halte/ wie Ephesi. 4. Paulus sagt/ Vnd er
hat etlich zu Aposteln gesetzt/ etliche aber
E

zu prophetē ic. biß das wir alle/ainer dem
andern die hand raychen/zu ainerlay glau
ben vñ erkentnus des suns Gottes ain vol
kōmen man werden/der da sey in der maß
des volkommenen alters Christi/darnach le
get er das auß vñ spricht/Auff das wir nit
mer kinder sein/ Was seind kinder? vñ vns
weben vnd wehen lassen vō allerlay wind
vnd leeren / den Got schicket drum̃ neben
ein/wa die rayne leer geht/Secten/irthūb
vnd kēgereye/auff das man gewiß sehe/dz
sein leer recht sey/Also bittet David wider
seinen feynd Absalom / vor dem er fliehen
müßte/Psal. 7. Stehe auff Herre in deinem
zorn / Erhebe dich über den grym̃ meiner
feynde / vnd erwecke mir das gericht/das
du gebotten hast/ vnd laß sich die gemain
der leutte vmb dich her samlen / vnd kōm
vmb der selben willē wider empor/ das ist
Laß mich wider zum regiment kōmen/ vñ
wōre den frembden/ auff das die gemaine
deines wortts nitt lang beraubet werde/
Das ist nu das zunemen im vitayl der gay
ster/vnd rechten lere/ darinn die wachsen
die da glauben/ vnd sich mit Gottes wor
ten vñnd wercken/ als jrem grōstem hayl/

tag vnd nacht bekümiern. 1. Timo. 3. Die
erwerben in selbs ain gute stufen/vnd ain
grosse fraydigkait im glauben inn Christo
Jesu. Diß gehört den Bischoffen sonder
lichen zu/wie Christus sagt. Seyt klüg wie
die Schlangen 2c. Nachmals auch allen
Christen/Joā. 10. Ich kenne meine schaff/
vnd sy kennen mich wider/vnd dem fremb
den volgē sy nit nach/sonder fliehen vō int
Zum andern wachset auch diß erkenntnuß
in vns selber/also das wir auch von tag zu
tag zunemen / in stercke vnd troste vnser
gewissens/ Nämlich also/das der hailige
gayst in ainē yeglichen menschen/vnsernt
gayst zeügtnuß gibt/das wir kinder Got
tes seind / das geet also zu/ Ain yeglicher
mensch/der zum glaubē von Got im Euā
gelio geruffen ist/der hatt auß der raynen
leer gelernet/dz darinne verkündiget wirt
Büß vnd vergebüg der sünden/ das ist/ er
lernet/wie er auß jm selbs nichts vermag/
Kan jm auch selbs nicht helffen / Er sihet
aber in dem liecht/wa er gewesen ist/näml
lich/ vnter dem Regiment der finsternuß.
Wa er yetz ist/ nämlich/ das er verdampt
das vorige wesen vnd wandel / vnd wa er

hin soll/ nämlich/ zu Gott allain / der im
helffen vñ raten will/ Summa/ Er weißt
wie er seines gebrechens loß soll werden/
vnd wa er trost holen soll/ vñ ob er wol des
erkenntnuß halben selig ist / so ist er doch al
lain ain ernstling des gaystes/ vnd nit vol
kōmen / darumb in im wachsen muß/ das
sehnen vnd verlangē/ nach der volkōmen
hait/ vnd ye grösser das sehnen ist/ ye vol
kōmener vnd stercker er im gayst wirt. Es
empfindt ainer bey im alle stund/ zorn/ wi
derwillen/ geytz/ sorge für die narung/ vn
gedult im leydē ic. Vnd dieweyl er disen ge
brechen empfindet vnd erkennet/ so gewin
net er vsach/ zu schreyen zu Got vmb hilff
Heüt sicht in an/ sorge der narung/ so fellt
er auff sein knye/ vnd bitt / Gott wölle im
den gebrechen wendē/ Morgen zorn/ Ober
morgen vnkeüschait/ über acht tage geytz/
vnderweylen reysen in dise anfechtung gar
darnyder vnd drucken in / Aber er klagt es
got on vnterlaß/ wie er gerne wolt anders
sein/ aber es sey der alt Adam zu starck/ dar
umb flehet er Gott/ er wölle in vmb seins
suns willen/ dise fälle nit zu rechnen/ sonder
schencken / Er wölle im auch seinen gayst

senden/der in füre/ stercke vnd tröste. Wa
den solchs täglichs sehnen ist nach Gott/
vnd wee klagen/ über die vnuoltömenhait
da seind des gaysts erstlinge/da seind Got
tes kinder / da seind Chriſten / Vnd in den
stücken erfaret ain Christlich gleybiges her
ze/das es vō tag zū tag zūneme / Heüt we
niger zū zorn genaygt/ den gestern/ morgē
weniger sorgfeltig für die narung den heüt
über ain Jar ganz sänffte/ vnd der hewer
niemandt nichts künde zū gūt halten/ der
ist durch den trost Gottes darnach er sich
gesehnet hat/ also gebrochē vnd mürb wor
den/das er eytel sänfftmüt vñ gūte wordē
ist/ Entlich wa er also zū nimpt vñ wechselt
bringt ers auß diser erfārūg in ain solchen
brauch/das er sagen kan/wen der todt vñ
alle eusserliche leyden auf in fallē/ Wolan
laß her fallen/der Got der mir also oft ge
holffen hatt/ vnd mich noch nit gelassen/
der wirt mich yetzund auch nit lassen/des
tröste ich mich / das ist den hoffnung/ wie
wir droben auch gesagt haben.

So sehen wir nun/wie die Büß vnd ver
gebung der sünd geyebet soll werden/ weyl
wir lebē/vnd nit aufhörē/ Büß die tödtet

vergebung der sünde tröstet / vnd macht lebendig / Büß eröffnet die sünd / vergabung der sünd haylet sy / Roma. 8. Es ist nichts verdanlichs an denen die in Christo Jesu seind 2c. Das ist die sünde / die da ist in den erstlingen des gaystes / solle in zur seligkeit nit schedlich sein / vnd sollen darumb von Got nit verworffen werdē / dieweyl sy büßsen / das ist / gern anderst sein wölten / wenn sy köntē. Zie mercke wer da kan / das / was das zünemen nit ist vnter den leuten / das da weder Got oder sein Euāgelion fruchtbar ist / Darumb sihe auff die werck hailigen / wie vngedultig / vnleydlich / geytzig / vnd vngeschlacht sy bleybē / vnd rechne an den fingern / welchs gaists kinder sy seind / aber dauon dahinten weyter.

Das wörtlin auxanomi / das jr wachset gehöret zu der art der bewme / jungen thieren vnd menschen / vnd hayssset beklayben / Es reymet sich aber köstlich hieher / Lucas braucht es von der jugent Joannis vñ Christi / da er spricht / Das kind wuchs / an glydern / stercke / marck / bayn / flaisch / blüt / Wenn man ain baump plantzt / so setzt man den wilden stock / darauff man ppropffen

will/in ain feücht land / vnn̄d vmbgrabet
den baum/das er kan feüchtigkeit haben/
vñ safft in die wurzel/Die safftige wurzel
speyset den ganzē baum/ vnd geüßt sy auß
in alle zweyg/ Knuspelt erst/ schlecht auß/
gewinnet bletter / vnn̄d dienet mit seinen
früchten allen leuten/ die sein begeren/ Er
wöret es k̄ainem menschen / das es seiner
frucht nit geniessen solte/ Also pffroßt got
durch sein wort vnd gayst/ auff den Adam
der wilde vnn̄d vngewer ist / ain neuen
mensche in erkentnuß seins suns Jesu Chri
sti/ Adam ist ain wild reyß / wie denn alle
bewme vñ menschen vō natur der wurzel
halben wild/vñ teuffels kinder geschaffen
vnd geboren werden/ vnd k̄ain baum brich
te andere denn wilde sawre frucht / K̄ain
mensch k̄ünde anderst th̄un den̄ sündigen/
wa des gartners hand den baum nitt ver
setzte mit seiner wurzel / vnd pffroßt ain
zam reyß darauff in ain besser land.

Wa Got durch seinen gayst / den mens
chen vernewte/vñ fürte in auß finsternus
vnd tode / ins liecht vnd leben/ Darnach/
wie die gärtner die wasser reyser abschnay
tet / also wirt der alte mensch gecreüziget

durch Gottes wort vñ tag zů tag/wirt beschnitten/ vñ reybet sich an den stain Chri-
stum Jesum/ Dis zůnemen allenthalben/
von der wurzel in den stam vñnd ganzen
baum ist wachsen/ Also auch/das zůnemē
des hertzens im glaubē/ von stercke zů ster-
cke/ wie droben gesagt ist / ist das wachsen
in erkentnuß Christi Jesu.

Herwiderumb/wa das land dürr ist/vñ
der baū wirt nit durch des gartners hand
versetzet / so hatt die wurzel kainen safft/
taylet nichts auß/bringet kain bleter noch
fruchte/vñd muß verdorren/den̄ wer zů di-
sem gůten lande kompt/der entpfehet saft
wenn er vmbgraben ist/von tau/vñd von
regen der vñ hymel felt/vñd kan on frucht
nit bleyben/sonder dienet ainem yeden der
von seiner frucht begert zů essen/ Vñd wer
in das land nitt kompt / der bringet kain
frucht/ist niemands nichts nütze/vñ scha-
det jm selbs/dz ist/er verdorret. Es ist ain
warhait die von Got kompt/die vns war-
hafftig vñd rechtschaffen macht/wer der
fält/der muß auff annder ding fallen/der
lügen volgen / vñd dieweil sein hertz nit rü-
wen noch rasten kan/ abgötterey anrichtē

wie den die bösen beume gethon habē/ wel
che die Secten vnd örden / Mönche vnn
stysst/ also wurmstichige fruchte gebracht
haben. Hierauff verstehet man den Ersten
Psalm / vnd die predigen Johannis vnn
Christi/ wenn sy sagen/ Ain yeglicher baum
der nit gute frucht bringt &c. Item hierauff
lernet man/ warumb Christus den Seygen
baum verflucht / der kein frucht hatt ge/
bracht. Item es werden auch hierauff ver/
stendlich alle die öter/ wa des regens/ hy
melthawes/ vnd guten erdtrichs gedacht
wirt in Propheten vnd Psalmen / Osee. 9.
Ephraim ist geschlagen/ jr wurzel ist auß
gedorret/ vnd zehen Kletten vñ disteln sol
len auf jren Altarn wachsen psal. 66. Das
land bringt sein frucht. S. Paulus braucht
das gleychnus auch/ Ro. 10. vñ. 6. von Ju
den vnd Hayden. Mit den wortē/ vnd kref
tig werdet mit aller krafft/ nach der ster
cke seiner herligkait / will S. Paulus also
vil/ das diß zunemen vnd wachsen/ allain
geschehe auß krafft vñ macht Gottes/ al
le menschē müssen außserhalb diser macht
die solchs erkendtnuß schafft / verdorren/
wie den folgen wirt/ wenn S. Paulus kom

met auf die weyse / dadurch got dise macht
vnd stercke wircket vnd yebet / den was er
in disem stück wircket / das thut er vñ des
willen / das er der thetter sey allain / groß
vnd herlich gelobet / vnd gepreysset werde /
von allen menschen.

Das beweysen auch die volgenden wort
in aller gedult vñ langkmut mit freuden /
den das ain mensch Got allain soll waltē
lassen / vnd aller seiner gütter absteen / das
muß vñ oben herab kōmen / sonderlich / wa
er mit frewdē soll gewartē alles vnglücks /
vnd aller anfechtung / vnd das allain dar
umb / das er wisse / Gott schicke jm das zū /
vnd geschehe jm zū gūt / ja Got thū es auß
gnaden / vnd nit auß zorn.

Dancksagung wechselt vnd quillet übers
ich / wa dise Gottes grosse krafft erkendt
wirt / Gott hat groß thaten geyebet / vnd
kressftiglich erweysset sein stercke inn dem /
das er hymel vnd erden erschaffen hat / der
Sonnen vñ dem Mon solche genge vñ wi
dergenge / den Sternē liecht / dem Mo zu
wütten ꝛc. geben hat / der sein güte vñ zorn
an den thieren / Löwen / schlangē / Beren /
mancherley fischen / vnd aller art vogel vñ

gewürme sehē laßt/ & vns also wunderlich
schaft/nōret/speiset vñ erhelt/vñ was der
werck vñ wonder meer seind. Aber & werck
vñ wonder ist kains nütze/ ja verdamlich/
wa nit dz erkentnus Jesu Christi/liecht vñ
lebē gibt/ allē disen grossen wūdern gotes.

Auf die weyse neñt S. Paulus dz Euan
gelion ain krafft Gottes zur seligkait. Itē
Jo. 6. vnterschaidet Christus alle werck sei
nes vaters/ vñ rümet ain werck allain für
das höchste/da dz volck fraget/ Was sollē
wir thūn/das wir gotes werck wircken? Je
sus antwort / Das ist gottes werck/ das ir
an den glaubet/den er gesānt hat/Glaubē
an Jesu Christ/ist das rechtschaffen/ aygē
natürliche werck/das Gott als ain milter
gnediger Got vnd vatter wirckt / dabey er
auch allain erkānt wirt/on welchs werck/
alle andie werck vnnütz vñ vergebēs seind
den diß werck/ glauben an Jesu Christ/ da
durch wir vō natur vntüchtig/ auß gnadē
werdē tüchtig/vñ das/ das er ist vō natur
Gottes kinder vñ erben/vñ miterben Chri
sti/macht vns herren/vnd auch wircker al
ler anderer werck Gottes/Wir werdē frō
lich/ rüwīg/erleücht/ haylig/rechtfertig/
lebendig/ vnd hewser des hailigen gaystes

also das vns Son vnd Mon/ fische/vögel
wilde vnd zame thier dienen müssen / vnd
wir gewalt haben über sy derselbigen nach
vnsrer notdurfft / vnd des schöpffers eere
zü gebrauchē/ vnd nit allain über die thier
sonder auch über den teüffel vnd todt/sün
de vnd böse gewissen / auch des sabbaths/
vnd aller geseze/ die auch Got geben hat/
Darumb dieweyl diß werck so groß ist / vñ
ain aigen Gottes werck vñ krafft/ So kan
das lob für diß werck auff niemands bley
ben/es muß wider auf in fallē/wie er auch
eben vmb diser krafft vñ lobes willen/ ain
eyferer ist/vnd will sein eere niemands an
ders gebrauchen lassen/Ziere. 9. Der reych
rūme sich mit seines reychthums/der star
cke mit seiner stercke / Der weyse nitt seiner
weyßhait/ sonder des rūme sich yederman
das sy mich kennen/ den ich bin der Herre/
der auferden/ barmhertzigkait/gericht vñ
recht schafft/den das gefällt mir/sagt der
herre/ Darumb ist der Chrusten lebē nichts
den ain dancksagung/ lob/ vnd Haleluia/
wie den diß lobs die Psalm. vol seind. 145.
Ich will dich erhöhen mein Got du künig
vnd deinē namē lobē ymer vñ ewigklich ꝛ

Das mā auch sage das gedechtnus deiner
grossen freüntligkait/vnd deine gerechtig
kait rüme/ gnedig vnd barmherzig ist der
Herre/langmüttig vnd von grosser güte/
der herre ist yederman freüntlich/vnd sein
barmherzigkait über allē seinē wercken 2c.
Item Psal. 146. vñ. 147. vnd sonst vil mer.

Wa im newen Testament / des liechts
gedacht wirdt/da wirdt auch des spruchs
Jesaie gedacht/darauß es genommen ist/
wie es auch Zacharias des teuffers vater
deutet vol hailiges gaystes Lu. 1. vnd Chri
stus Mat. 5. vnd im Joanne/Lieben kind
lin wandelt/ dieweyl jr das liecht hapt 2c.
den liecht ist wider finsternuß / Am hellen
lichten tag/ist yederman frölicher vñ mü
tiger/ denn des nachtes/ darinne sich alle
welt fürchte vnd erschriekt / vnd die im fin
sternuß seind/begeren des tags mit grosse
sehnen/des nachtes meren sich alle krank
hait/die nacht ist niemands freünd / Es
kan sich des nachtes niemañts hütē noch
vmbsehē/Es ist alles schrecklich/ aber als
bald der tag anbricht/ so geet mit dem tag
vnd liecht der Sonnen/frewd vnd müt da
her/Man sihet sich vmb/ Ain yeder waißt

wa er ist/was er ist/was er thun vñ lassen
soll/also singet der.104. Psal. Du machest
finsternuß das nacht werde / da regen sich
alle wilde thier/ junge Löwen die da brül-
len nach dem raube / vnd ire speyse suchen
von Got/ weñ aber die Son auffgeet/ he-
ben sy sich dauon/ vnd legen sich in ire wo-
nung/ So geet den der mensch auß an sein
arbayt/ vnd an sein ackerwerck biß an den
abent/ Wie diß nun allenthalbē/ mit schre-
cken vnd mütt/ von tag vnd nacht/genō-
men vnd erfahren wirt eusserlich/ also wirt
es auch im gayst vnd gewissen empfunden
innerlich/ Wer im liecht / im Euāgelio ist
vnd wandert drinnen/ der sihet vnd kennet
Gott/darumb ist er frölich vñd fridlich/
glenbig vnd gerecht/Ro. 5. Kan geen vnd
wandeln/schaffen vnd arbaytē/ Psal. 104
Luce. 2. Auff das er erscheyne denen die da
sizen im finsternuß vnd schaten des tods/
vnd richte vnser füsse auff den weg des fry-
des/ Wer im finsternuß ist/ der sihet nichts
er ligt allain vñ wartet des tages / kompt
im der tag nitt / so muß er ewig verdampt
sein. Darüb vermant S. Paulus seine Rō-
mer vnd spricht/ Es ist zeyt/das wir von

schlaß auffsteen/die nacht ist vergangen/
der tag ist anbrochen. Item/Ir solt able-
gen die werck der finsternuß/das ist der na-
tur vñ ire lüste / vñ solt anziehen die werck
des liechts/das ist/die werck die der hailig
gayst in euch wircket vnd fordert.

Christus sagt offft im Euangelio / von
der straffe der vngleubigen / Matthei. 8.
Luce. 13. Bindet jm hende vnd füsse/ vnd
werffet in inn die eusserste Finsternuß / da
wirt sein/ waynen/ heulen/ vnd zeentlap-
pern/damit er abmalet den weg der Got-
losen/ Es ist aber genommen auß dem. 28
Deutero. Der Herz wirt dich schlagen mit
wansyn/blindthait vnd rasen des herten/
vñ wirst tappen im mittage/ wie ain blind-
der tappet im tuncfelen / vñ wirst auff dei-
nem wege nit fort kommen.

Die Sonn wen sy aufgeet/macht sy mit
irem liecht den tag/sy leuchtet allen mens-
chen/Sy gibt hyge vnd werme/macht re-
gen vnd bewegen/vnd durch die werme les-
bet vnd webet alles was auferden ist/Es
wechselt laub/grass/vyhe/ thiere/ visch/vö-
gel/vnnd ist eyttel leben/ wie man jarlich
sihet im lengen/ das alle ding new geboren

werden vnd von newes anfahe zu leben/
Die sonne wenn sy nydergeet / so nympt sy
das liecht hinweg vñ macht finsternuß vñ
nacht/darnach volget kelte/vnd zeentklap
pern/forcht vnd zittern/schlaß vñ verhül
len/kain macht/kain freude/ kain leben/
wie denn der winter anzaigt/ da alle ding
ligen/als weren sy tod/ bedeckt mit schnee
frost/ kelte/ vnd alle welt hatt zu schaffen
genüg/ das man sich vor dem Wintter er
were. Darumb wa Christus nit aufgeet in
vnsern hertzen / wie der morgen stern/ wie
Petrus sagt von der höhe/Luc. 1. So müß
sen wir des liechts/ des tags/ der werme/
der hitze/der wirkung/vnd des lebens be
raubet seyn / vnd müssen im finsternuß/ in
der nacht/im frost vnd kelte/ in der forcht
vnd schrecken/on leben vnd wirkung ewig
heulen/ zeen klappern vnnd ewig sterben/
dauor vns vnser Herigott behütten wölle.
Amen.

Welcher vns errettet hat vñ der
Oberkait der finsternuß/vnd hat
vns versetzt in das reych des suns
seiner liebe.

Bis hieher hat sich erstreckt der eingäg
den S. Paul⁹ macht zu den Coloffern/ auf
das er sy gewinne vñ freüntlich locke / das
sy dester hiziger sein bey dem Euāgelio zu
bleyben/ dieweyl sy sehen/ das Paulus das
Euāgelion so groß achtet/ rümet/ preysset
vnd mit bitt tag vñ nacht daran ist / Got
wölle in in/ vñ in aller welt/ diß erkenntnuß
erfüllen/ mit allerlay gaislicher weyßhait
vnd verstand. Nun wirt er forthin anza-
gen/ wer der sey / von dem er solchs begert
habe/ vnd rechenschafft geben seins glau-
bens/ wie vnd was er von Got vnd seinem
sun Jesu Christo halte/ vñ sagt/ Eben den
bitte ich für euch / der vnns mit so reychen
gnaden begabet vnd überschüttet hatt.

Zum ersten fasset er in ain kurze summa
Gottes des vatters/ vnd Jesu Christi wol
that/ darnach bleybt er auff der würde des
suns/ vnd rechnet die schezge die vns durch
in erworben seind.

Welcher vns errettet hat von der ober-
kait der finsternuß / vnd hat vns versetzet
in das Reych des suns seiner liebe/ Ist des
vatters ewiger wille. Hernacher wenn er
spricht/ An welche wir haben die erlösung

durch sein blüt/ nämlich/ die vergebung der
sünde/ rüret er kürzlich Jesu Christi gehor-
sam/ den er sein vatter gelaystet hat/ vnd
hefftet daran/ mit wenig wortten/ wie der
gehorsam geschē sey/ nemlich/ durch ster-
ben vnd blütuergiessen/ vnd wie in dem ge-
horsam vnser schuld bezalet/ vñ vergebung
der sünde auff alle menschen ererbet sey.

Das wörtlin von der Oberkait/ Exusia
hayset recht/ überhand vñd angeerbtes
landrecht vnd lehenrecht/ das ain Fürst
vnd Herre/ handthaben vnd schützen soll/
vnd jm das in kainen weg nemen lassen/
damit S. Paul' anzeigt/ wie wir im reych
der finsternuß/ als aygne leutte/ über die
teuffel der fürst der finsternus/ nach allem
recht vnd angeerbter obrigkait/ vnd lehen
zūgewalten hatt/ geborn seind. Nun wirt
Gotes gnade dadurch reychlich gemeret/
die so groß ist vnd starck/ vnd hat vns auß
diser gewalt der finsternuß/ entfūret/ vnd
in ainem andern lande/ ain rüwige wonūg
eingeben/ wie denn hie der text sagt/ vñd
hatt vns versetzet in das reych/ des Suns
seiner liebe.

Es seind hie zway ding/ das erste/ Erle-

bigung von dem gewalt der finsternuß/
Das ander / Die versetzung inn ain newes
reych/das er dem sun seiner liebe hat zuge-
richt/ Das versetzen/ Transference/ ist vom
kriegs brauch genommen/ den die Assirier
vnd Babilonier/ auch die Römer/ hielten
den brauch inn iren kriegem / das/ wenn sy
ain statt oder land gewonnen/so sagten sy
ire leute in das selbige land/vnd die einwo-
ner des lands/das sy einnahmen/füreten sy
in ire lender/den dadurch konten sy jr land
vnd reych/weyttern vnd außbrayten/ vnd
künd in nitt wider abfallen/ das hießen sy
denn/ *Deducere colonias*/ wie noch heütte
Cölln am Reyn den namen dauon hatt/
Also thet Salmanasar/König von Assy-
rien/Samaritan. 4. Reg. 17. vnd. 18. Na-
buchodonosor thet auch Juda vnd Israel
also. 4. Reg. 24.

Das hie steet/ In das reych des suns sei-
ner liebe / ist auff Ebraische weyse geredt/
vnd ist also vil/als das reich seins geliebte
suns/ Ro. 7. Wer will mich lösen/vō dem
leyb dises todes / das ist / dises sterblichen
leybes/vnnd wiewol es eben also vil ist/ so
ist doch die Ebraische art vil deutlicher/

denn wenn ich spreche/ in das reych seins ge-
liebten suns/ so verstee ich nit mer/ den das
Gott ainen sun hat/ den er lieb hatt/ Aber
wenn ich sage/ in das reych des suns seiner
liebe / so gibt sich der verstand vil reycher/
den er gilt also vil/ als Got hat ainen sun
in dem er aller welt gezeiget hat / wie lieb
er vns hat / in dem dz er dem sun ain reych
zu berayttet/ zu welchem wir alle sollen be-
ruffen vnd dain gesetzt werden.

Es ist auch eytel gnad wenn er sagt/ Der
vns versetzet hat/ da er vns erlöset hatt 2c.
Le wir kuntē wissen / das wir vnrecht wa-
ren/ vnd woneten im finsternuß/ da hat er
vns on vnser zūthūn / Ja da wir Gottes
feynde waren/ erlöset vñ versetzet 2c. Ro. 2
Da wir noch feynde warē/ da ist er für vns
gestorben Ioan. 3. Also hat Gott die welt
geliebet 2c.

An welchem wir haben die erlö-
sung durch sein blūt/ Nemlich/ die
vergebung der sūnde.

Erlösung/apolytrosis/hayßet/ wenn ye-
mandt ainen gefangnē mit gelt vom tode
löset vñ frey kauffet mit galgengelt / Also

Da wir gefangen lagen im schatten des to-
des/ vnd sollē yetz hangen/ da springet Je-
sus Christus darein/ vnd sagt zum Teuffel
vñ tode/ die seind schuldig/ aber laß sy loß/
vnd nym̃ mich an ire statt/ Vñ da vermai-
net der teuffel/ Er wölte Christū wie alle
andere menschen tödten vnd verschlingen
Da töret sich Jesus vmb vñnd durch boreet
im den bauch/ nympt im die scherpfte seyr-
ner zeen / vnd dem tode sein stachel / Also
seind wir nun erkauft / vnd der schuld loß
worden durch Christum/ der die schuld für
vns bezalt hat mit seinē leyb vnd blüt. Die
freyhait aber die wir überkommen haben/
durch die Summa gelts / durchs galgen
gelt/ ist vergebūg der sündē / Dises wercks
vnd lösung vō galgen/ machen in die Apo-
stel seer nütze/ vnd brauchen es oft. Ro. 3.
durch die erlösung (darlegūg des gelts für
das leben aller menschē) so durch Christon
geschehē ist. 1. Cor. 6. Ir seyt twer erkauft
1. Cor. 7. Ir seyt thewr erkauft/ werdet nit
knecht der menschen. 1. Pet. 1. Wisset/ das
ir nit mit vergenglichē silber oder gold er-
löset seyt/ von ewerem eyteln wandel (vom
reych der finsternuß) inn den vetterlichen

satzungen / sonder mitt dem thewren blüt
Christi.

Welcher ist das ebenbild des vnsichtbaren Gottes.

Wie nympt im S. Paulus raum / vñ ma-
chet ain außflucht / auf dz er des hailands
vnd vnsers seligen galgen löfers / werde vñ
herligkeit möge wol außstreckē / Es weret
aber dise außflucht biß auff die wort (An
seinē creütz durch sich selbs) S. pauls / fast
dise reycher rede in dreyen stucken. Die erste.
Christus ist des vnsichtbarn Gottes sicht-
ger vnd lebendiger Contrafey / vnd der erst
geborne vor allen creaturen / den durch in /
vnd zū in / das ist vmb seinet willen / seind
alle ding geschaffen / vñ besteen alle in in.
Zum andern / Christus ist dz haupt der ge-
main / vñ alda beweyset sich das erst stuck
Das dritte / Es war also Gottes wolge-
fallen / das wir also solten in ainem leybe
durch Christum versünnet mit Gott / fryde
haben mit allen dingen / die durch Christū
zū Christo / in dem sy auch besteen / erschaf-
fen seind.

Es steet geschriben Ioan. 1. Niemandt

hat ye Gott gesehen / vnd Exodi. 33. sagt
Got zu Mose / der in sehen wolte. Es wirt
mich kein mensch sehen vñ leben bleyben.
Darumb war es auch gemain im alten Te
stament / das sy auff die angesicht fielen/
wen sy ainen Engel sahen / vnd maintien/
sy müsten sterben / Judicū. 13. Wir werden
des todes sterben / den wir haben den Her
ren gesehen / Exodi. 19. Da Got das gesetz
gab / vnd redete mit dem volcke / kunden sy
die stymme Gots nit erleyden / vnd batten
Mosen / das er mit in redete / darumb kan
Gottes stercke vnd macht nyemandts er
leydē / Er ist zu groß / zu herlich / vol maies
stet vnd ewigkait / welche menschliche na
tur vnd gebrechligkait nitt erdulden mag /
wenn sy Gott sihet.

Wie reymet es sich aber / das Math. 5.
steet / Selig seind die ains raynen hertzen
seind / den sy werden Got sehen. Item das
Jacob sagt / Ich habe den herrē gesehen vñ
angesicht zu angesicht ? Diser hat in gese
hen vnd die von reinē hertzen seind / werdē
in sehen / vnd er sagt doch selbs zu Mose /
werde in yemant sehen / der müsse sterben ?
Antwort / Christus deutet es Joannis. 1

Warlich/ warlich/ ich sage euch/ von nun
an/ werdet ir den himel offen sehen/ vñ die
Engel Gottes auff vnd nider steygen/ auf
des menschen sun. Item zñ Philippo/ Phi
lippe wer mich sihet/ der sihet meinē vater
Also habē got alle Erzueter vñ Prophetē
gesehen. 1. Cor. 10. Nach des glaubens aus
ge/ das dahin sihet/ wa Gott hin sihet/ S.
Pauls sagt Ephe. 1. Wir seind durch Chris
tum erwölet / ee den der welt grund geles
get ward 1c. Den Christus hieng schon am
Creütz vor Gottes augen/ vnd war gestor
ben/ erstanden/ gen hymel gefaren/ vñ saß
zur rechten hand Gottes/ ee denn die welt
geschaffen ward. Aber vor der welt augen
ist es geschehen vnter Poncio Pilato / Da
hin richtet der glaube sein gesicht / vnd die
Prophetē sehē den tag Christi vor der welt
augen zñkünfftig/ in irem hertze das er ge
schehen sey/ Ioan. 8. Abraham hat meinē
tag gesehen / vnd hatt sich sein gefrewet/
Da Got sagte zñ Adam vnd vñ Heua/ der
schlangen / des weybes samen soll dir den
kopff zertretten 1c. Da war schon vor Got
tes augen dem alten schlangē / durch Chri
stum der kopff zertretten/ Den wa das nit

geschehen were/ so wer Adam vom schlan-
gen ertödtet worden. Christus sterben vnd
blüt war schon angangen/vnd wirckte/dz
Adam kund hoffen vñ trawen/Gottes ge-
genwertigkeit leidē vnd tragē/dz im sonst
nach der sünde vnmöglich gewesen were.

Warzū war es den von nöten/das Chri-
stus auch leyplich stürbe? Antwort/Gott
hat sich alwege sehē vnd hörē lassen/durch
Engel Gal. 3. Dadurch er das geseze gebē
vnd alle ding außgericht hatt/vnd wolt
dasselbige zū seiner zeyt/ auch durch seinen
ainigen sun thūn/auff das die gewissen de-
ster frölicher sich künnten auff Got verlas-
sen/Den wēn man hörēt/ Es hat ain En-
gel gesagt/Ain prophete hatt es gesagt/es
ist ain groß ding/ Aber wēn man hörēt/dz
es der sun des vatters sagt/der des vaters
willen waist vnd syñ/ So ist das gewissen
gefangen vñ muß glaubē/ es sey alles war
was es von Got hörēt/Darumb steet Jo. 1
Der aingeborne der in des vatters schosse
ist/der hatt vns verkündiget/erkläret vnd
verdolmetschet/Hebre. 1. Got hat vor zey-
ten geredt mancherlay weyse / zū den vet-
tern/ durch die Propheten/ Aber yetzt am

letsten hat er geredet in disen tagen durch
den sun 2c.

Also hat Got Chriſtū geſetzt zum leben
digen konterſay vnn̄d ebenbilde ſein ſelbs/
das/wer Got ſehen vnd hören will/der ſe-
he vnd höre Chriſtum / Also ſagt Chriſtus
ſelbs / Der ſun thūt nichts vō jm ſelbs/son-
der er thūt alles was er ſihet/das der vater
thūt/ Paulus ſagt zun Ebreern/ Chri-
ſtus ſey ain widerglantz des vatters / den̄
in jm widerglaſt des Vaters hertze vñ ſyn-
ne. Wir konten nit wiſſen / was Got gegē
vns geſynnet were / darumb kompt Chri-
ſtus auff erden / macht todten lebendig/
lamen geen/blindē ſehen / tröſtet die troſt-
loſen/ dienet/ hilfft/ haylet/ vnn̄d nympt
ſich vnſer armūt also hart an / als were ſy
ſein aygen/ waynet über Jeruſalē vnd La-
ſarum / erbarmet ſich über das volck / Er
ſpeyſet vnd nōret ſy an leyb vñ ſeel/laſt nie-
mandt vngetröſt von jm kōmen / vnd inn
dem das er das thūt/ ſo ſagt er/ Es ſey nit
ſein / ſonder ſeins Vatters werck/ das wir
gewiß ſein ſollen/ wie Chriſtus da thūt vor
vnſern augen / also ſey auch Got gegē vns
geſinnet/ vnd das liebſte vnd beſte anzay-

gen/ vnd in dem glantz in Christo/ wie ain
helles liecht/ der wille Gottes.

In Christus todt vnnnd sterben erglast
vnd scheynt/ wie auch Got an vnserer ver
dampften sündtlichen natur/ kein mißfal
len habē will/ in dem das er jm seins lons/
vermaledeyung/ tod/ helle/ zagen/ fürcht/
vnd schwachhait/ wolgefallen laßt/ Zum
gewissen zaichen/ er wölle vns vmb des ge
horsams willen seins suns/ gnade vñ gunst
erzaygen.

Der erstgebome vor allē creaturē.

Die stücke von der Gotthait Christi/ trei
bet Joannes im ersten capitel/ vnd haisset
darumb der erstgebome vor allen creaturē
dieweyl er Got ist/ vñ alle creaturen seind
durch in geboren/ vnd er ist kein Creatur/
den alles was da ist/ das ist aintweder got
oder creatur/ schöpfer od geschaffen ding/
dieweyl nun Christus der erstgebome ist/
lange zūvor ee die creatur wurden / So ist
er kein creatur/ So ist er Got/ So ist er nit
geschaffen/ So ist er schöpffer/ Er hencket
aber diß stücklein feyn an das vorige / vnd
verknüpfes mitainander/ Christus ist der

widerglast des vaters / vñ des vaters eben
bild / laßt sich auff erden sehen vnd hören /
vñ eben derselbige ist gleich wol gottes sun
durch den alle creatur haben angefangen.

Ein tröstlich wortt ist es / das Christus
in allen creaturen der erstgeborne ist / vnd
darfür gerümet will werden / Denn darin
ligt der reychthumb des Euāgelij / das ers
mit für sich allain sey / sonder den Creatur
zū güt / die im nachfolget / vnd zū gleichem
erbe der Göttlichen natur kōmen soll / wie
im andern stück volgen wirt.

Den durch in ist alles geschaffen
das im hymel vnd auf erden ist / das
sichtbare vñnd das vsichtbare / es
seyen die thronen oder herschafften
oder Fürstenthumben / oder ober-
kaiten / Es ist alles durch in vnd zū
im geschaffen / vnd er ist vor allen /
vnd es bestehet alles in im.

Das ist die vsach des vouigen. Sehet
aber zū / wie reiche wort das seind / Alle cre
aturen / sichtbar vnd vsichtbar / hymel /
erde / Engel / seind alle durch in / zū im / auf

Das sy in jm besteen/ geschaffen/ vnd ist al
so vil gesagt / Durchs wortt seind wir alle
erschaffen/ im wort waren wir ee wir wur
den/ Im wort werden wir erhaltē/ dieweil
wir seind/ im wort werden wir erhaltē wer
den/ wenn wir nun nymer seind/ das ist vn
ser ankunfft/ das ist vnser ende/ das ist vn
ser mittel / Vnd hie ist bestettiget der erste
articfel des glaubens/ Ich glaube an Got
der mir helffen kan / ainen Vatter / der es
thun will/ zu des erbe vnd kindtschafft ich
auß gnaden durchs wort geboren bin/ Ai
nen schöpffer/ hymels vnd der erden/ das
er zuuor beweyset hat/ das er helfen künde
vnd wölle/ in dem da er hymel vnnnd erden
erschaffen hat/ den ich bekenne/ das ich in
wort bin wordē/ da ich nit war/ vnd werde
im wort erhalten/ dieweylich bin vnd lebe
auffer erden/ vnd sehe den himel/ vnd werde
wider in das wort hinein faren / wenn ich
aufhöre zu lebē/ vnd kan den hymel nymer
sehen/ vnd muß alle creaturen verlassen.

Vnd er ist das haupt des leybs/
Nemlich / der gemaine.

Hoch holet S. Paulus dise leere/ vñ legō

sy doch sänfft nyder. Im ersten stück der außflucht/macht er Christū zum haupt aller creatur. Zie macht er in zum haupt der creaturē / die er sonderlich vor andern auß zeücht vnd erwölet/nämlich/ die er berüft zum reych / in welchem Gott sein liebe erzaiget/welchs reych so nahe ist/vnd angenehme/das es sein leyb sein soll.

Wa ain haupt ist/da fließen zwü tugēt fürnemlich auß dem haupt durch seine aderen in den leyb/Sensus et motus/Das der mensch empfindet/vnd sich bewegen kan. Also fließen von Christo dem haupt in den leyb/das empfinden des Götlichen wolgefallen an vns/darnach das leben vnd weben/sterck/trost/rum/fride/vnd frucht in gūten werckē/ Wa nu Christus das haupt ist/da seind dise gūtter alle/Herwiderumb wa Christus das haupt nit ist / da ist kein leben/da ist kein zūversicht zū Got als ainem Vatter.

Welcher ist der anfang vñ der erst geborner von den todten / auff das er in allē dingen den fürgang habe
Das ist die glose vnd deütung/ wie Chri

stus ain haupt sey der gemain/ Christus ist
allen Creaturen der erstgeborner/ vnd alle
creaturen seind durch in geboren/ Es were
aber die erste geburt der Creaturen verge-
bens vnd vnnütze/ wa die widergeburt nit
volgete. Darüß wie droben gesagt ist/ das
alle creatur zû jm/ das ist/ vmb seiner eere
willen/ die er an in haben will / vnd durch
in geschaffen seind/ Also ist er das lebē der
creatur/ natürlich vnd eusserlich. Zum er-
sten/ vnd das leben der Creaturē seiner her-
ligkait / gaystlich / über natürlich vnd in-
nerlich/ Zum anders / Die erste geburt der
Creaturen ist so weyt von dem der sy gebo-
ren hat/ Got/ das sy in nimmermer erlan-
gen mag / noch zû jm kommen / so wenig
als der thon/ vnd topff der töpffer werden
mag/ Die widergeburt aber/ ist dem schöp-
fer also nahe Gott/ das sy sich in Gott be-
flaydet / der ersten geburt mit Christo ain
Herze wirt/ vnd wirt taylhafftig/ ja erfül-
let mit alle den gütern die Gott selbs hat/
vnd ain ding mit Gott. Die Erste geburt/
hört gen helle. Die Ander geburt regieret
über die helle/ vnd sitzt zur rechten Gottes
durch Christum / Der. 139. psalm sagt/

von der ersten geburt / vnd andern geburt
Den du hast meine nyerē in deiner gewalt
du warest über mir in mütter leib / Es war
dir mein gebayn nit verholen / da ich haim
lich gemachte ward / da ich gebildet ward
vnden in der erde / Das ist die erste geburt /
vnd vnser aller ankunfft. Vnser mütter leib
vnd die tyeffe der erden / das ist nach Ebra
ischer weyse / auch vnser mütter bauch / dar
inne wir verborgē / gemacht vnd zügericht
werden / dise geburt geschicht von vnten
auff. Von der andern geburt sagt er also /
Ich dancke dir drüber / das ich so wunder
lich gemacht bin / wunderbarlich seind deine
werck / vñ das erkennet mein seel fast wol.
Item / Wie kostlich sein vor mir deine ge
dancken. Item / wen ich auffwache / so bin
ich nach bey dir / dise geburt ist vō oben her
ab. Christus sagt Jo. 3. Was vom flaisch
geborn ist / das ist flaisch / Vnd was vom
gayst geborn wirdt / das ist gayst. Die erde
ist ain yrdisch Elemēt / vnd macht jrdisch
alles was vō jr geborn wirt / Der wind vñ
die lufft ist ain himlisch Elemēt / vnd ma
chet himlisch alles was in jr geboren wirt.
Der mensch vñ jrdische thiere / können sich

nit erheben von der erden / das sy fliegen/
Aber die vögel seind hymelische thyerlein/
vnd künden sich von der erden erheben vñ
fliegen. Zu dem/ Soll die erden fruchtbar
werden vnd etwas newes geberen/so muß
sy durchs wasser/regen vnd thaw geseuch-
tet werde/sonst kan sy kein frucht bringen.
Also kan der mensch von der erden nit kö-
men/vnd gaystlich werden/Er werde deñ
durchs wasser vnd gaisst von newē geborn.

Wie nun die widergeburth durchs wasser
vnd gayst zügehe / sagt Christus hernach
weyter/ Vnd niemant fört gen hymel / deñ
der vō hymel hernyber kömen ist/nämlich
des menschen sun/der im hymel ist/vñ wie
Moses in der wüsten ain schlangen erhö-
het/also muß des mensche sun erhöhet wer-
den/auff das alle die an in glaubē/nit ver-
loren werden/sonder das ewig leben habē.
Die widergeburth geschicht durch Christū/
der in die erde gefallen ist/vnd vor den flay-
schlichen augen verdorben / das wasser ist
über in hergangen / vnd hatt in getödtet/
wie er auch selbs sagt/Joā. 12. Es sey deñ
das das Waygentörnlin in die erde falle/
vnd ersterbe/so bleibts allain. Wa es aber

erstyrbt / so bringet es vil frucht . Auß der
tödtung Christi / vnd vermischung der er-
den vnd wassers / macht der hailige gayst
das leben vnd aufferstehung / Vnd also fas-
ret Christus herunter vō hymel in die tyef-
fe / vnd wirckt durch den gaisst / das die erde
vnd wasser / welche Element nichts denn
tödtten künden vnd verderben / hailig vnd
selig werden / vnd müssen zum leben dienē.
Die erste geburt helt es darfür / wen sy lebe
übersich steyge / güt gemacht vñ eere habe /
so sey sy rechtgeschaffen. Die ander geburt
wayßt es fürwar / das / wer sein leben lieb
hatt / der wirdt es verlieren / Lieben hayßt
aber / alles was ain mensch auff erden zu
vnterhaltung seins lebens haben kan vnd
müß / eere / güt / gesund ꝛc. Vnd wer sein le-
ben auff diser welt hasset / der wirdt es er-
halten zum ewigen leben.

So seind nun widerainander / Erde vñ
flaisch / himel vñ gayst / erde vñ flaisch mit
irer geburt sagen / wem es wol geet hie auf
erden / der wirt lebē / Hymel vnd gayst / mit
der widergeburt sagen / Wem es hie übel
gehet auff erden / vñnd der da stirbet / der
wirt ewig leben / vnd wem es hic wol geet

vnd lebet auff erden/ der wirt ewig sterbē.

Auff die weyse füret Christus todt vnn̄d sterben Paulus Ephe. 4. Da er spricht/ Er ist auffgefaren in die höhe/ vnd hat gefangen gefürt das gefengtnuß/ vnd hatt den menschen gaben geben/ Das er aber auffgefaren ist/ was ist's: den̄ das er zū erst ist hinunter gefarē/ in die vntersten örter der erden/ Der hinunter gefaren ist/ das ist der selb/ der auffgefaren ist/ über alle hymel/ auff das ers alles erfüllet.

Auß dem wirt nu klar/ wie Christus der erstgeborne ist vō den todten/ Er ist nach der ersten geburt geborn zum leben/ den̄ in ihm haben alle Creatur angefangen zū leben/ Das ist/ die Gotthait Christi. Nach der andern geburt ist er geboren zum tode/ Das ist die menschaīt Christi/ Dieweil aber dise andere geburt geschicht/ vmb des willens/ das die erste erkläret/ vñ Got bekānt gemacht werde aller wellt/ vor der augen Christus stirbt vnd verdirbt/ So muß sich die erste geburt der gothait/ in Dauids sun̄der da stirbet/ ereugen vnd sehen lassen/ vñ Christum widerumb führen zū seynem vrsprung/ vom tode erwecken vnn̄d lebendig

machen. Herwiderumb/ so lernē wir auch
hierauß/wie die gemain/vnd der leyb Chri
sti/diser zwayer geburt taylhastig werde/
vnd sich recht darein schicke. Wir seind
nach der ersten geburt/ geboren zum tode/
den der tod hat sein gewalt geyebet in allē
menschen/jung vnd alt/ Rom. 5. Vmb der
sünde willen/vnd der tod solt ewig weren/
Nach der andern geburt seind wir geboren
zum ewigen leben / Vnd Christus erste ge
burt zum leben/das in jm / als ain Gott/
ewig ist/wirft sein ander geburt in den zeyt
lichen tod / vnd macht vnser erste geburt
zum tode/der da ewig war/durch sein an
dere geburt / zum ewigen leben / Also das
sein andere geburt im zeytlichen todt/vn
serer ersten geburt vñ ewigen tod hinnehme
Vnd macht auß der ersten vnser geburt zū
ewigen tode / durch sein andere geburt / zū
zeytlichē tode/vnser andere geburt/zū sei
ner ersten geburt/zum ewigen leben / Auß
zeytlich ewig/ auß ewig zeytlich/ auß todt
leben/ auß leben tod. So hat er den vorzug
im leben vnd sterben / im sterben zeytlich/
damit er der gemaine ewiges sterben zeyt
lich vnd vnschedlich mache/im lebē ewig/

Damit er der gemaine zeytlichs leben/ ewiges leben mache/ vnd also auf allen seyten nichts sey in der gemain den gnediges sterben/ vnd gnediges leben/ auß gnaden Jesu Christi/ der sy darzû berufft/ vnd mit seinẽ blût rayniget/ das sy sey auß gnadē/ das er ist von natur/ Gottes kind vnd erbe.

Summa.

- 1 Christus lebt von ewigkait zû ewigkait vnd kan nymmermer sterben.
- 2 Alle Adams kinder heben an zeytlich zûleben/ durch Christus ewiges leben/ das ist/ durch Christus Gotthait/ vnd sollen ewig sterben.
- 3 Darumb starb Christus / in Davids so men / mit angenomener menschlicher Natur/ zeytlich/ ain mal.
- 4 Auff das er durch seinẽ zeytlichen tod/ vnd ewiges leben / vnsern ewigen tod/ zum zeytlichẽ tod/ vnd vnser zeytliches leben/ zum ewigen leben machte.

¶ Christus stirbt zeytlich / Lebt ewig. Adams kinder/ Leben zeytlich/ sterbẽ ewig Gottes Kinder in der gemaine/ Hören das umb. Ir erste geburt auß Adam / solte leben zeytlich/ sterben ewig. So stirbt Chris

stus für sy zeytlich ain mal/vnd lebet ewig
Auff das er sey der erste/im zeytlichen ster-
ben vnd ewigem leben / Vnd sein gemaine
sey die annder/Im zeytlichen sterben/vnd
ewigen leben. Vnd jr leben zeytlich/vnnd
sterben ewig / Werde leben ewig / sterben
zeytlich.

Das sagt Paulus Roma. 6. Wir wissen
das Christus von den todten erwecket/hin
für nit stirbt / der tod wirt hinfür über jm
nit herschen/ Den das er gestorben ist/das
ist er der sünden gestorben/zū ainem mal/
das er aber lebet / das lebet er Gott / Also
auch jr 2c. 1. Corin. 15. Wie sy in Adam alle
sterben/also werden sy in Christo alle lebē.
Ephē. 5. Er hat sich selbs für die gemaine
gegeben/auff das er sy hailiget/vnd hat sy
gerayniget durch das wasserbad im wort/
auff das er jm darstellte/ain herliche ge-
maine / die nicht habe ainen flecken oder
runzel 2c.

Den es ist das wolgefallen gewes-
sen/das in jm alle fülle wonen solte/
vnd alles durch jm versyenet wurde
zū jm selbs/ es sey auferden oder im

hymel / damit / das er fryde macht
durch das blütt an seynem Creütz/
durch sich selbs.

Das dritte stück der außflucht / wirfft di
se bayde geburt / dadurch die gemaine ge
rayniget vnd auß gnaden zügericht wirt/
auff Gottes wolgefallen / wie auch Chri
stus die gemaine tröstet / Luce. 12. Fürcht
dir nit du klaine herde / den es hat also ewe
rem vater wolgefallē / das er euch dz reych
gebe / Also auch hie / Es hat Gott wolge
fallen / das in Christo alle fülle wone.

Wonen ist ain reych volles wort / das in
im vil begreyfft / denn wa ain wonung ist /
da ist zum ersten ain hauß / ain haußvater
ain haußmüter / kinder / mägde / knechte /
ain vyhezucht / kuchē / keller / korn / mel / bier
weyn / klaiden / außtaylung / vnd alles was
ain mensch bedarff / Also will Got in Chri
sto haußhalten / speysen / trencken / klays
den / Wer für des hauses thür kompt / das
es kainen menschen / weder an leybe noch
seele mangeln soll / der etwas von Christo
begeret / Das deßitten die parabeln / wenn
Christus sagt / Das hymelreych ist gleych

ainem Künige / der seinem Sun hochzeyt
macht 2c. Lu. 14. Den das Euangelion vō
Christo ist ain reych mal / das vil leut spey
set / vnd frölich macht / wie sichs zur hoch
zeyt gebürt / Darzū so haist die schrifft Chri
stum ain Osterlemlin / ain gemests kelblin
ain weynstock / ain brütgam 2c. Das man
ja wisse / Christus habe ain haushaltung /
vnd alle fülle wone in jm / Desigleychen be
deütten das die andern Parabeln / vō den
tollen Juncfrawen vñ klügen / die in iren
Lampen öl tragē in Christus hauß. Item
da man pfund austaylet zur handthierüg
vnd narung. Item da man rechenschafft
sigt mit den knechtē. Item mit den arbay
tern im weyngarten / welchs alles gehöret
zū ainm haußvater / der weyb vñ kind nören
muß / handthieren / äcker vnd weynberge
bawen 2c. Ephe. 4. Ir menner liebet ewere
weyber / wie Christus sein gemaine 2c.

Das versünen vnd der fryde / dauon hie
geredt wirdt / gehe also zū / in aller welt ist
hunger vnd kummer / durst vnd frost / wie
doben gesagt ist / So ist im reych des suns
der liebe Gottes / alle fülle vñnd genüge /
speyse vñ tranck / vnd alle notdurfft. Soll

aber diß offenbar werden / so muß manns
predigen/ die Apostel vñ prediger empfiengen
ainen solchen befehl/ Geet hin in alle
welt/ vnd prediget das Euangelion allen
creaturen/ Es wirt allen creaturen gepre-
diget/ alle creatur höre es/ alle creatur wer-
den getröstet/ vñ erkennen ir ankunfft/ vñ
warzû sy erschaffen seind/ vnd gilt hie nitt
die glose/ die Gregorius geben hat/ das al-
len creaturen haïsse/ allen menschen/ Den
sy reücht nach Aristotele/ der da sagt/ das
der mēsch fast alle creatur sey/ Es ist aber
vil mer die mainung/ dauon wir zûuor ge-
redt haben/ vnser ersten geburt halben/ In
aller welt ist sünde/ vñ wie die sünd durch
das gesetz erkant wirt/ da ist ain böses ge-
wissen / Wa aber ain böß gewissen ist / da
ist schrecken/ forcht vnd zittern vor Gott/
vnd allem dem/ das von Gott herkompt/
das ist/ vor allen creature. Wir wollen des
ain Exempel nemen in den groben eusser-
lichen sünden/ den in den innerlichē/ gayst-
lichen stücken/ laßt sichs nit also wol sehē
wiewoles in der warhait vil grösser vñnd
erger ist / wie wirs am gerichtstage sehen
werden/ als inn disen groben stücken/ Ain

mörder wenn er den todtschlag begangen
hat / findt niendert kain rüw / vñ wa er im
gemach sitzt vnd ain bret knackt / oder ain
mauß sich reget / so fürcht er im / vnd alle
creatur schrecken in / wa er sieht das zway
oder drey reden / so maint er / sy wissen sein
that / vnd wolt das es zügedeckt vnd ver-
schwigen blybe / vnd nyemandt wüßte es /
also fleucht er das liecht / vñ darff nye-
mannt frölich vnd recht ansehen / Dem ge-
ben auch die Haydē auß erfärug zeügnuß
vnd sagē / Ir Pluto der habe ain pferd dar
aufer reytet / das hayst zum Halastor / das
gewissen / das die leut ir macht / vnd kain
rüw laßt / Vnd Conscientia mille testes /
wen das gewissen wider ain menschē steet
so zeüget es stercker / denn tausent andere /
Des setzen sy zum exempel / den Orestem /
der sein mütter Clitemnestrā / welche mit
hilffe des Egesti / iren eigē man Agamem-
non / Oresti vater erwirgete / widerumb
erschlug / Den also bald nach der that / ge-
daucht in / wa er war / da volgete im seiner
müter seele nach / mit brinnenden fackeln /
vnd jr har wāren eyttel schlangē / vnd auß
solcher forcht vor seiner mütter / da im sein

gewissen sagte/er hete vnrecht thon/ward
er vn Sinnig vñ thöricht/Summa darnach
ains yegklichen gewissen ist / darnach ist
er frölich vnd traurig/Consciamens recti/
vt cuique est / ita concipit intra. Pectora
pro facto / spemque metumque suo.

Dieweil aber dz gewissen vnfride macht
vnd forcht vor allen Creaturen / auch wie
Moses sagt/vor aim rauschendē blat. Ich
schweyge vor Gottes gericht vnd zorniger
straffe/So müßte das Euāgelion/die pre
dige von Christo/ dem gewissen/ das seine
sünde vnd gebrechen füelete/ vnd höchlich
daruon beschwert war/gnade vñ fride ver
kündigen/ Erstlich von Got/ darnach vñ
allen Creaturen/ Ja es verkündiget allen
creaturen/ dem rauschendē blat/ dem bret
das da knackt/vnd allem was auf erden le
bet / Syhe mir auff den menschen der mir
glaubet vñ Got durch Christū den ich pre
dige/ vnd schöne sein / Er soll nun fort hin
fryde habē/mit euch allen/auch mit Gott
selbst / Darzū wa er auß schwachait fallē
wurde/ so laufft alle zū vnd helfft jm seine
sünde vnd schande zūdeckē/vnd verhehlen
Den ewer schöpffer will sy auch zūdeckē/

vnd nit sehen noch für sünde rechnen / Also
wirt den der spruch erfüllet / Gehet hin in
alle welt / vnd prediget das Euāgelion al
len creaturen / das bringet auch das wort
mit Eirinopeiſas / das da haisset / Sinte
mal alles das zu fryden gestellet ist / das
im hymel vnd auff erden ist.

Vnd eben wie das Euangelion fryd ver
kündiget / denen die da glauben / also wirt
es auch den zorn Gottes vnd aller creatur
eröffnen / denen die nit glauben / denn das
Euangelion richtet niemands / Aber es er
öffnet das gericht / Jo. 12. Wer mein wort
höret / vnd glaubt nit / den werde ich nit ri
chten 2c. Wer mich veracht vñ nympt mey
ne wort nit auff / der hat schon der in rich
tet / Das wort welchs ich geredt habe / das
wirt in richten am Jungsten tag / das ist /
Es wirt im das gericht vnd Gottes zorn
eröffnen. Zu ainem vnglaubigen der sorge
hatt / Gott werde in nit nören / vnd müsse
hungers sterben / wa er nit geyzt / vnd an
der leut mit wücher vnd finanzen betreu
get / weñ er auff seinen acker / weynberg vñ
garten geet / spricht / Das graß / Korn / wein
stock / apffel vñ byrn / Lieber mensch trawe

vnserm Gott/betreüg vnd verfortayl nie-
mant. Sihe/hie wachse ich daher ein grass
deinem vyhe zum fütter / Ich gibe dir auß
ainem kornlin für ain korn hundert kainer
Ich apffel vnd byrn / sage dir von Got vn-
serm schöpffer zū / das also war ich auff di-
sem baume stee/ also warhafftig will dich
Gott ernöre. Ich weynrebe/so wunderlich
als ich auß dem stocke wasser gebe/vñ das
wasser gleychwol in weyn verwädel wirt
warhafftig will dich Got nit lassen/traw
im nur. Die wasser vnd brunquel sagē/ So
warhafftig du sihest / das wir auß den ber-
gen vnd felsen / oder hohen staintlüfften/
auß ainem trucknen herauß quellen/vñnd
wasser gebē/also warhafftig will dich Got
nit lassen/in allem deinem anligen / eüsser-
lich vnd innerlich/ im leyden vnd sterben/
Vnd wie ich hie rede von angezaigten stü-
cken/Also soll man in disem fall reden von
allen Creaturē/Sonne/Mon/Stern/vi-
sche/vögeln/schaffen/ochsen vñ küwen ꝛc.
Auß welchen stücken die Gottseligen auch
iren glauben stercken vnd bessern/Wie ich
doben gesagt habe/von dem wercke Got-
tes/glauben/auß Ioan. 6. Welchs allain

das rechtschaffne werck Gottes ist/das alle andere werck hailig vñ selig macht/daran sy auch fryde vnd freude haben.

Diemeyl aber der geyzig vnd vngleubig fürüber geet/ Vnd wenn er zehen füder hewgras/ Korn/ weyn/ epffel/byrn/überkömet auß Gottes gnaden/so wolt er lieber ains yeden zwainzig füder haben / danckt auch Gott mit ain mal dafür / sonder schreybet es alles seinem fleyß/mühe vnd arbeit zu/ So werden die creaturen am jüngsten tag disen geyzigen verdämen/ vnd das Euangelion wirt auß Gottes befehlch/im das gericht vnd Gottes zorn/ den er vñ seins vnglaubens willen verwirckt hat / eröffnen/ vnd im anzaigen wie vor langst das vitail über in gangen sey/das er nun noch nymer mer weder mit Gott/ noch kainer creatur fryde haben soll. Vnd wie alle creatur am Jüngsten tag irem schöpffer zu eeren/ den gläubigen werden helffen ire sünde vñnd schande decken vñnd entschuldigen / Also werden hie alle Creatur/den vngläubigen helffen ire sünde vnd schande auffdecken/ Der apffel der vor seiner thür auff seynem baum vnd garten gestanden ist/ wirt sage

Sihestu/ Ich habe dich gewarnet/ du hast
nit volgen wollen/ habe vnfynde/ denn du
woltest nye fryde haben/ Also auch alle an
dere creaturen ic. Wie schrocklich aber das
sein wirt/ das kan kein hertze begreyffen/
wie auch nit der seligen freude. 1. Corin. 2.
Vnd wenn es disen schrecken begreyffen mö
chte/ so müste es doch von stundan sterbē
Die Propheten zaigens zum tail an/ Wenn
sy des Herren tag beschreyben/ in welchem
er zum vntayl vnd zur straff kōmen wirdt/
Das sy sagen werden/ O see. 10. O jr berge
fallet auff vns/ vnd jr bühel bedeckt vns/
wie es auch Christus verkündiget von den
Juden/ Luce. 23.

Was aber der fryde sey/ den Christus ge
macht hat/ durch das blūt an seinē Creütz
durch sich selbs/ wollen wir dahinden sa
gen/ wenn wir auff den herlichen Triumph
vnd hörprangen Christi kōmen.

Vnd euch/ die jr weyland ent
frembdet vnd feynde waret/ durch
die vernunft in bösen wercken/ Tu
aber hatt er euch versōnet mit dem

leibe seines flaisches durch den tod/
auff das er euch darstellte hailig vñ
vnstreflich vñ on tadel vor jm selbs

Hie fñrt S. Paulus auf die Colosser son-
derlich/das zñuor in ainer gemain/von al-
len menschen gesagt hat/vnd sagt/ Es sey
jn auch gleychermaßen widerfaren/ vñnd
werde jn weyter widerfarē/ nāmlich/ das
sy auch etwas vmb des Euangelions wil-
len mit frewden leyden können / Endtlich
aber will er einfñren / ain solchen schluß/
Sintemal jr also grosse gnade empfangen
hapt / so thñt vnserm Herzogot herwiderñb
die eere/vnd lasset euch darñon nit fñren/
weder durch Engel gesicht / noch durch
menschen satzunge vnd Philosophēy/nach
durch ainerlay geseze vnd gñte werck.

Es ist ain grosse gewalt in disem Text/
wider den freyen willen/vnd die werckhai-
ligē/ Das hie beschlossen wirt/ das die sñn-
de der gedanken vñ vernunft nichts ver-
mñge den sñndigen / von Gott abfñren/
entpfrembden/vnd Gottes feynde machē
Wer da will der straffe es.

Er preysset aber Gottes gnade / durch

Christum/das sy Got in der feyndtschafft
im zů freünde gemacht hat/mit dem leibe
des flaischs/vnd seins suns todes/welchs
zůvor weytleüfftig ist außgelegt/Darumb
will ichs hie nit widerholen.

Mit dreyen worten legt er auß die gna-
de die in widerfaren ist. Das erst/das er
euch darstelllet hailig/das ist/das sonst
niemandts an euch etwas habe den Gott
allain/Den hailig haysset auff die Ebrai-
sche weyse/das dem weltlichen entgegen
ist/Wie Lucas der Euangelist auß dem
Mose anzaigt/Alle mänlin sollē dem Her-
ren hailig genant werden/das ist/zůgeay-
gent/vnd von dem weltlichē brauch/abge-
sündert/das es also vil gesagt sey/als/Auf
das er euch darstellte hailig/das ist/das
er euch zum hailigthūb machte. Das an-
der wort haist/vnstreflich/also das weder
Gott/Engel/oder menschen/noch kein
Creatur/dise hailigkeit/die auß dem glau-
ben kompt/tadeln kan an euch/Wen sy es
auch schon auß das genaweste suchen/wie
denn die schrift Gottes gerechtigkeit/da-
durch wir gerechtfertiget werden/die ge-
rechtigkeit nennet/welche Got auch selbs

nicht straffet noch tadel.

Das dritte wort hayst Anegetitus / On
tadel / das betrifft den eusserlichen wans
del vnd gemainschafft vnter den leutten /
Also das man kein offentliche schand auf
sy bringen kan / als Lebruch / todtschlag /
dieberey / oder etwas das offentlich sünde
ist / Vnd das diß ja also verstanden werde
das es das gewissen vnd hertz belange / so
thut er hinzu / vor seinem angesichte / nitt
vor der welt angesichte / die euch villeycht
wirt für vnheilig / strefflich / vnnd sünd
er achten / denn diß ist allain zum trost vnnd
stercke der Christen geschriben / wider die
Hayden vnd die welt / Petrus sagt / Ain
Christen solle nit leyden wie ain dieb vnnd
morder / sonder wenn man in will straffen
so soll man in nichts künden schuld geben
denn er habe Gott geglaubet vnnd ge
trawet / sein wort vnd leere gefolget / men
schen gebott veracht vnd nit gehalten / die
weyl es Gottes gebott verdrucken wollt /
Dises worts gebrauchet Paulus zum Tito
vnd Timotheo von disen Bischoffen / das
man in kein offentliche sünde noch schan
de künde zusagen.

So jr anders bleybet im glaubē
gegründet vnd feste / vnd vnbeweg
lich von der hoffnung des Euange
li / wölchs jr gehört hapt / welches
geprediget ist vnter alle creatur die
vnter dem hymmel ist / welchs ich
Paulus diener worden bin.

Da bindt er den knittel bey den hund /
vñ jaget in ain frucht ein / mit dem zusatze
Jr seyt nun hailig / vnstreflich vnd vntade
lich / ja wa jr bleybet im glauben gegründet
vnd feste / vnd vnbeweglich von der hoff
nung des Euangelij / das ist / welche hoff
nung durchs Euāgelion verkündiget wirt
Er hatt sy gelobet / wie jr glaube vnd liebe
würdig war. Aber er ist gewitziget / es hatt
jm zūuor mißlungē an den Corinthern vñ
Galathern / Darumb faret er schon / thūt
seüßerlich / vnd gedenckt hinder sich / setzt
auf ain Contionalē / So jr anderst gegrün
det bleybt ic. das ist / so jr euch weder durch
leyden / noch verfolgung / noch falche Pro
pheten lasset von der hoffnung des Euā
gelij abschrecken vñnd verfñren / Wie das

Euangelion vnter alle creatur geprediget
ist/haben wir droben gesagt / Wie es aber
durch Paulū getriben ist/ durch Arabien/
Asiam/ Kriechenland/ Pontum/ Maces
donien/ Pamphiliën 2c. zaygen seine Epi
steln vnd die geschicht der Aposteln.

Tu frewe ich mich in meinē ley
den/die ich für euch leyde/ vnnnd er
statte den feel der trübsaln Christi/
an meinē leybe/für seinen leyb/wel
cher ist die gemaine.

Es ist ain selzame red von S. Paulus/
das er sagt/ Er empfinde an seinem leybe/
vnd in seinē leyden/ das leyden Christi/für
Christus leyb/ das ist für die gemaine/deñ
es lautet schier/ als spiech er/ Christus het
nit genüg gethon für sein gemain/vnd ain
mensch als Paulus/ müste Christo sein ley
den erfüllen helffen / Aber es ist gaystlich/
vnd auff das aller Christlichest geredt/vō
der gemaine sterbē vnd auffersteen/begra
ben werden/gen hymelfaren / vñ sitzen zur
rechten Gottes/mitt Christo irem haupt.
Es will aber hie die grosse not fordernt/ die

weil wir den einfältigen dienē/ vnd meins
gleychen/ das wir disen ort/ mit groben vñ
aygentlichen wortten/ nach der lenge/ wie
er auch wol werdt ist/ vnd wir bedürffen/
außstreychen.

Zum ersten / soll man wissen / das alles
was Christus ist vnd hat/ an alle seinē güt
tern/ das hat Gott der gemain geschenckt
Ro. 8. Dieweyl er vns den Sun geschenckt
hat/ wie solt er nit mit jm vns alle ding ge
schenckt haben? Dieweil aber Christus der
erstgeborne ist vor allen creaturē/ vnd der
erstling der die da schlaffen 1. Cor. 15. Vnd
wir in seinen todt getaufft seind/ auff das
wir auch der aufferstehung taylhaftig wer
den/ so taylet sich Christus leyden vnd auf
ersteen/ vnder die gemaine/ seinen leyb/ vñ
alle glyder/ vnter allen Christen/ Also das
Christus leyden nit volkōmen ist / es seyen
denn alle glider samptlich mit jm gestorbē
vnd haben mit jm gelitten / Den wē den
glydern layde gschicht/ so gschicht es auch
dem haupt vnd ganzem leybe. Wir haben
im anfang diser Episteln gesagt / warūb
die Aposteln Got ainen vatter/ vnd Chris
tum vnsern Herrn nennen/ Nämlich/ die

weyl er hie auferden ain regiment hat/ da-
rinne schwache vnd blöde gewissen seind/
die sich vor dem tode / Gottes zorne/ vnd
teuffel fürchten / die jr gewissen naget/ jr
sünde drucket / jr flaisch vnd natur zu sün-
den vnd schanden rayzet/ vnd vnterwey-
len auch übereylet / vnd zu boden stoffet/
So treybet der hailige gayst diß reychs lö-
sung/ die vergebüß der sünde/ tröstet/ helt
an/ richtet auf die da gefallen seind/ dempft
der natur jr gelüche vnd lüste / tödtet den
alten Adam/ macht die hertzen frölich vñ
fridlich. Diß regimēt weret/ vnd ist angan-
gen zu Adams zeyten im Paradeys/ Ja ee
die welt gegründet ward Ephe. 1. biß zum
jungsten tage/ weyl ain Christ auff erdē ist
Das füret Paulus auß dem achtē Psalm.
1. Cor. 15. Denn er hat jm alles vnter seine
füße gethon/ vñ alle seine feynd vnterworf-
fen/ vnd den letsten feynd auch / den todt/
Christus tröstet auf die weyse sein Junger
Joā. 14. Ich will euch nit Waysen lassen/
Ich will bey euch sein biß zu ende der welt.

Die ankunfft dises regimēts Christi/ biß
an Jungsten tag/ vnter vñ über alle Chris-
ten/ die Christus leyden vnd aufersteen vñ

totten/mit irem leydē vnd auffersteen ers-
tatten vñ erfüllen/geschicht in der tauffe
Ro. 6. Wisset jr nit/das alle die wir in Jes-
sum Christ getaufft seind/die seind in seinē
tod getaufft? So seind wir ye mit im begrä-
ben in den tod durch die tauffe / auff das
gleich wie Christus ist aufferweckt vō den
totten durch die herligkeit des vaters/als
so sollen auch wir inn ainem newen leben
wandelen / so wir aber seind sampt im ge-
pflanzet worden/zū gleichem tode/so wer-
den wir auch der aufferstehung gleich sein.
Dieweyl wir wissen / das vnser alter men-
sche mit im gecreūzigt ist/ auf das da fey-
re der sündtliche leib/das wir fort mer der
sünde nit dienen.

Wen der Priester ain kind Teuffet/ vnd
stosset es in das wasser hinein / So spricht
er(Es sol auch das bey der tauffe gedacht
werden) Ich teuffe vñ erscūffe dich/im na-
men des Vatters/vnd des Suns/vnd des
hailigen gaystes/ vnd bezeūge hiemit/das
der leyb / den ich in meinen henden habe/
sterben vnd verderbē soll/ wie Christus ge-
storben vnd verdorben ist zeytlich vnd ain-
mal/Er soll auch vnglück/ verfolgung vñ

alle vngemach leyden / vnd der gayst vnd
seele / die ich nit syhe / soll nun forthin leben
ewig durch krafft des Gottes / in welches
namen vñ wort ich diß kind Teuffe / auch
von dem ewigem tode / wie Christus nicht
ewig stirbt / Roma. 6. entpunden werden.

Es were aber ain schlechtes sterben /
weñ es nit wee thette / Darüb müste auch
Christus / wie nun vilmal gerüret ist / euf-
serlich nach sein flaisch vnd blüt / ganz vñ
gar verderben vnd zñ nichtte werden / vol
schande / an des leybe nichts ganzes noch
vnuerseret bliben ist / vol zagens vñ schreck
ens vor Gottes zorne / gebunden mitt den
stricken vnd schmerzen der hellen / vol ver-
zweyfflung / so vil Davids sun belanget /
Eben wie nun Christus also verdirbet vnd
stirbet vor aller mensche augen / also muß
vnsrer natur mit sünden vnd schanden / vñ
dem Teuffel / vnd dem tode / geplaget / ge-
martert / getödtet / vnd begraben werden /
Das geet aber also zñ / weñ ain mensch er-
wechset / so empfindt er seinen erbschaden /
welcher den menschen nit vnangefochten
leßt / der treibet in den weyter den schrites
vnd wirfft in in ain Lebruch oder mord /

Wen er darinne steckt/biß über die oren/so
beschwert in das gewissen also hart / das
er es schwerlich ertragē kan/ja er muß dar
vor bucken vnd nyder sincken/da ist nichts
den tod / da ist nichts den zagen vnd zap
peln/kain hilff noch trost/Vnd dieweil die
natur jr selbs nitt helffen kan / so stirbt sy
frey dahin / vñ dieweyl sy niendert hinauß
wayst/ vnd muß stecken bleybē/so wirt na
tur mit allen jren krefftē begraben / also
das kain hoffnung da sey/ ymmermer wi
der zū liechte zū kōmen. Diß sterben vñ be
graben werden/ist zūgleich in frōmen vnd
bösen/ wie du sihest in Juda vñ Petro/der
bayder sünde vñ fal ist gleich/sy haben bay
de zūgleych Christū verraten/ verleügnēt/
vnd verkaufft / Sy müssen bayde vmb der
sünde willen verzagen/sterben vnd jrer na
tur halben begraben sein / das sy bey jnen
kain außflucht vnd hilffe finden künden.

Sy seind bayde im tod vnd in der helle/
begraben/ vnd vermügen in gar nichts zū
helffen/ aber im auffsteen schayden sy sich
Judas bleybt im tode vnd in der helle be
graben/vnd stirbt in seinē sündē ewigklich
Petrus bleybet nit drinne/ Darumb ist die

tauffe allain ain zaychen der Christen die
da selig sollen werden/ Wie ist die tauffe in
ir krafft gangen/ Der morder vñ eebrecher
Judas / Petrus seind todt vnd begraben/
Der leyb der mit wasser getaufft ist/ der ist
gestorben vnd verdorben zeytlich/ Aber die
weyl der seelē trost zūgesagt ist/ in den kref-
tigen dreyen namen Gottes/ des Vatters/
des Suns/ vñ des hailigē gaysts/ So muß
sy auß dem tode in ain new leben springen/
vnd muß/ wie das sprichwort lauttet/ auß
der not ain tugent machē/ durch das wort
trost vnd stercke entpfahen/ Vnd als bald
sich das gewissen herumb wirfft / auß der
not/ die es empfindet / vñ gedencft nur an
das wort/ so scheynt dem hertzē das liecht
vñ nahet sich zū seiner aufferstehung/ Dar-
umb kompt Petrus wider/ deñ er hette ge-
höret von Christo / ain solchs wort/ Petre
du wirst heüt/ mich ee denn der han kräet/
dreymal verleignē/ Aber ich habe gebettē
für dich/ das dein glaube nit vntergehe 2c.
Also bald Petrus an das wortt gedencft/
da geet er hinauß vnd waynet bitterlich/
Da nahet sich sein aufferstehung/ Judas
bleybet im tode stecken / denn er hatt kein

wort/ Petrus sihet über sein sünde den tod
vnd die straffe/ die er für die sünd leydē solt
vñ die er mit der sünde verwirckt hette/ in
das wort Christi/ das stercker ist denn der
tod/ den Gottes zorn/ den die straffe/ vnd
steet vom tode auff/ Judas bleybet in der
sünde stecken/ sihet in die sünde/ in den tod
in die straffe/ die er für die sünde leydē soll
vnd die er mit der sünde verwirckt hat/ ver
zaget vnd stirbt ewig/ Petrus erkent/ das
er vnrecht thon hat/ vñ hat trost im wort
den er sihet über die sünde hin in das liecht
vnd wort vnd waynet/ Judas erkent auch
das er vnrecht thon hatt/ aber er syhet inn
die sünde/ in das finsternuß vñ wainet nit
sonder laufft hin vnd würfft das gell für
der Phariseer füsse/ vnd schreyet/ Ich habe
gesündigt/ das ich das vnschuldige blüt
verkauft habe 2c. vnd geet hin vñ hencfet
sich.

Wen aber nun die vergebung der sünde/
die losung des reychs Christi/ felt in die büß
se/ in die tauffe/ in des sünders hertze/ also
das es beginnet nur daran zügedencken/ so
nahet es sich zur aufferstehung/ Vnd als
bald das wortt daran es gedencft/ bey jm

erwarmet vñ das hertze rüret/so ist liecht/
frewde vñ stercke da/ das es sein aygen na-
tur verdampt/ als die jr selbs nitt helffen
müge/ Gotes gnade groß macht/ die jm so
starck zñ hilffe kōmen sey/ vnd nu fride ha-
be im newen lebē/ Das haisset S. Paulus
mit Christo sterben/ mit Christo begraben
werden/ vnd mit Christo von todten auff-
steen/ Wer seine sünd empfindet/ der stir-
bet dahin/ Wer kainen trost findt der sün-
den zñ helffen/ der wirt begrabē/ Wer trost
vnd freude überkompt durchs wortt/ der
steet von todten auff.

Darnach hin/ wen die natur also gestor-
ben/ die tauffe angangē/ Büß krefftig wor-
den ist/ vnnd die vergebung der sünde/ das
leben vñ aufersteen gewirckt hat/ So steet
des sünders hertze in ainē newen leben/ vñ
erfaret solche güter/ die es zñ vor nye hette
gedencken mügen/ das sy jm widerfarē sol-
ten/ vnd lernet nun forthin durch das lebē
am wortt/ welchs krafft er empfundē hat/
dem schaden der natur zñ begegen vnd für
zñ kōmen/ vnd wandelt im gayst/ vñ in der
vernnewerung des gaystes/ das geet also zñ
heüt rayzet in yemandt zñ zoren vnd vñ

gedult/ morgē geschicht jm ain schade/ an
sein leybe/ eere vñ güt 2c. Also das sein na-
tur zerbrechen will/ so wee thüt es jr/ das sy
sich an iren beschedigern nitt soll rechnen/
Diß wüten der natur klaget er Gott / vnd
schreyt/ Herre mein flaisch will mich wür-
gen/ es steet mir nach meinem lebē / Herre
wöre jm / gib gnade das ichs überwinden
müge/ vnd nit nach seinē lüste thue/ bricht
mir den zorn/ gib mir ain sanftes hertze für
die vngedult/ gib mir gnade/ das ich mei-
nen beschedigern das verzeyhen müge / vñ
nymmer gegen in gedencen/ vnd wie das
Vater vnser lautet/ Füre vns nicht in ver-
suchung. Item/ dein will geschehe/ mache
das mir dein wille nicht zu schwer werde.
Das schreyen erhöret Got/ vnd stillt den
seinē zorn/ nympt hin die vngedult/ macht
jm ain sanfftes stilles güttiges hertze/ ge-
gen seinē feynden/ vnd lernet also was der
spruch sey Johelis. 2. Wer den namen des
Herin anrufft/ der wirt selig/ nämlich/ das
Gott warhafftig sey / vnd halte was er zu
sage/ Desigleychen thüt er heüt / morgen/
vnd so oft es in anstosset/ welchs täglichs
erfaren der Gottes hilffe wider vnser an-

fechtung/ lebendige hailigen macht / Also
ob wol ain solcher mensch hie lebet auff er
den / dennocht ain hymelisch wesen füret/
vnd fareet mit Christo zu hymel.

Zum letzten/ wenn dise bewerung/zur hoff
nung/das ist/zum trutz vnd rüm im leyde
vnd verfolgung wider den teufel geredt/ da
von oben gnüg gesagt ist/ So sizet ain sol
cher mensch zur rechtē Gotes mit Christo
regiert vñ herschet gewaltigklich über alle
seine feind/ Ja er zeucht an die zway ämp
ter Christi Jesu/das er ain König ist/dem
vnterworffen seind alle seine feind. psal. 8
psal. 109. ain Herz des Sabaths/der engel
vnd teufel/ psal. 9. Vñ ain priester der für
Got durch Christū trettē darff für andere
leut bitten/die trösten/den sünde vergebē/
vnd die werck zuthun die Gott selbs thut/
Das sagt Pau. Ephe. 1. der vns gebenedey
et hat mit allerley gaislicher gebenedeyung
im hymelischen wesen. 1. Pe. 2. Ir aber seyt
das außervölte geschlecht / vñ künigklich
priesterthumb/das ist es auch/das allent
halben geschriben ist/erben Gottes/ mitt
erben Christi. Item Joan. 1. Er hat in ge
walt gegeben kinder Gottes zu werdē/das

ist das sy gleych sein der Götlichen natur.

Hierauff wirt nu klar / wie Paulus vñ alle Christē / Christo leydē erfüllen / Christus aufferstehung erstatten / Denn Christus leyden vnd aufferstehen ist nicht vol / biß so lange alle Christen seins leybs gelyder / semplich mit im leyden vnd auffersteen.

Welcher ich ain diener worden bin / nach dem predig ampt / dz mir gegeben ist vnter euch / mit der fülle auß zūpredigen das wort Gottes.

Hie kompt S. Paulus wider auff seyn ampt / vnd will das selbige ja so hoch geschachtet haben von yederman / also hoch als Christus vnd sein gemaine selbs ist / den er sagt / im sey befolhen oeconomia das hauß halten in der wonung Christi / da man die gütter Christi aller welt außtaylet / wie er auch spricht. 1. Cor. 4. dafür halt vns yederman 2c. Er thut hie hinzū / mit 8 fülle auß zūpredigen / denn das Euangelion ist ain reycher schatzkammer / die nyemañt erschepfen kan / vnd S. Paulus gibt reichlich / den er hat ainen vollen beuttel / wie wir Teutschen sagen von den milten reychen.

Nemlich / das gehaymnuß / das
verborgen gewesen ist vō der welt
her / vnd vō den zeyten her / nu aber
offenbart ist seinē hailigen / den got
gewōlt hat / kund thun / welcher da
sey der herliche reichthumb dises ge
haymnuß vnter den Hayden / wel
ches ist Christus in euch / & da ist die
hoffnung der herligkeit / denn wir
verkündigen / vñ vermanē alle men
schen vnd leeren alle menschen mitt
aller weyßheit / auff das wir darstel
len ainē yeglichen menschen vollkō
men in Christo Jesu / daran ich ar
baytte vñ ringe nach der wirckung
des / der in mir mit krafft wircket.

Da legt er auß was er drobē gesagt hat
Der vns tüchtig gemacht hat zū dem erb
tayl der hailigen im liecht / Diser reychtūb
ist verborgen gewesen / vnd allain den Ju
den eröffnet / Ro. 3. vnd. 10. psal. 147. So
thut er kainen Hayden / noch lasset sy wis

sen seine rechte/ vnd yetzund eröffnet auch
den Hayden / welche Gott als die fremb-
den schaff herzü gebracht hat/ Zum Ephe-
sern. 2. streycht er den beruff der Hayden/
mit reychen worten auß/ vnd spricht/ Den
er ist vnser fryde/ der auß bayden ains hat
gemacht/ vnd hat abgebrochen die mittel-
wand/ die der zaun war zwischē vns/ nām-
lich die feyndtschafft / damitt das er hatt
durch sein flaysch auffgehaben das gesez/
der gebot so fer: sy schriftlich verfasst wa-
ren / auff das er auß zwayen ainen neuen
menschen schaffte/ in im fride zū machen/
vnd das er bayde versōnete mit Got in ai-
nem leybe/ durch das Creüz/ vnd hatt die
feyndtschafft getōdtet durch sich selbs/ vñ
ist kōmen/ vnd hat verkündiget im Euan-
gelio den fryden euch / die jr ferne waret/
vnd denen/ die nahe waren/ denn durch in
haben wir den zūgang all bayde in ainem
gayst/ zum Vatter.

Es waren zwayerlay wonung / vnter-
schayden durch ain mittelwand / der Ju-
den vnnd Hayden / Die Juden bliesen sich
auff/ das sy Gottes geschriben geseze het-
ten/ Das blehen vmb der geschriben gesezs

willen hat Christus auffgehoben / vnd Ju-
den vnd Hayden / seinen gayst geben / der sy
füret / das sy kains geschribens gesetzs be-
dürffen / vnd seind ainander gleych wordē
Juden vnd Hayden / wie Paulus yetzt in
andern Capitel auch sagen wirt. Die Hay-
den vnd Juden seind in der beschneydung
vergleycht / die nitt mit menschen henden
geschicht / vnd kan sich ain beschnittener
Jude über kainen vnbeschnitenen Hayden
erheben / denn sy seind zū gleych gaystlich
beschnitten.

Die art der weyßhait des Euangelij/
welche den glauben verkündiget / ist die/
das sy volkommen menschen mache / Er
braucht das wort / darstellen gleych als
thet das Euangelion nichts meer / wie es
auch sonst nichts thut / den richte zū wald
rechte / behöffe / paliere / vnd stelle dar zū
gebuht / vnd wol nach der kunst zūgericht
ains yetzlichen menschen glauben / dar-
nach S. Paulus strebet vnd ringet mit ho-
hem fleyß / Sintemal er empfindet ainen/
der in jm wircket mit krafft / das ist plero-
phoria der gewisse verstande vnd aygent-
liche kundtschafft seines gaystes / der jm

zeugnuß gibt seiner leer / das sy Gottes
sey/eben als wol/ als Moses vnnnd Helias
irer lere gehapt haben / Darnach das er se
he/ wie die lere on nutz nit abgehet/ sonder
mit macht fort dringet / denn der wircker
wirckt mit krafft/ das kan kein Keger sa
gen/ Sy setzen es allain auff ainem wohn/
vnd stellen sich doch eusserlich/ als seyen sy
irer lere gewiß / scharren vñ bochen feindt
lich vor den leutten / Aber wenn sy sollen
vor ainem oder meer zu ernstlicher Ant
wort steen/so seind sy klainlaut/vnd ir got
verlaßt sy/ Das haben wir an ettlichen zu
vnsern zeytten erlebt/ Gott gebe das wir
ir nicht meer erleben müssen/ wie ich doch
hoch sorge/die das arme volck verführet vñ
bethöret haben/ mit iren hohen gaystlich
en Worten / pochten vnd trugten wider al
le Gottes ordnüg/vnd sagten/sy het
ten befelch von Gott / Aber am
ende/ in der nott/ verließ sy
der Gott auff den sy
bochten/vñ kun
de in nicht
helffen.



Das ander Capitel.

Ich lasse euch aber wissen/
welch ainen kampf ich ha-
be vmb euch / vnd vmb die
zü Laodicea / vnd alle die meine per-
son im flaisch nit gesehen haben.

¶ Im eingang vnd vorrede habe ich ge-
sagt / wie Paulus zü Rom in seinē gelayte
grosse emsige sorge gehapt habe / für alle
gemaine / Dise emsige sorge aber haysset er
hie ain arbayt vñ kampf / wie er auch zum
Corinthern vnter andern vil trübsaln die
er für die gemaine erlittē hat / die sorge für
die gemaine / als ain trübsal erzelet / Denn
Agona haist arbayt / da grosse müe vñ far-
bey zübesorgen ist / vñ S. Paulus müste hie
neben leib vnd leben in die schantz setzen.

Die Laodicer waren der Colosser nach-
bar in klain Asien / vnd dieweil das Euan-
gelion war newlich auffgangen bey inen /
so waren die widerwertigen halßstarig /
vnd woltē nit weychen / wie es den zügeet
in allen orten / da diß liecht erstlich beginn-

net auffzügeen / biß das Gott ainen nach
dem andern holet / Darüb ist Paulus für
sy also hart bekümert / vñ für all die in mit
augen nit gesehen haben / den er hat Sorge /
man halte in nitt hoch genug vmb seynes
ampts willē / dz er will also hoch gerümpft
haben als Got selbs / darnach hat er auch
Sorge / sy möchten gedencen / Er thū alles
vmb seins nutz willē / vnd sūche nit ire see-
len vñ Gotes eere. Demselben fürzükömen
vnd den arckwon hinweg zū nemē / laßt er
sy sein ernst vnd Sorge für sy sehen / das er sy
gewinne / im dester baß zū trawen vnd zū
glaubē / in den dingen / darin er sy leren vñ
vnterweysen will / Darüb sagt er zū Corin-
thern vñ Ephesern / ir wisset wie ich vnter
euch mit warhait / one falsch / mit meiner
hende arbeit vñ selbs müe gelebet habe ꝛc.

Auf das ire hertzen ermanet wer-
den / die zūsamen gefasset seind inn
der liebe / zū allem reychthumb des
völligen verstandes / der da ist inn
dem erkentnuß des gehaymnuß got-
tes des vatters vnd Christi.

Wie feyn ist das geredt/ Auf das ire her-
zen vermant werden/ welche hertzen zusa-
men gefasset werden in der liebe ic. Damit
beschlossen wirt / wie der liebe grundt/ der
da hayst / wie droben von mir gemelt/ ge-
ring von jm haltē / vnd vil vō ain andern
darauß den ainigkait erwechst / vnd Set-
cten/ zutracht vnd alle vnordnūg verhüt
wirt / der menschen hertze zūsamē fasset
vnd vergleycht/ Den wa das widerspyl ge-
schicht/ vnd ain yeder will nach seinē kopf
hindurch/ da müssen spaltung/ irsal/ vnd
verführung nachfolgē / Es ist aber des teuf-
fels art/ das er/ wa Got ain kirchen bawet
ain krug darneben bawe / vnd sey vnnsers
Herigots affe/ das er got alles wölle nach
thūn/ Got macht ainigkait vñ ist ain Got
des frydes. 1. Cor. 14. Der teuffel macht vn-
ainigkait / vnd ist ain Gott des vnfrydes/
Er thūts aber vnter ain schein einer récht
schaffenen leere / Die Propheten des ver-
gangenen jares/ sagten die lere des Euan-
gelij/ die da newlich were außgangē/ were
recht/ aber man müſte höher kōmen / Es
were nur der bñchſtabe/ man müſte in den
gayſt kōmen/ vnd gayſten ſo lange / das ſy

weder gaist noch flaisch behieltē/ mit dem
ellenden armen hauffen bawren/ die sy als
so jâmerlich dem teuffel irem Gott auffge
opffert haben/ Es ist dem teuffel nur dar
umb zuthûn/ wie Job sagt/ darzû hatt er
auch lust/ das er verderbe was gûtt ist/ vñ
mache gayst was Gott will bûchstaben/
vnd bûchstaben was Gott will gayst ha
ben/ Ver gehet es mit den Sacramenten
auch also/ Gott helffe in.

Das wort vermanen ist hie also gesetzt/
(dauon auch der hailige gayst seinen na
men hatt/ das er Paracletus/ anhalter vñ
trôster haisset/ wie in Christus im Johan
ne allenthalben nennet) das es sey ymmer
anhalten/ vñ nit ablasse zûerinnern/ zû
bitten/ zû straffen/ die villeycht schwach/
faul/ trâg/ laß/ vñ sicher seind/ das sy fort
faren/ vnd tâglich zûnemen.

Wen S. Paulus spricht/ zû allem reych
thumb des völligē verstands 2c. So gibt er
der ermanung ire maß/ wie weyt sy sich er
strecken soll/ den soll irsal der leere verhût
werden/ so muß die weyßhait vnd völliger
verstand/ allain auff Got in Christo Jesu
rûwen/ darumb sich auch Paulus rûmet/

Er wisse nichts meer/den Christū den ges-
creüigten/vnd wer da maint er wisse et-
was/der waist noch nicht. 1. Cor. 8. Ro. 12
sagt er / Hat yemañt ain Prophecey/so sey
sy dem glauben änlich/Alle Propheceyen/
die nit den glauben barwen/ seind vō teufel
wie die waren vom Regiment weltlich zū
herrschen / die Gotlosen zū tödten mit dem
schwert Gideon ꝛc. Vñ hie spricht er/nach
dem reychthumb des völligen verstandts
Plerophorias tis syneseos / das sy nichts
zweyfelden noch wancken an der leere / also
wenn auch ain Engel vom hymel anderst
lerete/ das sy in verflüchten mit seiner leer
Das gewisse vithayl / vnterschayd/ voller
glaube haisset Plerophoria.

In welchem verborzen ligen al-
le scherze des weyßhait vñnd der er-
kentnuß.

Das ist/was ain mensch wissen sol/das
im dienet leyb vnd seel zū seligen/ innerlich
vñ eusserlich/gerecht vñ vnsträflich zū sein
das findt er alles in Christo Jesu/aber ver-
borzen/ Weyßhait ist/wie wir Got glau-
ben sollen / darauß wir selig werden / Dise

weyßhait ist gar verblichen vor vnsern an-
gen/ den vnser augen halten das für weyß-
hait / weñ man vil werck thut/ kirchen vñ
klausen stift / ain hailig leben füret / sich
casteyen/ vil fasten/ vil almüsen geben/ in
der kirchen singen/ orgeln/ pfeffen/ reüch-
en/ fanen vnd kertzen tragen / in seln/ Bi-
schoffs hütte vnd stäbe tragen / das ist vn-
sere weyßhait/ damit wir Got gefallē wöl-
len/ Diuweyl aber Gotes weyßhait verbor-
gen ist/ diß aber ist offentlich eüßerlich ding
So wirt es gewiß alles von Got verwor-
fen sein/ Syhe aber zů d Gotes weyßhait
wie die gebaret / Da Gott will sein weyß-
hait offenbar machē / da bedeckt er sy mit
dem creütze / Wer will aber glauben nach
seiner natur / weñ er sihet Christū also jä-
merlich zügericht vñ dem tode fürgewor-
fen/ das er solle Gotes sun sein/ vnd ewig
leben / ja vns zum leben führen? Item wer
will glaubē/ das das Gotes hailigē seind
welliche täglich getödtet werden/ wie das
schlacht vyhe? Vnd dennoch/ so erfört der
im creütz ist/ wie Gott in füret vnd laytet/
durch den todt ins ewige leben/ wie wir da-
for von der hoffnung vnd vnserer anderē

geburt gesagt haben / wie jr / als ich hoffe /
nu wol wisset / Die welt richtet jr reych auf
vñ weytert es / mit grossem pracht / gwalt
mit harnisch / büchssen vnd pferden / ampt
land ordnung / hilfft fryden vnd recht vñ
terhaltē / bauet mauren vñ feste thürn ic.
Gott richtet sein reych vnd weysheit auff
mit thorheit / legt ainē Apostel sein wortt
ins maul. Petrus vñ Paulus geen auß / mit
ainem schlechtē geberde / ain stäblin in der
hand / Paulus kompt für die grossen statt
Corinth. Ain ander gen Antiochen vñnd
Rom / sy sehen die stat an / vñ jr hertze muß
sagen / Es wirt hie selzam zügeen / Ich sol
mit disem stabe die statt gewinnen vnd be-
keren ? Die statt ist groß / es ist vil volcks
drinnen / Wolan ich far dahin auff ain güt-
tes gotsberadt / ich bin klain / Got ist groß
Ich schwach / er starck / Paulus kömet gen
Corinth / köret ein zü ainem handtwercks
man / fraget was sy von Gott wissen / Ant-
worten sy geschicklich darauf / so hat er güt
hoffnung / Got wölte da wircken / Er vn-
terricht sy ainfeltig vnd freüntlich / hastet
das wort / so gehet der hin vnd holet meer
leut vñ nachbar / die lernen vñ hören auch

Es kömen durch die andere mer/ Es reys-
set ein/ vnd dringen Paulum öffentlich zu
leeren/ Er thut es/ es wirt ain zulauff/ vñ
erregt die ganze stat/ fahet der leut hertz
vnd gewinnet den Römern die statt abe/
Darfür kain schwerdt/ kain mauren noch
feste thoren habē helffen mügē/ Das seind
vnser Hergots kampff vnd kriegstücke/
weñ er spricht/ psal. 110. Du solt herschen
mitten vnter deinē feinden. Zu vnsern zeyt
ten ist es auch also gangen/ Durch geringe
wenig leut ist das Euangelion außgāgē
grosse vnd vil mechtiger leute/ Ja die grös-
ste gewält auff erden/ Papst vnd Kayser
haben sich darwider gelegt/ vñnd habens
wören wöllen/ Man hats mitt Bullen vñ
Edicten verbotten/ bey verlust leybs vñ le-
bens/ Was haben sy geschafft vnser? Herg-
gott sagt gleych wol/ Mein wort soll fort-
dringen/ vnd trutz dir Kayser das du dein
schwert zuckest/ Ich hayß dichs denn/ Ja
Papst/ es ist auff dich gericht/ es wirt dich
treffen/ vnd wenn du schon noch drey kro-
nen auff dem kopffe hettest/ das soltu wis-
sen/ das Got war behalte/ weñ er spricht/
Ich mache das den Fürsten ire Rāthen

zurückē geen. Item im ersten buch der Kⁿige. Ich will ain ding thun in Israel/wer es hören wirt/dem sollē bayde oren gellen.

Ich sage aber darvon / das euch niemandt betriege mit vernünfftigen Worten / Denn ob ich wol nach dē flaisch nit da bin/ so bin ich aber im gayst mit euch / frewe mich vnd sehe ewere ordnung vnd die festung eweres glaubens an Christum.

Das rede ich darumb/ vñ so main ich es Das jr nicht sehet auff yemandts hüpsche gleyssende wort/sond̄ auf ains yeden kraft die Got durch in wirckt mit macht/wie jr wisset / das Gott durch mich gethon hat/ Den̄ mein gayst ist bey euch vñ frewet sich mit euch / ewers festen glaubens halbē/so erfare ichs auch gerne/das jr güt ordnung vnter euch haltet / vnd im glauben starck seyt/denn dadurch weiß ich/das Got vnter euch mit macht gewirckt hatt.

Pithanologia ist wen̄ man yemant mit gelerten Worten/die darzū dienen/vō menschen erfundē/ains dings beredet/Den̄ die

Hayden habē pitho ain Göttin gehayssen
Suadam/ die die leutte/ was sy wolt bere-
den kunde / Durch die Pithanologiam ist
der Kriechen vnd Rômer reich bestanden
wenn Cicero vnd Demosthenes das volck
mit geschmuckten zierlichen worten bere-
det habē vnd gefürt/ wa sy hin woltē/ mit
erzelung der ding die in eerlich vnd wol an-
stunden / diß zuthun vnd ihens zulassen/
Der Papst hat auch Suadelam in maul
gehapt/ vnd gewist/ was die leut gerne ge-
höret haben/ nämlich/ wenn yemands was
gefälet hat/ so solte er zu disem vn̄ ihenem
hailigen lauffen. Item wer da wolte selig
werden/ der solle also fasten/ betten ꝛc. vnd
dieweil die Natur tappen vnd empfinden
will/ vnd kan dise stücke begreyffen/ so fol-
get sy frisch hinnach/ vn̄ thut also/ Aber in
dem laufft sy von Gott zum teuffel/ Syhe
wie schwerlich yezund die leut vō der mes-
se vnd den teuffel wercken lassen/ Den das
Euangelion ist ain sawers wort/ vnd sagt
vom Creutz/ armüt vnd sterben/ Pithano-
logia ist ain süßer wort/ wenn du alle Din-
stag S. Annen drey liechtelein auffsteckst/
so kanstu nit arm werdē ꝛc. Die hauptleut

im kriege haben auch Suadam/wen sy sa-
gen/ Frisch dran/wir wollen heüt eere vnd
güt gewinnē/ Damit bringt man sy hinan
Aber es ist ain grosser vnterscheid / vnter
dem wort des Creützs vñ vnter der Pitha-
nologia/Pithanologia ist süsse im anfang
sawer im ende / vnd füret zum tode / Das
wort des Creützs ist / wie die erzte sagen/
Hierapicra/im anfang sawer/im ende süß
vnd füret zum leben.

Die Pithanologia hatt alle schülleerer
verfüret/wen sy kömen seind auf das stück
dadurch die hailige schrifft allen mensche
ir krefftē nymmet/vñ macht sy kinder des
zorns/das sy alle gesehen haben/ so war es
in ain bitteres wort/vnnd kunten es weder
riechen noch schmecken/ Gerson/ Scotus
vnd Petrus de Aliaco mit den andern/fiel-
len herunter vnd lieffen von diser warhait
vnd sagten / Ey das ist zū hart / warumb
solt den Gott den menschen ain vernünfft-
ge creatur geschaffen haben/wen das war
were? Vnd müste also Gottes wort vnnd
warhait irē güt duncken vnd lügen weych-
en/ So gieng es auch Christo/Joan.6. Vil-
nun seiner Junger die das höreten (Man

solt sein flaisch essen/vñ sein blüt trincken)
sprachē sy/ Das ist ain harte rede/ wer kan
sy hören?

Das wort/ ordnūg/ braucht S. Paulus
1. Cor. 14. Da er spricht/ Es soll aber vnter
euch alles erbarlich vñ nach ainer ordnūg
zügeen/ Die ordnūg ist/ das ain yeder seins
ampts warte/ wie er Ro. 12. 1. Cor. 7. vnd
1. Cor. 14. leeret/ Die weyssager laßt reden
selb ander/ selb dritte/ Ephe. 4. Er hat et-
liche zū Aposteln gesetzt / etliche aber zū
Propheten ꝛc. Liß daselbst weytter.

Wie jr nu angenōmen hapt den
Herz Jesum Christon/ so wandelt
in jm / vnd seyt gewurtzelt vñd er-
bawet in jm/ vnd seyt feste im glau-
ben/ wie jr geleeret seyt/ vnd seyt in
dem selbigen überflüssig mit dancks-
sagung.

Des gaystlichē bawes wie alle Christen
sollen auff den ecksteyn Christum erba wet
werden/ gedenc̃et die geschrifft fast offte.
1. Pe. 2. Math. 2. psal. 17. Esa. 28. Act. 4.
Den das zūnemen des glaubens geschicht

eben wie ain eusserlicher welt baw/ Wenn
man ain hauß bawē will/ so beschleüß der
bawmayster zūuor bey jm selbs/ wie er das
hauß bawen will/ fasset in seinē gemüt ain
muster/ entwirfft es/ vnd schafft vorradt
darzū / grabet nach ain gūten grund/ dar
ein er den volmund vnd fundament feste le
ge/ Er fūrt es herauß / daß gewisse stehe/
im grund sibet man nichts/ sonder ist ver
borgen/ Wen die maur über erden kompt/
so brauchē die werckleut/ maurkellen/ richt
scheyt/ winckelmaß/ vñ maurhāmer/ Auf
den eckstain legen sy vnd fassen zwū mau
ren/ vnd der eckstain tregt sy bayde / man
legt ainen stain auff den andern/ vnd auff
das sy feste ligen/ so wirfft man kalck dar
zwischen/ Wen auch ain stain sich nit rey
men will/ so schlecht mā jm die spizen den
buckel vñ vnart abe/ das er sich fügen muß.
An die ecke der zwayer mauren / setzt man
ainen grossen stain/ zum schutz der maure
Auff das/ wenn die grossen lastwegen die
maure beschedigē wollen/ das rad zūrucke
muß prallen/ vnd die maure ganz vnd vn
beschediget lassen/ Also ist Got auch zūsin
ne gewesen/ da er seyn hauß / die gemaine

bawen wolt / Der vorradt ist / sein wort/
die gelider der gemaine seind die staine/die
bawleutte seind die Prediger / die prediger
palieren durchs wort täglich die stayne/
schlahen in die vnart irer natur abe/ vñ be
decken sy mitt kalcke/das ist/ sy tödten die
natur mit iren bösen lüsten/vñ bawen den
gayst / das er stercker werde vnd zuneme/
Christus tregt zwü mauren / Juden vñnd
Hayden/die samptlich zum glauben in ain
gemaine beruffen seind / Das gebew thüt
der natur wehe / aber der gayst empfahet
trost dauon/ das sein stercke in traget vn
ten im grunde/sonst müste die maur reisen
vnd sincken / vnd kan also dester leychter/
seiner natur sterbē erdulde. Zu dem so hat
die maur den eckstain/ der sy schürtz vñ be
waret vor allē iren feynden/ wen die gros
sen lastwegen / die sünde vnd teüffel mitt
irem wüten vñ toben daher faren/ als wol
ten sy das hauß vnd die maur zu drümmern
stossen / So laynet der eckstain den wagen
von der mauren abe / vnd stoffet in zurück
das in offt achs vnd reder zerbrechen. Das
ist nun das Exempel damit offentlich er
weyset wirt/ wie in Christo alle schezge der

weyßhait vnd sterckē Gottes wonen/verborgen. Wenn der baw geschehen ist/so kan man in dem hause wonen/ vnd sich des zu aller notdurft gebrauchē/das/wer in dem hauß ist/ selig werde/ vñ wer heraussen ist verloren werde. Ain gleichen verstand hat die Parabel Ioan. 19. von dem weynberge vnd weynreben/ Jesaie. 28. Sihe ich will ain Eckstayn setzen in Zion/ain hohen bewerten/ erwölten/ tewren stain/wer auff in trawen wirt/der soll nicht zu schanden werden.

Von dancksagen sagt Petrus / Ir seyt das eigen volck ic. auff das ir seine thaten von im verkündiget vnd nach saget.

Im Esora steet geschriben/ von den die den zerstörten tempel wider baweten/das sy mit ainer hand maureten/vnd in der andern hand das schwerdt hielten/ damit sy sich der feynde erwöreten/ Das hatt Paulus gedeüttet/Titum. 1. Auff die Bischoffe/da er spricht / Das er mechtig sey zu ermanen in der raynen leere/ vnd die überzeügen künde/die da widersprechen/ Vermanen mitt der raynen gesunden leere/ist das bawen/ Das maul stopffen den wider

sprechen / ist den feynden wören.

Sehet zu / das euch nitt widerfare
ain rawber durch die Philosophia
vñ lose verführung / nach menschen
satzungen / vnd nach der wele
satzungen / vnd nit nach Christon.

Hie druckt er mit klaren wortē auß / wa
her sein emsiges sorgē vnd kampff herfließe /
den er für sy vnd die von Laodicea hat /
Er forcht sich vor der Philosophey / vor
menschen satzung / vñ der welt ordnungē /
Dieweyl aber Paulus hie vil wort braucht
die ain reychen verstand haben / so wöllen
wir erstlich ain yegklichs sonderlich besehē
was es hayße / vnd darnach zum verstand
vnd mainung dises orts greyssen.

Reuber / Sylagogon / ist hie ain solcher /
der ain anderen haimlich beschleicht / vnd
treynet im seine kün vnd vyhe hinweg / wie
man in Kriegßflüssen pflegt zuthun / Es
ist aber hie der schade der wayde halben /
das sy gefüret werde auff ain andere way
de / auff falsche leere zum tode.

Philosophy ist alles was auß menscha

licher vernunft kompt/nämlich gute ordnung vnd policey machē/Schlösser/stette Lender regieren vnd bawen/Burgerliche zucht auffrichten/die jugent in aller erbarkeit / vnd disciplin auffziehen / nach fryde vñ ainigkeit trachtē/ vnd alles was gūts ymermer mag aufferden sein / als gesetze schreyben/wie man wol regieren soll/dar nach sich alle stende richten künden/Vnd vmb eusserlich fridens willen hat Gott in die welt/das schwerdt geordnet/das es zū friden diene / vnd verbrecher des gemainē landtfridens straffe/ Dise gaben Gottes/ der es also ordnet vnd kein mißfallen daran hat/Ja ain grossen gefallen/haissen alle samptlich Philosophia/vñ seind nit wider Got/ so fer als sy bleybē im eusserlichē gebott vnd verbott/ vnd nemen die gewissen nit gefangē/ Got wirfft in diß regimēt grosse gnaden vnd gabē / sonderlich vnter die Kriechen vnd Römer/ darin man funden hat/großmütige/ auffrichtige/ erbare männer/die vmb land vnd leute willen/jr leyb/eere vnd gūt/in die schantz gesetzt haben/ allain fryden vnnd recht zuerhalten/ die mit grossem fleyß gesorget haben / das

sy ye nichts wider eere thetten/ als Scipio
Aphrican⁹/ Marcellus/ Cato/ Pompeius
Magnus / vnd andere gewesen seind/ Es
gehören in die Philosophhey / die Schülen/
handtwercker/ Fürstē/ Herrn/ König/ Kai
ser/ haußväter/ weyber/ männer/ jung/ alt
ackerbau/ gärten/ vnd alles was die welt
hat / Es seind auch Philosophia alle bur
gerliche tugende/ züchtig reden vnd geber
den/ gedultig sein/ vñ ainander etwas kün
den zū güt haltē/ sänfftmut/ keüschait/ ge
ben/ helffen/ leyhen/ ratten/ vnd ainander
dienen. Item alle freye künste/ erzney vnd
bawekunst / Solche tugende hat got auch
in ettliche thyer geworffen / wie Plinius
schreybt von den Elephanten vnd bienen/
Die bienen haben vierlay güter art vnd tu
gent/ Fürsichtigkeitait/ denn sy bawen/ vnd
füren gute burgerliche ordnung vñ policey
Sy haben groß acht auff iren König / wa
in der hin vorgeet/ da folgē sy im/ Grossen
müt im streytt wider ire feynde die wilden
bienen/ vnd sterben im stiche / Messigkait
denn sy ersparen das honig vnnd wachs/
darzū ist kein vnkeüschait vnter jnen.

Hierauß lernet man nun/ wie die Philos

sophia nit entgegen ist der hailigen schrift
vnd Euangelio / den̄ das Euāgelion wen̄
es köpt / so bessert es dise burgerliche zucht
vnd macht sy rechtschaffen / das zūuor nur
welt schein vñ eusserlich gleissen war / dar-
umb sol man die jungen kinder in der jugēt
der Haiden vñ welt Historien lernē lassen /
auch das Euangelion nach dem büchsta-
ben / ob Got wölte kömen vnd dieselbē Na-
turalia besseren / vnd zū seinē dienst brau-
chen / Zungen lernen ist philosophia / vnd
dennoch hat Got die zungen zū dienst sei-
nes Euangelij / das zū disen letzten zeyten
solt in Teutschen landen geprediget wer-
den / lāg zūuor her geschickt / also auch mit
der druckereyen / welche nye gewesen ist / sy-
der das die welt gestanden ist.

Es irren vnd sündigen wider Gott alle
die yezund im regiment seind / Könige vñ
Fürsten / vñ Stette / das sy in iren lendern
vnd gemainen / also gar die schülen fallen
lassen / gleych als were es genūg / das sy al-
lain teutsch künden / den̄ man sihet darbey
das sy zūuor irer vnterthonen vnd mitbur-
ger kinder / allain haben lernē lassen / das
sy Pfaffen vnd Mönch werden soltē / dem

Bapst vnd teuffel/zû verderben land vnd
lent/leyb vnd seelen/ wider Gotzû dienen
Wiewol wenn man Philosophia will zur
hailigen schrifft vnd Gottes wort rechnē/
so ist es vil ain geringer ding denn Gottes
wort/Ich habe aber darûb mit souil woz-
ten von der Philosophia geredt/ das man
wisse das Philosophia nichts von Gott/
vom glauben vnd hoffnung lerne / sonder
allain eüsserlich ain burgerliche zucht auff-
richte/ mit ordnungen vnd gesetzen/ Auch
das man vor augen sehe / wie der burger-
lichē tugende/die auch die thyer ains tails
von natur haben / nyemandes frum̃ vnnd
zum Christen machen.

Darumb wöllen vnd sollen wir den Für-
sten vnd aller Obrigkeit lassen ir gesetze/
ordnung/vnd policey güt sein/so ferz sy nie-
mandes dringen ir gebott vnd verbott/ zû
halten vnnd zû meyden/ bey verserung der
gewissen/vnd verdienst vor Got/ Den wa-
sy darzû geratten / so muß man in sagen/
das sy zû weytt schreytten / vnnd thûn ain
werck das in nicht gebüret / Ja ir Philo-
sophy sey lügen / vnnd verfüre sy zû dem
Ewigen tode / irer Seelen halben / denn

die Philosophhey nit helffen kan/sy ist auch
darumb von Got nit gegeben/Vnd den ist
es zeyt/sonst laß mā es geen/das man hie
dise wörtlin füre/ die da volgē/ Es sey lose
verführung/kenis apatis/leere/vnbestendi
ge/vngegründte verführung. Item stichia
elementa mundi/welt sagung/ die vor got
nichts gelte/die gewissen zū regieren/ Ele
menta/ hayssen stichia / darumb das ains
ymmerdar dem andern folgen muß/vñ ist
kein ende da noch auff hören/ Ja/ ye meer
man mit der Philosophhey die gewissen be
schwert/ ye vnruwiger die gewissen wordē
seind. Der teufel da er in die schrifft für/im
anfang der kirchen/ mit Platonis/ vnd zū
vnsern zeyten mit Aristotelis Philosophhey
da war die gantze schrifft gefelschet/ vnnd
man kunde keinem gewissen raten / vñ da
mans wolt mitt gesetzen fassen/da waren
der gesetze so vil/das es nit genüg ware an
Decreten / es kamen auch Decretal vnnd
Extrauaganten/ Es hettē auch noch wer
den müssen/wa dz Euangelio dem Bapst
nit gewõiet hette / Extrauagatorū extra
uagantes/ain außzug über den andern on
ende / wie auch Johannes Gerson klagt/

Das sich zu seiner zeytt / vil selbs ermordt/
ertrenckt / von den dechern die helse gestür
zet haben / dieweyl in nyemandt in iren ge
wissen ratten kunde. Philosophia thut es
nitt / sy macht kein Christen / tröstet auch
kein gewissen.

Soll ain gewissen trost empfangen / So
muß es habē Stereoma ain festen grund /
das ist Gotes wort allain / Philosophia ist
keni / vnbestendig / grundtloß / Darüb kan
sy kein gewissen tröste / Es ist ain warhait
die der hailige gayst / durch Gottes wort
treynet / wer der fälet / der fälet Gotes / die
weyl er denn Gottes fälet / vnd sein herze
muß steets etwas zu schaffen haben / vnd
kan nit rüwen / so muß er fallen von einer
lügen in die ander / vnd kan nymermer wi
der zu der warhait kömen / Das sihet mā
an den die irz faren vnd geen / wie sy ymer
dar irren müssen / wenn sy nitt von andern
leuten / waren bericht des weges empfanē
Diß geschicht in allen dingen wa Philoso
phia regieret / da man bald nach der Apo
stel zeyt des Euangelions fälete / da müste
man ablauffen in eytel menschliche gedan
cken / wie auch die Juristen selbs bekennē /

Der casus/felle sey zů vil/man künde sy nit
alle schreyben/ Es hat Augustinus geschri-
ben / vñ wolt neben den andern die leüt in
die schrifft füren/ Da lieffen sy zůrucke/ ver-
gassen der schrifft/ vñnd machten Bücher
über Augustinū/ als Franciscus Maronis
darnach ist kōmen Alexāder de ales/ Tho-
mas/ scribentē über Thomā/ Der mayster
von Hohen sinnen / Petrus Lambardus/
vñd über den habē etliche hundert geschri-
ben/ Scotus/ Occam/ vñd ander vil mer/
die süchten alle die warhait / vñ funden jr
nit in der Philosophhey/ denn sy waren von
der schrifft zů weyt abgelauffen.

Der Bapst da er der freyhait der Chris-
ten fälet/ die sich an kein zeyt/ stunde per-
son/ ort noch stette binden laßt/ Gala. 4.
Mat. 24. Gottes reych kōmpt nit mit eus-
serlichem geberde / Da müst er auff werck
fallen/ vñd ain Abgötterey über die ander
anrichten/ da orden vñd secten/ da walfar-
ten/ da Rom/ da Jerusalem/ da S. Jacob
vñd vil feldteuffel. Zů vnsern zeytē wichen
die propheten von der schrifft/ vñd wolten
ire gedancken der schrifft gleych halten/ so
sy doch auß der schrifft ires gaystes/ des sy

sich fälschlich rhümeten/zeügnuß hettē
sollen holen/darumb müßten sy mord vnd
vnglück anrichten / vnd hettens noch mer
angericht/ wa Got vmb der außerswölten
willen die tag nit verkürzt hette/Jezund
hebet sich auch ain sollicher lügen gayst/
der da weycht von den klaren wortē / Das
ist mein leyb/der für euch geben wirt. Vnd
spaltet sich/wie er dann nitt anderst kan/
in das Tuto / in das Das/ im Leyb/ vnnnd
wayßt nit wa er hinauß soll/ so irre macht
die Philosophhey vnnnd lose verführung / die
kainen grund hat.

Es ist kain färllicher teuffel / der dem
Euangelio mer schaden thut den eben di-
ser/Die Christen wissen/ das jr seligkait al-
lain auß glauben köme/on zûthûn irer bö-
sen vnd gûten wercke/ Sündigen sy so lauf-
fen sy zû Christo / vnnnd schütten sy auff in/
Thûnd sy etwas gûtts/ so ist es nit jr/son-
der sein / Sy bedürffen kain gesetzs. 1. Ti-
moth. 1. Dem gerechten ist kain geseze ge-
ben / Sy geen die mittelstrassen / vnd von
gûten wercken vnd bösen frey/ also/das in
kain sünde zur seligkait schadet/ noch kain
gût werck frömet/ Gnade / gnade/ ist es/

die die sünde nit achtet / noch gütte werck
ansihet. Da faren den zu die allerhailigste
leute / weñ sy sehen / das die leut so vnorden
lich leben / vñ wollen der sachen mit gebot
ten / regeln / statuten vnd anderen Ceremo
nien helffen / vnd als bald weñ das Euan
gelion vnd Christen leben / in regel gefasset
wirt / so ist es nymer Euāgelion / vnd Got
wirt verleügnnet / der sein wort will freywil
lig gefasset haben / darüber nyemānt regie
ren soll / den sein sun allein / der darüb solch
regiment auffzurichten gestorben ist / vnd
will kainen menschen darüber richten las
sen / daran seind schuldig Franciscus / Do
minicus / Basilius / Bernhardus / vnd alle
väter die regeln gemacht haben / alle Con
cilien / darin etwas beschlossen ist worden
wie den in allen / auch in Nicea Synodo /
von eusserlichem lebē / klayden / speysen / vñ
geberden / wie Paulus bald hernach sagt /
Niemand soll euch gewissen machen / we
der über speyse noch über tranck / noch über
kain zeyt der tage / Newe mon oder Sab
bather / denn wenn man über sollich ding
statuten macht / so ist Christus vergebens
gestorben / vnd wirt an stat Gottes worts

Philosophhey geprediget.

Hie müßt jr ainfeltigen gedult habē/wir
müssen hindurch/der warhait zū eeren/vñ
nichts bergen/es ergere sich daran wer da
wölle/wir seind alle von natur also gesin-
net/das wir gern woltē aigentlich wissen/
wie wir mit got stündē/ ob er vnser freünd
oder feynd were/vñ Gott will vns kein an-
dere verwissenung geben vnd haben lassen
den sein wort/ das Christus mit seinem ster-
ben versigelt hat/wie Christ⁹ sagt zun Ju-
den/die Lebrechischer art will ain zeichen
haben/ aber es wirt jr keins geben werden
denn das zeichen Jone des Propheten ꝛc.
das ist Christus tod vnd aufferstehung/
Nun laßt Natur von irer art nitt/sy will
greiffen vnd sehen/vnd wa sy Got nit helt
vnd jr wöret / so fellt sy dahin/vnd richtet
Ceremonien auff/vnd gedencft/das wirt
Got gefallen/wen man also vñ also lebet/
den vñ disen orden helt/ graw vñ schwarz
flaydet/vnd fälet Gottes/vnd setzet/ wie
Jesaias sagt/ sein hoffnüg auff die lugen/
Da laufft den alle welt zū vnd maint / da
sey Got/ bettet den teuffel vñ die lugen an
für Got vñ die warhait / Ja wir seind alle

also gesinnet/ Wenn wir ainen tag mit güt-
ten gedanken/ des nächstten dienst/ predi-
gen/ arbayten/ schreyben/ lesen/ zůbracht
haben/ so gefallen wir vns wol/ vnd sagen
Ach wenn ich alle tag also thete/ so were es
ye feyn/ vnd wurde Got wol gefallen/ Her
widerumb/ wenn wir ainen tag übel zůbrin-
gen/ so fürchten wir vns sere/ schreyen vnd
klagen/ es sey vnrecht gethon/ wir werden
nun verdampt werden/ vnd das alles bay-
des ist Christi vnd seiner gnade gespottet/
denn ich soll mich kains gütten tages frö-
wen/ darinn ich gewirckt habe/ sonder al-
lein des soll ich mich frewen/ das ich Got-
tes gnade habe / werck machen mich nitt
selig/ der sünde soll ich auch nit erschrecken
Werck verdammen mich nitt / sonder der
vnglaube/ glaubstu / so wirstu auch in der
sünde selig.

Man sagt/ das ain schwaches gewissen
auff ain zeyt gesehen habe ain kostlichē sal
des wende mit gold überleget waren/ vnd
sein estrich eyttel edel gestayne / im sal saß
auff ainem guldenen stül ain König/ wel-
licher disem menschen rufft / Er aber der
schwach im gewissen / forchte jm vor dem

König/ vñ schawete sich für in zu kōmen/
denn er saß auff ain Esel / Entlich/ nach
vilem erfordern des Königs/ begibt er sich
in den sal/ mit dem Esel / da er aber mittē
inn sal kam/ da pfercht der Esel / der bald
abe/ vnd will den Esel wischen vnd rayni-
gen/ vnd darnach allererst zum König rey-
ten/ Da spricht der König zu jm / kōm du
her/ laß den Esel steen/ mit dir habe ich zu
schaffen/ der Esel thūt wie sein art ist. Al-
so seind auch Chriſtliche hertzen gesinnet/
mitten in der sünde/ denn sy sehen was der
König will / das sy Gottes hulde haben/
vnd sehen nitt wie groß/ wie vil/ wie offft/
der Esel pfercht vnd sündiget.

Summa.

Philosophia/ wen sy in Gottes wort ge-
rat/ so spricht sy/ Wen du vil wirckest/ vnd
güte werck thūst/ sey sicher/ du gefelst got.

Gottes wort/ vñ die freyhait des gaysts
sagt/ Wen du vil wirckest vnd gütte werck
thūst/ so fürchte dir / den auß gnaden bist
du selig worden/ vnd bist dennoch ain vn-
nutzer knecht.

Philosophia sagt / Wenn du sündigest/
so bistu verdampt/ fürcht dir.

Gottes wort sagt/ wenn du sündigest/ so
sey frölich/ es soll nit not haben/ sünde ver
dammen dich nit/ gütte werck seligen dich
nit/ sonder der glaub an Jesu Christ allain
den darumb ist in der gemaine vergebung
der sünden on vnterlaß.

So ist das nun S. Paulus maynüg/ Se
het zu/ das euch niemañt verführe mitt der
Philosophhey vnd loser verführung/ die kein
grund hat darauf das gewissen rüwen kün
de/ Es seind doch nit meer den menschen
satzung vnd welt ordnüg/ da man ymmer
von ainem aufs ander fellt/ vns ist nichts
bestendiges da/ Sehet euch aber wol für/
den es seind haimliche gryffe des teußels/
vnd ain süß gyßst. 2. Timo. 2. Ir rede fryßt
vmb sich wie der kreps/ Das ir ye nit meer
wissen wölt/ den Christu Jesum/ wer meer
wissen will/ denn sein Creutz vnd auffers
stehung/ der wirt von jm lauffen/ Secten
rotten vnd irsal anrichten.

Denn in dem wonet die gantze
fülle der Gothait leiplich.

Wenn man der leere vom glauben/ liebe
vnd hoffnüg müde wirt in den flaischliche

herzen / so will man nach höhern dingen
trachten / die Gott verbottē hat zu wissen
Darüb sagt hie S. Paulus / laßet euch bey
leybe die leere vom gecreūzigten Christo
nit geringe duncken / den es wonet in dem
selben gecreūzigten / die fülle der Gottheit
leylich / gar vnd gangz / nit stück weysß. Hie
ist gewyser trost / sterck vnd leben / dort im
gesetze vnd in der gangzen philosophey ist
nichts den stückwerck / da mit klayden / es
sen / trinckē / Hie mit orden / kappen / Mes
sen / blatten / vnd andere verfürung meer.
Im gesetze warē mancherlay opffer / speiß
opffer / tranckopffer / hebopffer / todopffer
brandopffer / Sündopffer / schuldopffer /
dancopffer / webopffer / vnd andere mer /
Pacifica vñ iunge sacrificium / so vil tage /
speyse / Dise stücke hatt Christus alle in im
selbs erfüllet / Hebr. 9. Den er ist durch sein
aygen blüt / ain mal in das hailige gangen
vnd hat ain ewige erlösung erfunden / Vñ
ist nun forthin kein opfer mer / den vnser
aygen leybs Ro. 12. Vnd das opffer des lo
bes / Psal. 50. da Osea von sagt / selber der
lipen / Hebr. 10. Vnd ain yegklicher priester
ist eingesetzt / dz er alle tag Gottes dienste

pflege/vnd offtmals ainerlay opffer thū/
welche nit kunten die sünde abnemē. Diser
aber/da er hat ain opffer für die sünde ge-
opffert / das ewigklich gilt / ist er gesessen
zur rechten Gottes/ vnd warttet hinfürt/
biß das seine feinde zum schemel seiner füß-
se geleyget werden / denn mit ainem opffer
hat er in ewigkait volendet die gehailiges-
ten ꝛc.vnd irer sünden vnd irer vngerech-
tigkait / will ich nit meer gedencfen / Wa-
aber solche vergebung ist / da ist nicht mer
opffer für die sünde.

Was wonen sey / vnd wie die Gottheit
in Christo mit allen scherzen der weyßhait
vnd erkentnus wone/hab ich newlich zum
tayl gesagt/vnd will es hie nit widerholen
Sonder mit kurzen Worten erklären/ was
leyblich / Somaticos haisse / Wa ain leyb
ist/vnd steet in der Sonnē/da gibt der leib
schatten von sich. Also ist Christus der leib
der ding/die im gesetz gewesen seind/Den
schatten habē sy von Christo gesehen/ aber
den leyb haben sy nit gesehen/ Vnd wie der
schatten nit der leib ist/vnd muß vergeen/
der leyb bleybt/ ob wol der schatt vergeet/
Also seind die vilē opfer nur vergengliche

schatten/ vnd müssen auffhören/ wenn der
leyb Christus kompt / Gott hat gewonet
bey den frömen Juden auff den Cherubim
aber allaine im schatten / Vezund wonet
Got in Christo warhaftig/ vnd wirt ewig
in jm wonen/ Ihens höret auff/ diß nicht/
Hebre. 9. Welchs ist die gleychnus zc. nach
welcher gaben vnd opffer geopffert werde
vnd kunden nitt volkōmen machen nach
dem gewissen/ denen/ der da Gotes dienst
thut/ allein mit speyß vñ tranck/ vnd man
cherlay tauffen/ vnd flaischlicher rechtfer
tigung / die biß auff die zeyt der besserung
seind auffgelegt/ Christus aber zc. S. Pau
lus füret den spruch Jesaie. 10. Auch auff
die weyse / Ain verkürzt wort wirdt Gott
machen auff erden zc. 3. Inuor / sagt Gott
durchs geseze/ yß das nit/ yß diß nit/ opfer
yetz also für die sünde/ yetz zum dancke zc.
Vez sagt Got im Euangelio / Glaube vñ
trawe Got/ vnd liebe den nächsten/ so ha
stu das ganze geseze erfüllet/ Gal. 5. Den
alle geseze werde in ainem wort erfüllet/
in dem/ Hab deine nächsten lieb/ als dich
selbs/ Jesaias sagt am letstē/ Es wirt ain
Monat nach dem andern sein / vñnd ain

Sabbath nach dem andern / das ist / Ain
Christ hatt alle tage Ostertag / alle tage
Carfreitag / vnd ist an kain zeyt noch stet-
te gebunden.

Vñ jr seyt desselbigē vol / welcher
ist das haupt aller Fürstenthumb
vñnd oberkeit / in welchem jr auch
beschnitten seyt / mit der beschney-
dung on hende / durch ablegūg des
sündlichē leybs im flaisch / nemlich
mit der beschneidung Christi / in dē
das jr mit im begraben seyt / durch
die Tauffe / in welchem jr auch seyt
aufferstanden / durch den glauben /
den Got wircket / welcher in auff er-
weckt hat von den todten.

Was beschneydē sey gäistlich vñ on men-
schen hende / nemlich das ablegē des sünde-
lichen flaischs / Was sterbē sey in der tauf-
fe / Was begrabē sey in der tauffe / was auf-
ersten sey im glaubē / hab ich drobē gesagt
Wie aber Christus ain haupt sey aller Für-
stenthumb / willich sagē im folgende text

Vnd hat euch auch mit jm lebendig gemacht/da jr tod waret in den sünden/ vnd in der vorhaut eweres flaisches/ vnd hatt vns geschencket alle sünde/ vñ außgetilget die handschrift wider vns/ durch schriftliche satzung erweist/ welche vns entgegen war/ vñ hat sy auß dem mittel gethon/ vñ an das creüz gehefftet.

Christus ist von den todten auferweckt mit seinthalbē allain/sonder vil mer das er vns alle lebendig mache/da wir tod in sünden waren vnd noch seind/welchs den geschicht zur ablegung des sündlichen leybes im flaisch/durch die beschneidung Christi zu Ablegen das er sagt *En ti apēdyssi/ exiuntione/* haysset also vil/als wenn ainer ainen rock ablegt/ der bemackelt vnd verunrayniget ist/ vnd will sein nit mer haben/ des vnflats halbē. Das widerspil treybet Paulus Gal. 3. Den wie vilewer getauft seind die haben Christum angezogen/Ain güter rock schmückt vñnd zieret den menschen/

deckt im sein schame zu/ vñ macht in eer-
lich/ Also das man muß sagen von ainem
Christen/ Es ist ain newer mensche wordē
sänfft/ stille vnd güttig/ den wie solt er nit
anders werdē/ Sintemal er den altē wan-
del hat abgeleget/ vnd den Christon ange-
zogen/ der in zieret/ klaidet/ in gar verend-
ert vnd zum gayst zürichtet :

Es seind hie erzelet alle thaten/ die Chri-
stus geyebet hat/ vns zu güt/ vnd für vns/
Zum erstē/ Er hat vns alle sünde geschen-
cket. Zum anderen / hat er außgetilget die
handtschrifft/ vñ an das Creütze gehefftet
Zum dritten die Fürstenthüb außgezogen/
schaw tragen / vnnd ain Hörpiangen auß
inen gemacht/ mitt freuden / Das ist der
herliche Triumph Christi wider vnnd von
seinen feynden / Den wollen wir stück bey
stück/ von wort zu wort erklären.

Es ist ain grosse gewalt/ die da kan sün-
de vergeben/ das hat Christus gethon/ Er
thuts aber also / das er hinweg nympt die
handtschrifft auß dem mittel/ die wider
vns war/ das ist vnser gewissen/ Der teufel
hat auffgesteckt vnser gewissen / wie man
in ain spyl etwas auffwirfft/ darnach ain

yeder arbayt das selbige zů gewinnen/ vnd
trutz gebottē aller welt/das sy jm der men
schen gewissen nemen solt/der er ain ober
herre sey/Den trutz hat Christus gewaget/
ist zůgefaren vñ hat die handtschrifft hin
weg gerissen/ mit jm vmb das krenzlin ge
fochten / vnd ist sein maister worden / So
legt es Christus selbs auß Lu. 12. Wenn ain
starcker gewapneter sein hauß bewaret/ so
bleybt das sein mit fryden/ Wenn aber ain
stercker kompt über in / vñ überwindet in/
so nimpt er jm sein harnisch/darauf er sich
verließ/vnd taylet den raub auß/ Also saß
der teufel mit gůter růwe vñ fride/regieret
gewaltigklich vnd on schew/ fraß vnd ver
schlang alle welt / hieng die handtschrifft
auß/ als sein schilt vnd helmlin/ zů spot al
ler welt/ vnd auß lautter hochmůt/ gleich
als were sein kunst über alle künste / Aber
yegund hat er die schůle vñ schwert verlo
ren / darzů ist jm das handtwerck gelegt/
das er mit so statlich treybē kan als zůvor.

Das gesetz gebeüt / Du solt nit begeren.
Natur antwortet/ Ich kans nit lassen.
Das gewissen macht ain end vñ tail vnd
schleüßet/ darůb müstu verdampt sein.

Also ist die handtschrifft / die wir dem
teuffel geben haben / erweyset durch schrift
lich sayung / wider vns / von Christo weg
gerissen / vnd an das creütz gehefftet / Der
teuffel treybt durchs geseze auf vns sünde
vnd tod / Christus erbet auff vns vergebüng
der sünde vnd leben durch sein creütze. Da
nun die handtschrifft am creütze hanget /
da laufft jr der teuffel nach / vnd wirt ge
war / das Christus die hat weggenommē /
da wirt er zornig / vñ versücht sein hayl an
Christo / schlüttet auff in auß alle sein giffte
braucht des todes zū helffer / hezert die Iu
den vnd Hayden an Jesum / die müssen in
verspotten / verspeyen / zū tod bringen zwis
schen zweyn mördern / vnd als ain ermor
der muß er hangen / seine aygene freünde /
als Judas / müssen in veriaten / die Phari
seer sagē / er sey des todes schuldig / In sum
ma / der teuffel hat nit genüg / das er in al
lein tödte / sond er bringet in außs creütze /
vnd dringet auff in das vitayl im geseze /
Vermaledeyet sey von Got / der am holze
stirbet. Vnd da er das hat zū wegē bracht /
da jubiliert er vnd maint er habe nun ge
wonnen / da geet der spot an zum schaden /

Bistu Gottes sun/ so steyge nu vō creütze/
das wir an dich glaubē. Item/ Andern leu-
ten hat er geholffen/vñ jm kan er selbs nu
mit helffen/vnd der gleychen mee/ Der teu-
fel schreyt hui/vñ ist noch nit hinüber. Die
Juden/ Annas vnd Caiphas/ seind frölich
Aber es wendet sich das rādin / also das
auch die in hetten creützigen helffen/ da sy
die verendrung Sonnen vnd Mons/ das
erdbidem sehen/ anheben vnd sagen/ War-
lich diser ist Gottes sun gewesen / Den hie
ist der Teuffel überwundē/ Der tod main-
te/er wölte Christū/wie alle andere men-
schen ewig fressen vnd verschlingen / aber
er fryst den todt an Jesu.

Plinius schreybt von ain thyerlin das
hayßt Ichneumon / das streytt mit den
grossen Walfischen/ also/ Es legt sich inn
das kot vnd schlecht das kot vmb sich wie
ain haut/ Wen nun die grossen mö: schlan-
gen vnd Walfische herauß trettē nach der
Sonnē/ so werffen sy sich auch vnd welzē
sich in dem kot / Der walfisch findt da ain
klump/ wirfts auff/ fahet es wider mit dē
maul/das thyerlin leydet es/ biß so lange/
das es dem walfisch in den hals kompt/ so

beisset es jm den hals vnd bauch durch/vñ
tödtet jn/ Ain klains thyer ain vngehewer
groß thyer. Also hat Christus sich verwick
let in das kot/vnd der ainige Gotes sun ist
mensche worden / gebart vnd thüt in aller
massen wie ain ander mensch Phil. 2. Dar
umb laufft der teuffel zñ vnd spilt mit jm/
wie die kat mit der mauß/ vnd schaut alle
vnglück über jn auß/ vñnd will die handt
schriff wider erobern / der tod speriet den
rachen auff/vnd will jn verschlingen/ das
arme würmlin psal. 22. Christus ist stille/
wart des spils ain ende/ biß er dem tode in
den rachen kompt / da zerreyset er jm die
kinacken von ainander/schlecht jm die bö
se zene auß / durch bozet jm den bauch vnd
tödtet jn/das ist die Victorie vnd überwin
dung des Creüzes/ So ist das nun das er
ste/ das Christus seine vnd vnnser feynde
wölöß macht/vnd zñ bodem schlecht.

Das ander ist / das er sy außzeücht vnd
plündert sy/vñ die das leyde müssen/seind
herschafften vñnd gewalten / Es ist aber
Friege ordnung/ Erstlich vmb ain klainot
güt/ eer/ fechten/ Das schwert vnd bogen/
gegen ainander auffheben/den stich bietē/

vnd auß der wör vñ zů bodem schlagen/vñ
wer die wör von sich gibt/bekent das er vn
ter des andern gewalt sey. Darnach folget
plündern/Zum dritten ist das Tropheum.

Es hayffet hie das wort Edigmatisen/
ain tropheū auffrichten/der feinde wappē
schildt vñ helm/ an ain pfeyle oder baum
hencken/wie die Süsten irer feinde Baner/
in die kirchen vñ gewelbe pflegen zů hencf
en/ den Deigma haisset ainē platz da man
etwas offentlich zur schaw/zum prangen/
oder verkauff/weiset/digmatizein/haisset
etwas an den offentlichen blatz/an marckt
zur schaw herfürē. Also hat Christus offen
lich am blatz in seiner gemain/ seiner feind
schild/helm/baner/schaw getragen/vñ in
seiner kirchen/ ain Tropheum auffgericht
ainen baum mit vil esten. An ainem ast
oben/ hanget der teuffel mit seinē feürigen
pfeylen/handbogē/vnd fal od jägerstrickē
Am andern hanget der tod / mit zerbroche
nen einbacken/ außgeschlagen zenen/ vnd
spitzen stachel. Am drittē/die handtschrift
durchs gesetze erweyset/durchstoehen vnd
durchlöchert. Am vierdtē ast hanget Got
tes zorn. Am fünfftē/der hellē haupsthüren

vnd pfoften. Am sechsten/die welt mit all
irer gewalt/ Der baum ist dz hailige creütz
an welchem nun genagelt hangen / die zu
vor Chrustu nageln vnd creützigen wolten.

Es stehet auch hie darbey/ En parrisia
mit fraydigkait/das ist/ Er hat juch dazü
geschryen/vñ der feynde gespottet/ Ey wie
feyn seyt ir angelauffen / lauffet mir mer
nach/ Wen süchtet ir? Weret ir dahaimen
belibē zc. Warnach ainer ringet/darnach
aim gelinget zc.

Das vierdt ist das hörprangen/Triam-
beno/kömet vō Trias/das ain feyge hays-
set/vnd Ambeuo vmb bunden/den bey den
Kriechen war der brauch/das die Trium-
phanten/ die ain grosse schlacht gewonnē
hettē/ mit ainer krone von feygen blettern
getrōnet wurdē/ Bey den Römern war sy
von ain Lorber baum / Bey den Römern
zohen sy ain / in ain wagen/ mitt weysen
pferdten/ vor in fürte man die gefangenen
als Marius den König Jugurthā/ Aemil-
ianus den künig vō Macedonien Persen/
Scipio Syphacem König zu Numidien/
man trüg vor in her auf grossen tasseln vñ
tücher/ alle lender gemalet/ die sy mit hōrs

Krafft vnter sich gebrochen hetten. Zinder
dem wagen waren sein leut dadurch er die
grossen thaten geyebt hett/die sungen/lob
ten den Triumphanten/spottetē der feinde/
vnd wünschetē / das der Römer reych
von tag zū tage wüchse vnd zuneme/Also
geen vor Christo her / die gefangenen her
schafften/ der tod/ der teuffel zc. Er tregt
das fänlin mit freuden/ Zinden folgen al
le Christen/die singen wie es Matheus. 21
feyn beschreibet auß Zacharia/Gebenedey
et sey der da kompt im namen des Herren/
vnd den gangē. 45. Psalm/ Trit einher zc.
Hosianna dem sun David/ gyb glücke dem
sun David/der feinde spot ist der/Vbi mor
sus tuus inferne/ Wa ist nun dein beyssen/
O tod? He He/der tod ist vnter die füsse ge
treten / trutz beyß mich / trutz fryß mich/
trutz stich mich/ Ja du wirst es lassen.

Nun ist es ye war/ ye grösser vnd niech
tiger die feynd seind die da geschlagē seind
ye herlicher der Triumph ist. Darumb ist
Christus victoria vnd Triumph derhalbē
dester herlicher/ Sinttemal er nitt allain
welliche künige/sonder vil mer gaistliche
Herschafften nyder gelegt hat / den teuffel

vnd den tod/Sihe aber das grosse wunder
das Got im creütze/in solcher ainfalt/de-
müt/vnd geringem wesen / die grosse her-
ligkait vnd macht des Teuffels zu bodem
stürzet/welchs Paulus treybet. 1. Corin. 1
Denn dieweyl die welt durch ire weyßhait
Gott in seiner weyßhait nit erkante/ gefiel
es Gott wol/ durch thörichte predigt selig
zu machen die dran glauben/Luce am let-
sten/ Also mußte Christus leyden vnd ein-
geen in sein herligkait.

So lasset nun nyemandt euch ge-
wissen machē über speyse oder über
trancē/oder über aines tails tagen/
nemlich/den Feyrtagen oder New-
monden oder Sabbathen/welches
ist der schatten von dem das zukünf-
tig war/aber der Cörper selbs ist in
Christo.

Bissher hat Paulus ain brucke vnd ein-
gang gemacht/mit so vil reichē worten vō
Got/wie der sein sun ain reych habe auff
gericht/darein er vns beruffen habe/Auch
wie der sun Jesu Christ hierinn gewaltig-

lich regieret / jm selbs durch sein blüt ain
gemain vñ leyb züberaytet hat / für welche
er sicht / die feynd wölloß macht / plündert
schawtregt vnd ain herlichen triumph vñ
hörsprangen auß jnē zürichtet / Auff das er
disen schluß mit gütē fūge möchte darauff
einfūren / auff die weyse / So dan jr also ge
freyet sey / vñ reych der finsternuß erlöset /
In das reich des suns der liebe Gottes ver
setzet / vnd sehet den teuffel / den tod / ewer
böse gewissen / alle herschafftē vnd gewalt
geschlagen vnd ans Creūtz gehefftet / von
ewerem hauptē Christo Ihesu / Wolan so
braucht der freyhait also / das jr ewers ge
wissens halbē / kein zwang oder drang ley
det / auch das zūhalten das Got gebotten
hat / Ich schweyge der menschen sätzung /
sonder brauchet / der Engel / der teuffel vñ
aller creatur / wenn vnd wa euch von nōt
ten ist / vnd Gottes eer / des kinder jr wor
den seyt / nit entgegen ist.

Droben da wir von der Philosophia re
deten / habe ich anzaiget / wie schwer es der
Natur ist / auch in den allerhailigsten leu
ten / das sy sich dahin frey begeben soll / vñ
keine werck weder gūtt noch böse achten /

Ja sonderlich der gütten werck vergessen/
den sy will ymer der sachen helffen/ vñ ver
maint Gott ainen dienst zũthun/ wenn sy
newe weysen zũ leben/ zũ klayden/ vñnd zũ
essen anricht/ Darüb zwingt vnd dringt di
ser text mit gewalt/ das natur wider Gott
sey/ auch alle solche geseze / damit ain ge
wissen soll gebunden werden/ Ja diser text
zwinget/ das solche gebot geber/ Christum
auffs new creüzigē/ vñd seind Antichristē
Sintemal Christus durch sein sterben die
gewissen freyet/ vñd dise wollen die gewis
sen binden vñd fahen/ das sagt S. Paulus
1. Timo. 4. Der gaist aber sagt deütlich/ dz
in den letzten zeytē / werden etlich vō dem
glauben abtretē (das ist/ sich nit genügen
lassen / das man allain selig werde durch
den glaubē an Jesu Christ der gecreüziget
ist) vñ anhangen den irrigen gaystern/ vñ
leeren der Teüffel (far schon Paule/ trifft
vnserē Bischöffe mit/ Sy werden jm aber
schwerlich entlauffen) durch die so in gleis
nerey lügenreder seind/ vñ brandmal in irē
gewissen haben/ vñd verbieten klich zũ
werden/ vñd zũmeyden die speyse/ die Got
geschaffen hat / zũnemen mit danck sagūg

den gleubigen / vnd denen die die warhait
erkennet haben / denn alle creatur Gottes
ist güt / vnd nichts verwerflich / das mit
dancksagung empfangē wirt / deñ es wirt
gehailiget durch das wort Gottes vñ ge-
bet. Wie wollen wir versüchen / ob wir kün-
den vrsach geben / damit man greyssen mü-
ge / das diser text recht habe vnd war sey.

Sant Paulus vnderseydet die ding /
an welchen das gewissen hangen soll / von
denen dingen / daran es nitt hangen soll /
sonder drüber regieren mit den wortē Ro. 4
Damit die verhayssung fest bestünde allē
somen 2c. Verhayssung Gottes auß gnadē
vnd verdienst auß dem gesetz vnd seinen
wercken auß pflicht / seind zwayerlay / Auff
die verhayssung auß gnaden Gottes / kan
sich das gewissen als auff ain feste / aigent-
lich verlassen / Auf verdienst der werck auß
pflicht / kan sich das gewissen gar nit ver-
lassen / Denn wenn man schon lange wirckt
vnd wirckt / so wayßt das gewissen nymer
mer / welch werck Got gefalle vnd welche
nit / hanget also zwischē den wercken / zap-
pelt / schwebet / vnd waißt nit wenn es Got
gefalle oder nit / Darumb sagt S. Paulus

das erbe vnd kindtschafft Gottes komme
auß gnaden/ auf das die verhaiffung feste
bestünde/das ist/ das aller somen gewisse
were des erbes vñ der kindtschafft. Also ist
Christus verhaiffen von Got vnd der welt
gegeben / das die gewissen ain Sigil vnnd
vnterpfand hetten / den hailigē gayst den
Christus vns geschenckt hat/ des gewissen
erbes vnd kindtschafft / Darumb soll vnd
kan kein creatur gewissen binden/ das als
lain hangen soll an der verhayffung / vnd
gelaysten warhait Gottes/vnd aller Cre-
atur Herre sein.

Gott der ist ewig/vnd ain gayst/ Vnser
seele ist auch ewig vñ ain gayst. Got lebet
ewig vnd stirbt nit/ vnser seelen sollē auch
ewig leben/vnnd nit sterben/ Darumb soll
vnser seel/als ain ewiges/gaystlich ding/
mit Gott der auch ewig vnd ain gayst ist/
vergleichen werden/ So muß es durch ain
ewiges vnd gaystliches geschehen/ Das ist
aber Gottes verhayffung vnnd wort/ das
auch ewig vnd ain gayst ist / welchs leben
vnd liecht gibt Jo. 1. vnd alle ding erschaf-
fen hat. Ephe. 1. Colo. 1. Werck sy haiffen
wie sy wöllē/sy seind also hailig wie sy wöl-

len/so seind sy zeytlich vnnnd leyplich/ Wie
seind wir den also toll vñ wansinnig / das
wir vnterstehen / ain ewige seele vnd ain
gayst/ mit Got der ewig vnd ain gayst ist/
durch leyb vnd zeytliche werck / zñuergley-
chen? So doch die Hayden sagen auß der
natürlichen erfahrung/ finiti ad ifinitū nul-
la proporcio. Ewig vnd zeytlich/ leyb vnd
gayst/ reymen sich nymmermer zñsamen.

Sihe ain menschen an/ An ainē mensch-
en findestu leyb vnd seele. Der leyb/ wenn er
zügericht wirt in mütter leybe / kan on die
seele kein leben haben / vnd wenn die seele
kompt/ so reget sich/ lebet strebet/ der leyb
die füsse geen/ die augen sehen/ das haupt
gedenckt/ die hende wircken / die zunge re-
det/ der magen dewet 2c. vnd alle natür-
liche kreffte seind starck vnd thetig/ vñ der
seelen/vñ ye thetiger ain seele in dem mens-
chen ist/ ye thettiger auch der leyb wirdt.
Herwiderumb/ als bald die seel abschaidet
vnd verlaßt den leyb/ so bald reget sich der
leib nymmer/ sonder alle kreffte die zñuor der
leyb gehapt hat / hören auff vnd seind mit
der seelen hinweg gefarē. Die seel aber lebt
gleichwol/ gedenckt/ vnd yebet die kreffte/

ob sy wol vō leyb ist abgeschayden/darauß
den̄ folget/das die seel ain ewiges/der leyb
ain zeytlich leben habe. Die seele künde on
den leyb/der leyb künde on die seele nit lebē
Die seele ist ain gayst/der leyb ist flaisch.

Das wort das vō Got außgeet / kompt
in die seele/ wirckt in jr/ was es von anbe-
ginne in allen Creaturen gewirckt hatt/
Liecht vnd leben/wie den̄ Moses Gene. 1.
Alle Gottes werck verfaßt / im liecht vnd
leben/ das alda alle creatur durchs wortt
empfangen habē/vnd in dem liecht vnd le-
ben/wirt die Gottes tochter/ vñ mit Got
vergleycht/ ain gayst/ ain ewig wesen mit
Got/durch das ewige/gaystliche leben vñ
wesen/das wort/das Got selbs ist. Wenn
nun ain seel sich mitt wercken / sätzen/
tagen/Sabbather/speyse/flaydern/vñ an-
dern zeitlichen dingen/vnd sy ist ewig/bin-
den laßt/so wirt sy auß ainē ewigen leben/
gayst/flaisch/zeytlich vnd stirbt/vnd Got
wirt sein erbe/aygenthumb vnd gleichnuß
entzogen. Also geschach Adam/ Darumb
soll ain seele die in Adam gesündiget hatt/
vñ Gottes hand entpfallen ist / durchs
zeytliche widerumb mit Gott vergleychen

werden / So muß es durch ain ewiges/vñ
ain gayst geschehen / Das werck aber das
durchs ewige wort vñ gayst gewirckt wirt
ist der glaube/on alle werck.

Vnd wie wir yetz gesagt haben/das die
seel kan on den leyb lebē/Also kan der glau
be on die werck leben/wie im Schacher am
Creutz/vnd wie der leyb nit kan on die seele
leben/sonder ist todt/ Also kan kain werck
Got gefallen/ on den glauben/ Ja sy seind
alle tod/vñ führen zur helle/Hebre. 11. Item
doben habe ich auch also gesagt / Wa ain
vernünfftige seel in ainem menschē ist/ da
gebaret sy vernünfftiglich/mit reden/es
sen/trincken/augen/ füßen/ vnd allen ge
lidern. Wa ain rauche wilde seel ist/da ist
ain rauchloß wilde vngeschickt geberde/
den die sele bricht auß/ vnd stellet sich wie
sy an jr selber ist/vnnd kan sich nit bergen.
Also auch wa der glaube ist/da kan er sich
nit bergen/Sintemal er ain gayst vñ ewi
ges ding ist/vnd bedarff kainer leer/wie er
gebaren vnd wircken soll. Zu dem so führen
die werck allain zum tod/ zum lebē künden
sy nit führen. Derhalbē wa ain seel an werck
gebundē wirt/an speyse/an tranck/so wirt

sy durch die selbige teufels lere/ wie es Paulus nennet. 1. Timo. 4. Zur helle verdampt die doch irer schepffung nach/ durchs ewigge wort gerayniget/ ain gayst vn̄ ewig mit Got sein solte/ Das will Paulus verhüten wenn er sagt / So lassent euch niemands gewissen machē über speyß oder über tranck etc. Dis̄ sey genūg geredt auff dis̄ mal/ von der lere des glaubens/ an welcher des menschen seele vnd gewissen hangen / vnd sich fahen lassen soll. Herwiderumb auch von der lere der werck/ von welcher sich dz gewissen nit soll fahen lassen / sonder über welche es regieren soll. Nun wollen wirs weyter sūchen/ vnd die lere von wercken in ire species vnd stücke taylen.

Don Ceremonien:

das ist / von eüsserlichen
wercken.

Ich will hie vmb der ainseltigen willen von dreyerlay Ceremonien vnd werckleren reden. Zum ersten von den die Gott durch Mosen gebotten hat. Zum andern/ vō den die im Euangelio nach der offenbarung Christi im flaische/ werden den glaubigen

zum zaichen geben. Zum dritten/ auch von denen die der Bapst gesetzt vñ gebotē hat.

Im geseze seind vil eusserliche werck vñ eusserlichs Gottes dienst gebotten/ als da waren/ den Sabhath feyren / darüb auch Moses Nu. 15. ainen stainigen ließ/ Mancherlay opfer opfern/ vñ auf ain yegklichs etwas sonders. Zum hepopffer brauchten sy honig/ vnd alles was man gessen mag/ zum opffer. Zum brandopffer müsten sy haben ain Ochsen/ lam/ gayß/ turteltauben/ vñ haustauben. Zū sündopfer/ ain jungen farren vñ bock. Zū speyßopffer/ semelmel/ öle/ vnd weyrauch. Zū schuldopffer/ ainen Wider. Itē im Aprill assen sy das Passah/ vñ die fladen Exo. 12. im Junio die pfingsten/ im September die hepopffer Leui. 23 Daher gehört auch die grosse Ceremonia der beschneydung. Item das in verboten war der fisch der kein schuppen hett/ Vnd der gleychen vil mer/ die ich vñ kürze willen nit will erzelen/ Dise so vil vnd mancherlay eusserliche Gottes dienste/ vñ kirchen geprenge/ seind von Got auff das volck geschlagen/ auf das sy daran lerntē/ wa sy es mit luste theten/ das Gott bey in were/

Wa aber jr hertz noch nit beschnitten/vnd
kein lust were da / so solten sy wissen jr vn-
vermögen/vnd derhalbē zū Got schreyen/
Das ware es auch / da er sy vnterweylen
von den Philistern vnd andern vmblichen-
den lenden überfallen ließ/ auff das sy se-
hen/jrer stercke halben/wie es mit inē ver-
loren/wa in Got nit hulffe. Darumb steet
offt in der schrift / Sy schreyen / vnd Gott
sandte in ainen hayland Psalm. 107. Also
desttet es Moses selbs Deute. 8. Gott hett
dich auß Egypten wol künden stracks fū-
ren/ in das land Canaan / Aber du soltest
gedencken / diser vierzig jar in der wūsten
auff das er dich demütigte vnd versuchte/
das kund wurde/was in deinē herten we-
re / ob du sein gebott hallten woltest oder
nit 2c. Er ließ dich hungern/ vnd speyset
dich mit Man 2c. auff das er dir kund thet
das der mēsch nit lebt am brot allain/ son-
der an allē das auß dem mund des Herzen
geet. Item im selben Capitel sagt Moses/
Auff das er dich demütiget vnd versuchte
das er dir hernach wolthete / du möchtest
sonst sagen in deinē herten / Mein krefft
vnd meiner hende sterck/habē mir diß ver-

müß außgericht / sond̄ das du gedechtest
an den Herren deinen Got/ den̄ er ist/ der
die kreffte gibt / vnd vermügen zuthun ꝛc.

Es seind zwü vrsachen / die dise geseze
regulieren. Die erste/ Die liebe der brüder/
Die ander/ die not/ den̄ wen̄ sich yemandt
auß schwachait ergerte/ das ain ander nit
beschnitten were/ so forderte die liebe/ das
er sich beschneyden liesse / auff das er seinē
brüder gewunne. Also hat sich auch Chris-
tus Luce. 2. nach dem geseze/ opffern vñ
beschneyden lassen/ Järlich gen Hierusalē
gangen ꝛc. Also hat Paulus seinen Junger
Timotheus beschnitten / vnd sich bescherē
lassen/ Act. 19. Darumb spricht Paulus. 1.
Corin. 9. Ich thet vmb der willē (vmb der
Juden willē) die vnter dem geseze waren/
als were ich vnter dem geseze/ wiewol ich
nitt darunter war / auff das ich die vnter
dem geseze waren/ gewunne/ vnd vñ der
willen (vmb der Hayden willen) die vnter
Eainem geseze waren / als were ich on ge-
seze/ Wiewol ich vnter dem geseze Christi
war / auff das ich die so on geseze waren/
gewunne. Christus haisset vñ diser vrsach
willen Petrü den Zol geben / wiewol er in

nit schuldig war / als ain Herre aller ding.
Item Mat. 12. vnd Luce. 6. sagt Christus
Des menschen sun ist ain Herre auch des
Sabbaths / deñ der Sabbath ist vmb des
menschen willen geschaffen (das er gütts
daran thue / vnd ain anderen radte vnnnd
helffe) vnd nit der mensch vmb des Sab-
baths willen.

Die ander ursache ist nott / also da die
Junger hungerte Math. 12. Vnd brachen
die feyre / da thetten sy kein sünde / Wie sy
auch Christus entschuldiget durch das ge-
schicht David / der die schawbrot ass / das
im geseze verbotten war / vnnnd durch den
vorigen spruch / Des menschen Sun ist ain
Herre des Sabbaths / Wer nu an des men-
schen sun Christū glaubet / der ist auch ain
Herre des Sabbaths.

Vnd wiewol dise geseze Mosi / vns hai-
den gar nichts angehen / sonder die Juden
allain belangen / So thete doch gleichwol
ain Hayde kein sünde / ja es forderte die lie-
be / weñ er merckte / das er yemandt damit
dienen künde / das er sich beschneyden lies-
se. Das aber alle Juden auch von disen Ce-
remonien loß sein / vnd kein gewissen dauß

machen sollen / sy thun oder lassen sy / beweysen das. 7. 8. 9. 10. 11. Capitel zum Hebreern / dauon wir droben auch geredt haben / vnnnd S. Paulus in allen seinen Episteln / Roma. 3. vnd. 4. Gala. 4. Vnd hie mit klaren Worten / Lasset euch nyemandt gewissen machen / über Sabbathen oder Newen monden / weder über speys noch über tranck. Item / wenn auß den wercken des gesetzes (das ist / die das gesetz gebeüt) kompt gerechtigkeit / So ist Christus vergebens gestorben.

Von des Euan:

geli Ceremonien.

Das Euangelion hat nur zwü Ceremonien / Tauffe / vnd den leyb vnnnd das blüt Christi / Vnser natur ist alzeyt zu schwach / vnd kan ain schlechten wort nit glauben / Darumb hat Got durch Christu zway zeychen an das wort gehefftet / das wort vnd vnsern glauben damit zübestetigen / Was Tauffe sey / vñ was sy wircke / ist droben im ersten Cap. gesagt. Was das Sacrament des flaischs vnd blüts Christi sey / will ich sagen / neben dem myßbrauch des selben.

Von des Papsts

Ceremonien.

¶ Wiewol nun zwü Ceremonien seind /
Taufe / das fleisch vnd blüt Christi / noch
haben sy müssen herhalten vnd zum miß-
brauch vnd Gotslesterung geratten / Der
Papst hat jr also braucht / das er die leute
durch gemaine pfarrer vñ Priester täuffen
ließ / Aber die glocken müstē seine Bischof-
fe täuffen. Wie solt man aber Got grösser
vneere thun / denn das er das / dadurch die
seele soll von den banden des teuffels vnd
den sünden loß werden / wende zu Glocken
weyhen / das weder leib noch seele hat / den
es ist also vil gesagt / wen sy glocken weyhē
als / Wir suchen hie gelt / hetten wir das /
wir wolten die tauffe wol zu fryden lassen
Die sünde werden vergeben / oder nit ver-
geben. Dise Gotslesterung des newen Te-
staments / ist durch den Papst auffkömen /
Ob sy aber nit stracks wider Christen sey ?
Zehe du an deinen selbs fingern / Christus
sagt / gehet / Predigen allen Creaturen das
Euangelion / Wer da glaubt vñ getaufft
wird ic. Der Papst sagt / geet hin / prediget

allen Creaturen / Wer da glaubt das das
gelt/ das man zur tauffe der glocken gibt/
hailig sey/vñ sein am maisten gibt/der soll
selig werden/ O ho/Widerchust. Zum an-
dern / So begunten die rotten gayster vor
vier Jar/zü zweyffeln/ ob den wortten des
Euangelij/vnnd ob man auch die Kinder
tâuffen solte/dieweil sy kain vernüfft het-
ten/den der teüffel sahe/das das Euange-
lion einryß/ vnd gewan jm vil leute ab/da
begunte er zutrachtē/ wie er dem wort ain
schaden thete/ vnd die hergen der mensche
vom wort Gottes vnd glauben/ in die ver-
nunft füret/ Vnd als bald/ wen das ge-
schicht/so ist vernunft mit irem liecht ge-
fangen/folget der lügen vñ wirt verführet/
Es ist ye war/ye grösser vnd scherpffer die
vernunft ist im menschen / ye weniger sy
glaubt / vnd ye mer sy wider Gott strebet/
wie Paulus sagt / Der natürlich mensche
versteet nit was Gottes ist/ Mat. 11. Ich
lobe dich Vatter / das du dise ding vor den
weysen vñ klügen diser welt verborgē hast
vnd den vnmündigen offenbart / Vnnd ye
weniger vernunft in kindern ist/ ye mer sy
pfehig seind der gnadē vnd hailigē gaysts:

Wem Gott die gnade thüt/ das er in laßt
zum gehöre des worts kōmen/ der ist gene-
sen / Er sey jung oder alt / denn sein wort
geet nit vergebens auß/ Es kommet auch
one frucht nit wider / Diser gayst ist müde
worden an disem stücke / vnd fiel darnach
auffs flaisch vnd blüt.

Die ander Ceremonie ist der leyb vnnnd
das blüt Christi. Hieran hatt der Teuffel
auch sein hayl versucht zwayerlay rotten/
Die erste rotte ist der Papst mit den seinē/
Die nemen das flaisch vnd blüt nitt weg/
aber sy myßbrauchens/ machen ain opffer
drauß/vnd geben Gott / da sy holen sollen
von Got / vnd von denen wōllen wir yetz
und allein reden. Die andere rotte ist auch
des lügengaysts/der von der tauffe also ge-
narrt hat/dise laßt flaisch vnd blüt Chri-
sti nit sein/vnd wiewol jr maynüg güt ist/
denn sy sagen / Wa man das flaisch vnnnd
blüt Christi vnd die Messe lasse also bley-
ben/so stee der Papst noch/ man müsse al-
le stücke des Papsts noch haltē / wa man
diß nitt hinweg thue/ Aber jr mainung ist
auß der lügen geboren vnd verführet sy / die-
weil sy von der warhait vnd den ainfeltigē

worten der schrift abweychen / Zu dem / so
laßt sich der teuffel mit liegen nit überwin
den / Erst jr zu wol gewonet / von disen
wollen wir ain ander mal reden / weñ wir
mer zeýt werden haben.

Von der Messe.

Der armen ainfeltigen zum dienst / will
ich zum ersten anzeygen die Natur vñnd
substanz der Messe.

- 1 Was Messe sey.
- 2 Wer rechtschaffen Messe halte.
- 3 Vñnd wie man solle Messhalten / dar
nach vom myßbrauch.
- 4 Das wort Messe / ob es wol in der ges
chrift nit stehet zu disem brauch / will ich
bleyben lassen / den es gibt noch nympt der
sachen nichts.
- 5 Messe ist die gemainschafft des leybs
vñnd blüts Christi / das ist Christus flaysch
essen vñnd sein blüt trincken.
- 6 Die halten aber Messe / die des flaisch
vñnd blüts Christi genessen / empfahen / ho
len / opffern nitt / geben nitt. 1. Corinth. 11.
So offte jr das thüt / so thüt es in meinem
gedechtnuß.

7 Die Messe soll gehalten werdē / wie sy Paulus beschreybet. 1. Cor. 11. vnd. 10. Das man in der gemaine / das er Kinonian die gemeinschaft neñt / ain gemaine nyessung predige / das zaichē reychē / vñ andern gebe Den so spricht Christus / So oft irs thūt / so oft solt jr meins todts gedenccken / vnd den verkündigen biß er kompt / das ist / predigen warumb Christus gestorbē vnd sein blūt vergossen habe. Itē das brot das wir brechen / ist das nit Kinonia / die gemaine nyessung des leybs des Herren ? Der kelch der benedeyung den wir segenen / ist der nit Kinonia / die gemaine nyessung des blüts Christi ?

8 Wa nun Christus Prediget wirdt / da findt man sterben vnd aufferstehen / trost vnd stercke des gewissens.

9 Wer sein sünd empfindet / vnd bedarff hilffe / der lauffe da zū vnd hole es / Es sey paffe oder laye / denn der helt Messe.

10 Also hat Messe zway stücke / Das predigen vnd verkünden den tod Christi / vnd die nyessung des flaischs vñ blüts Christi / das ist der rechte brauch. Also wollen vnd sollen wir sy leiden / Christlich vñ Götlich:

Von myßbrauch.

11 Syhe aber nun weyter zû/ Die weil die
senyessung allain auß glauben geschicht/
der durchs wort vnd leypliche zaychen ge-
stercket wirt/vñ trost empfalet/Das also
warhafftiger das brot yßset/ vnd das blüt
trincket/ also war seind im die sünde verge-
ben durchs sterben vñ blüt vergiessen Chri-
sti/wie denn die wort lautten / Diß ist der
Kelch des newen Testaments in meinem
blüt/das für euch vergossen wirt zur verge-
bung der sünden. Darzû dieweyl ain yeder
für sich seins glaubens halbē geniessen muß
Haba. 2. Roma. 1. Der gerechte wirt seins
glaubens leben/ So kan nyemandt für ain
andern Mießhalten/ Den so wenig ain an-
derer für mich glaubē kan / also wenig kan
er auch für mich Mießhalten/ das ist/ des
flaisch vnd blüts Christi genyessen/vñ mir
mein erzney für mich oder ainandern ne-
men vnd entziehē / Ain yeder muß für sich
den trost nach der masse seins aygen glau-
bens empfaen.

12 Darumb ist es ain grosse Gottslester-
ung vñ Teufflicher myßbrauch/ das

man für lebendige vnd todten Messelt:

13 Christus flaisch essen vñ sein blüt trincken geschicht / die gewissen auffß wort zû bawen / wie denn auch die wort lauten / Nemet esset / nemet trincket / vñ nit / gebet opffert / Denn wie droben gesagt ist / Gott hat von anbeginn der welt alwege an sein wort ain zaichen gehefftet / welchs zaichē / das wort bestetiget Rom. 4. sagt Paulus / Abraham hat die beschneydung empfangen / wie ain Sigil der gerechtigkeit.

14 Dieweil aber hie steet / Nemet / Eßet trincket / So kan vñ sol im nyemānts selbs diß zaichen geben / Es soll auch niemānts auff ain winckel kriechen / vnd im ain aygens machen / wie die pfeler pfaffen thûn.

15 Es gehören jr vil darzû / So ist es ain Kinonia / ain gemeinschaft / Es soll vor der gemaine von vilen gebraucht werden / Da ainer nympt / der ander gibt.

16 Sehet aber zû / Ich will euch hie auß irem aygen büch lesen / was für gewel inn dem stück der Messe ist / das sy haissen den Canonē / welchen sy niemānt haben dürfen sehen noch hören lassen / sonder die still messe genandt / Auff das ja der teuffel hie

recht behielte/ vnd niemandt erfüre.

17 Es steet in ainem Secret vom ersten Sontag nach dem Obersten/ also/ vō brot vnd weyn/ ee es gesegnet wirt durchs wort Herre diß opffer das wir dir auff opffern/ wölle vns allzeyt lebendig machen vnd bestettigen / Da bitt der arm mensch Gott/ vnd seinem sun zū spott / das in brot vnnnd weyn solle lebendig machen / das allaine Gott vnd seinem wort zūgehōret.

18 Item im grossen Canon stehet also/ Derhalbē gedenc̃ken wir Herre deine knechte vnd dein hailiges volck/ desselbigē deins suns Christi vnfers herren/ vñ Gots seliges leydens/ der aufferstehung von todten/ vñ auch der hailigen auffart gen hymel / vnd opffern deiner grossen maiestat vō deinen gaben vnd geschenckē / Ain raynes † opffer/ ain hailiges † opffer/ ain vnbesleckts † Ain hailig † brot des ewigen lebens/ vñ den Kelch † des ewigen hayls/ vnnnd das du woltest mit genaygtem vnd gnedigen angesicht/ auff dise alle sehen / vnd dir die selben gefallē lassen/ wie du dir auß gnadē hast gefallē lassen/ die gabē deins knechts des gerechten Abels ꝛc. Item/ wir bitten

dich demüthigklich Almechtiger Gott/du
wöllest befehlen das dise ding alle getragē
werden mügen durch die hende deines hai
ligen Engels auff deinē allerhöchsten Al
tar / für das angesicht deiner Göttlichen
maiestet 2c.

19 Pfu dich teuffel/pfu euch madenseck/
scheme dich/scheme dich Teuffel/schemet
euch alle Pfaffen vñ Mönch/solcher gros
sen Gotslesterung/ Das jr so küne seyt/vñ
für Got trettet/vor seinē lieben sun Jesum
Christum/der der gnade thron/fürspreche
vnd rechte Bischoff ist/durch den Got im
selbs alle ding verainiget hatt / vnd durch
sein blüt gerainigt Ephe. 1. Colo. 1. zūbittē
Er wölle jm durch ewer fürbitte willen/
gnedig vnd hold sein / vnd setzet euch über
in/gleych als bedürffe er ewer fürbitte vnd
hilffe/vñ jr bedürfft sein nit. Pfu dich teuf
fel/ pfu dich pfaff vnd Mönich noch ain
mal/der grossen Gotslesterung/ danor sich
die erde solt auffthün/vnnd euch alle ver
schlinden/Solt doch ain das hertz zerbre
chen/ wenn er solch lesterung hören muß/
die doch mit ain solchē schein verthediget
vnd vntergetruckt wirt. Aber hie ist jr ays

gen Büch / darauß lese ichs / dürffen sy es
schreyben vnd drucken / Gott zů schanden /
So dürffen wirs lesen vñ verkündigē dem
Teuffel zů schanden / vnd Gott zů eeren /
Das ist die hailige Messe / Wer hette das
gemaint / Wer kan jr nu forthin hold sein ?
Ich nitt / das helffe mir Gott.

So will allen Christen auß pflicht irer
gewissen gebüren / so lieb in das blůt vñnd
sterbē Christi ist / das sy wider disen grewel
tag vnd nacht bitten / das Gott dem teufel
wōre / den es ist ain sünde zum tod / vnd
wider den hailigen gayst / Den es will sich
nit anderst leydē / dieweil es strack's wider
die hōchste gabe des hayligen gaysts ist /
Dathan vñnd Abiram vnterstünden sich
auch on befelch Got zů opffern / da bettet
Moses wider sy vnd spricht / Domine ne re
spicias ad sacrificia eorū. Herre nym jr opf
fer nit an / Denn alles was sonst für sünde
geschehen / wider die andere Tassel des ge
setzs / als Lebruch / mord / dieberey zc. Für
die müssen wir bitten vnd sagen / Herre ver
schone sein / schencke den menschen ire sün
de zc. Aber wider die die strack's wider Got
vnd seinen sun leren vnd thūn / Ja / Vatter

vnd sun in die zene spotten / vnd des haili-
gen gaysts gabe vnd lere verachtē / müssen
wir bitten / vnd sprechen / Herre wöre dem
teuffel / laß dir jr lere vnd opffer nit gefal-
len / Das thut David auch Psalm. 39. Ich
will / spricht er / derer die vom blütte seind
tranc opffer nit opffern / Vñ jres namens
will ich mit meinem munde nit brauchen /
das ist / Ich will jr ding / weder preysen / lo-
ben noch leeren

Ain priester der nit absteet von solchem
grewel / soll ye von niemandt gehöret wer-
den / den so das ain todtschläger ist / vnnd
am todtschlag schuldig / der zū lieffe so er
sehe das ain ander ainen tödten wölt / vñ
hulffe jm den todtschlag vollbringen / vil
mer wirt der schuldig an dem tod des suns
Gottes / der zū laufft wa ain priester / Got-
tes sun / Jesu Christ / vō newes Creüziget
vnd tödtet / vnd hilfft dise Gottslesterung
durch sein beysteen stercken vñ got lestern.
22 Es seind etliche die sprechē / Sy seyen
nit darbey / das sy es stercken helffen / son-
der sy haben meer andacht in der Kirchen
hinder der Messe den sonst / zū den wollen
wir also sagen / Wer dem teuffel nit folgen

will/der sihet vnd höret jm nitt zū. Item/
wer die ferligkait liebet/der wirt in jr ver-
derben/Vnd will er ye etwas thūn/so setze
er Christus radt über sein güt dancken / vñ
verfürliche andacht/ vñ thū wie Christus
sagt/Wiltu den vater anbetten der im hy-
mel ist / so gee in dein kamer vñ schließ die
thür hinter dir zū ic. Vnd wen etliche sagē
Sy halten messe im glaubē/so ist es eben al-
so vil/als sy brechen die E im glaubē/den
ains ist eben so müglich als das ander.

23 Es künden die falschgaystliche selbs
nit leignen/das auß der Messe ain lauter
Jarmarckt vñnd handthierung mitt dem
flaisch vnd blūt Christi worden sey/den hie
verkauft man Christū den hailigen gayst/
gnade/den himel/das leben/die vergebung
der sünden/erlösung von der hellen/vñnd
Segfrewer / vnd stehet in ainem wol faylen
kauffe/ alles was Got hat vnd ist/vñ nie-
mant wirt außgestossen von diser wechsel
banck/denn allain der/der nit gelt hat.

24 Wie ist kain plage so groß / man kan
sy mit gelt in der Messe abwenden/ es sey
franchhait des leybs/ gebrauch an narung/
vyhe/ vnd alles wes sich die menschen ge-

brauchen/ Ja hie ist ain Apotecke auffge-
richt/wider alles vnglück auff erden / ain
offner schlund/grab vnd helle züberaytet/
alles vnfalls das vns begegen mag / vmb
ain groschen od halben/vngeachtet ob der
der gelt gibt / gütt oder böß sey / er fürchte
oder fürchte got nit/ Er glaube Got oder
nit/ Er betriege die leütte oder nit/vnd die
grösten wücherer / hendeler vnd finantzer
haben hie am maysten zugeben.

25 Vnd im fal/das etliche frum sein ge-
wesen per impossibile/so ist doch der stand
kainnütze / dieweyl er aygentlich auff gelt
gegründet ist / Das wa kain gelt da were/
so wurde nyemandts kain Messe nymmer
mer haltē/Ja wir woltē alle Pfaffen bald
bereden/das sy abliessen / wen wir in kün-
den/oder ire stifter wolten/ zusagen / Es
solte in kain pfenning abgebrochen werdē.
Auch wen es schon alles güt were/so were
doch das genug / das die Messe zu boden
stiesse / das es auff ain nöttigs werck auff
drey vnd vier tage gesetzt vnd geordnet ist/
das man nit soll überschreyten.

26 Rezund sihet man dz vor augen/das
man nun nymmer Pfaffen vñ Mönche

soll haben/vñ Got dem teuffel wören will
nyemañt sein kinder studieren will lassen/
vnd Got zū eeren opffern ire kind/mit leer
vnd vnterweysung irer jugent zum gūten/
die sy zūvor dem teuffel ganz vñnd gar zū
aygen geben habē/da sy Mūnich/Pfaffen
vnd Tūnnen wurden.

27 Es ist diser stand wider den glauben
Gottes wort wie wir yetz gesagt haben/
vnd aufs sterckest wider die liebe/den̄ er ist
nit gestiffet yemañt damit zū helffen/son
der wie die schweyn koben vnd kūw stelle/
sich darinne zūmesten/das sihet man/wie
sy vmb sich fressen/zū sich tragen vñ schar
ren/was sy künden/vnd wa sy regieren/da
kan kain man gedeyen. Es ist auch kein po
licey vnd gūte ordnūg da/ Den̄ stiffe/Clō
ster/vnd klāusen/seind nichts den̄ des teu
fels hūrhewser / Wie auch das sprichwort
lautet/ Wer sein hauß will haben rayn 2c.

28 Vnd wen̄ schon diß zūduldē were als
menschlich/ so kan doch das nit verschwi
gen sein/das sy nymmer kain gūt gewissen
ūberkōmen/das sy selbs sagen müssen/wie
wir droben gemelt haben / von Johanne
Gerson/ vñ yetz durch ain geschicht berwey

sen. Es wissen die Juristen / wer Joannes
Teutonicus gewesen sey / der die erste glose
über das Decret gemacht hat / den sy sonst
hayssen Magister Seneca / Diser ist zu Lu
beck vnd Cölln probst / zu Halberstat De
chant gewesen / da er auch begraben ligt /
Vnd da er hat sterben sollē / hat er gesagt /
Wir haben gehapt in vnserm lebē / die für
vns seind zu Chore gangen / die für vns ha
ben den acker erbawet / die für vns haben
Messe gesungen / vnd horas Canonicas ge
bettet / Wa wöllen wir nun ainen nemen /
der für vns in die helle fare / vñ wir erlöset
werden? Das ist der lon solchs diensts. Al
so geet es dahin mit allen werckhailigen /
wen das gewissen begiñt vnruwig zu wer
den / vnd hat kainen andern trost nit denn
werck / so muß es verzagē. Werck seind zeit
lich / kappen / platten / essen / trincken / meß
halten / horas betten / zu Chor stehen / seind
zeytlich vnd leyplich / Das gewissen bleybt
ewig / vnd ist gayst / Darumb muß es ain
höher / Gaystliche stöne haben / denn die
werck seind / solles besteen vor Gottes ge
richt / vnd nit vntersinken.

29 Es wirdt auch diß gelt nit gewendet

zum nütze armer leute / sy tragen auch die
gemainē burden nit / sonder seind teuffels
frey / vnd ist alles dahin gericht / das diß
volck gnüg habe / im sausse lebe / Vnd auff
das sy ja on alle straffe vnd schew mügen
hürerey / eebruch alle sünde vnd schande ye
ben vnd treyben / so seind sy der weltlichen
gewalt / welcher Got alle seele vnterwirft
Ro. 13. entzogen / vnd haben aygen richter
vnd regentē / die sy zū iren sünden vñ schan
den schützen vnd handhaben / bleyben vn
gestraft / treybē ire schande vnuerschampt
Got vnd aller welt zū schanden / vnd wöl
len doch gleychwol für frum vnd hailig ge
halten sein . Dem teuffel ist die schanze ge
ratten / Er hat ain gütte beutte überkom
men / Es geet jm wie er selbs will / Vnd ob
sy wol in solchen sünden vnd schanden le
ben / aller welt ire weyber vñ tōchter schen
den / so geen sy doch gleychwol teglich frech
truncken / vnd vol laster zū der Messe / das
ist / in ire kauffbuden / verkauffen / metzen
vnd schlachten den lieben Christū / vnd nie
mandt ist der kauff gewegert / den dem der
kein gelt hat / Judas verkauft in vmb. xxx
silberling. xxiiij. gulden vnser münze / diß

zhün es vmb. 6. 8. pfenning ain halben vñ
ganzen bagen.

30 Dise lesterung/sünde vñ schande/ we
re genüg/ wie sy auch layder thüt/ Gott zñ
zorn zñ rayzen/ als er auffrür vnd alle vn-
glücke über vns laßt kōmen / vnd vns thū
wie Sodomē vnd Gomorrē/ die er in feür
erseuffte/ noch fragen wir/ Wa von solche
plagen herkōmen? vñ wōllen es dem Euā
gelio/ das fride vñ ainigkait leeret/ vñ alle
auffrür verhütet/ schuld gebē/ Aber es soll
die welt also blind sein/ vñ iren aygen scha
den nit erkennen/ Den es ist ye blindthait
über blindthait dz man dise Gotslesterung
in dem stande/ noch verthedingen will/ vñ
mit sehenden augen zum teufel faren. Das
Conciliū Neocesariense hat disen schaden
das man mit rechtschaffnen dienern / die
sich nach kriechischer weise Diaconos nan
ten/ diener an der gemaine vnd am Euā
gelio / verhütten wōllen / vnd beschlossen
das auch in ainer grossen stat/ als Medio
lanum war / nit mer auffß höchst denn. 6.
Diacon sein soltē / zñ predigen vnd den leu
ten zñ dienen/ das man die leutte mit übris
ger koste nit beschwerte/ yetz krimmet vnd

wimmet in allen winckeln/wie das gewür
me von Pfaffen vnd Mönchen/vnd man
zelet sy mit tausent.

31 Die Fürsten / der Kayser vnd andere
weltliche oberkaiten haben befelch vō Got
darumb sy auch das schwert tragen/ mör
der vnd Lebrecher mit dem tode straffen.
Sy haben aber vil mer gewalt die Gotsle
sterer zū straffen/vnd allen solchen grewel
in iren lendern zū dempffen vnd abzūthūn
auff das sy dem schwindē zorn vnser s Herz
gots/der auf sy dringet mit gewalt/ möch
ten entlauffen/Sy solten aber ain ordnūg
machen/das man denē das wort auff den
halß legte/ die darzū tüchtig weren/ Den
andern jr lebenlang jr Zinse geben / das sy
nit mer Messe hielten/ vnd Got nymmer
lestern/den sy zūuoꝛ geben haben/auff das
sy Gott lesterten/ den es seind doch nichts
denn schalantzer/ müßigenger vnd bauch
diener / vnnütze leutte/ die die erde verge
bens tragen müß/jr lebenlang.

32 Der gröste schade diser blindthait ist
das sy vermainē eben in der größten Gots
lesternung gleychwol selig zūwerden.

33 Gott hat durch Mosen ain schlange

auffgericht/doch da sy zum myßbrauch ge-
riet / reiß sy der König Ezechias heraber
vñ macht sy zū puluer. Also soll mans mit
der Messe auch halten/ dieweyl sy zū ainē
solchen grewel geraten ist/ Denn ist ihens
geschehen auß Gottes befehlch / vnnd ist
doch außgerott/vil mer die Messe/die auß
Gott nit ist/ sonder vom teuffel/wa sy nit
geschicht dermassen wie wir drobē erzelet
haben/im anfang.

34 Hierauff maine ich/ verstee man auß
was grunde yezund von vilen wider die
Messe / als ain Teufflich Gotslesterlich
werck so stattlich geschribē vnd geprediget
wirt/das sich ja yedermenniglich darnor
hütte/ vnd darnor fliehe wie vor dem teuf-
fel selbs/ Amen.

Von den Andern

Papst Ceremonien.

Es ist auch Gotslesterlich gehandelt/
das er seyn Tyranny vnnd Teuffelische
gewalt zū bestettigen wider Got / ain ay-
gen volck im selbs erwölet hat / vñ auß der
gemainen Kirchen der ganzen welt seinē
stuel gen Rom gesetzt hatt / darauff denn

Secten/ir: sal/teuflische sagung/ leyb vnd seele der Christē damit zur helle zūschwemmen/nothalben haben folgen müssen.

Daher ist kōmen/wie yetz gesagt ist/der grewel von der Messe / die Christus blūt vnd sterben gantz vnd gar auff hebet / Daher ist kōmen/die taylung der tage/die fasten/das man auff disen vnnnd ihenen tag nit solle flaisch essen/bey ainer todsünden/Daher ist geflossen / die vnkeusche keuschhait der pfaffen/Nunnen vnd Mūnich/Teuffels breütte vnd breütgā/zur beschwerung der gewissen / so doch die gewalt der Kirchen allain zur besserūg geschehen soll wie Paulus gebeüt. 2. Cor. 3. vnd diser text zwingt/Last euch niemañt gewissen machen ꝛc. Das kein mensch gewalt habe/er sey den der Antichrist selbs/etwas zūgeboten oder zūuerbieten/bey ainer todtsünde.

Vnd hie stost es sich / vnnnd künden des Bapsts gesetze nit besteen vor dem Euangelio / den das Euāgelio will die gewissen frey haben/so will sy der Bapst binden/vñ beweyset mit der that/dz er der Antichrist sey/Die gewalt des Euāgelij soll sein zum baw vnd besserūg der gemaine/ so bräuche

er der gewalt zur verstorung vnd zertren-
nung der gemaine. Sant Paulus sagt hie/
Man soll sich allain mit dem wort Got-
tes binden lassen im gewissen/ vnd sonst
mit keiner creatur/ wenns auch gleych ain
Engel were/ weder mit speyse noch tranck
noch klaydern / auch nit mit dem Sabbat
Der bapst sagt/ wenn du am freytag flaisch
yssest/ so hastu gesündiget/ vnd Gott wirt
dich straffen/ Das ist Christus vñ Belial/
freyhait vnd knechtschafft/ liecht vnd fin-
sternuß.

Darumb ist das die mainung/ Alle Ce-
rimonien in der gemaine/ die man vñ der
Kinder willen haben muß/ sollen frey sein/
also das die gemaine macht habe/ die selbi-
gen auffzusetzen vnd abzuthun/ es sey sin-
gen/ lesen/ klayden/ essen/ trincken/ feyren/
fasten / darnach sichs ant besten schicken
will/ Vñ ist fast übel gehandelt/ wenn man
ain gebot/ wie d Bapst thon hat/ schlecht
auff den gangen hauffen/ das/ wer das ge-
bott nit helt/ sündige vnd übel thû/ den es
soll frey sein.

Ist nun yemandt mitt der Teufflischen
Messe verhafft/ als die Priester/ vnd mit

gelübden der Keuschheit / wider Gottes
schöpffung beschweret / als die Mönch vñ
Nunnen / auch mit speyse / trancke / vñ feyr
tagen / Der soll wissen / das / wa er des ge-
wissens nit loß vnd frey wirt / durchs Euā-
gelion getröstet vnd gefreyet / vnd nit her-
auß kompt / der kan nymmermer Gottes
kind werden / Aber er sehe auch zñ / das ers
auff Gott wider den teuffel anfahet / vñnd
das ers ja nit anfahet auß einer gewonhait
dz er sihet / es thün es vil / es geen die Mön-
che vnd Nunnē auß den Clöstern / Es ys-
set mein nachbaur flaisch / ich wills auch
essen / Sonst kans ain Wolff vñnd Hund
eben also wol / Sonder mit gewissem grun-
de der schrifft vnd Gottes wort / dadurch
er starck werde wider den teuffel / für Got
zutrugen / Das man feyn stille vnd seuber-
lich mitt forcht in disen stucken / ob sy wol
eusserlich seind / vnd doch nöttig vor Gott
handele / welcher das rohe / vyhische vñnd
wilde leben nit haben will.

Vñ das wir das auch nit vergessen / Die
freyhait die das Euāgelion prediget / geet
allain das gewissen an / die sele / das herze
vñnd betrifft mitt die hand / den bauch / den

fuß / Ja Chriſtliche freyhait engeſicht die
ſeelen dem teuffel / vnd gibt ſy Got zu auge
Den leyb / das gut / vnd was euſſerlich iſt /
gibt ſy der oberkait zu auge / der wir ſchul
dig ſeind / ſchoß / rendte / Zinſe / hoffdienſt
vnd das leben zulaſten / wa vnd wen ſy es
fordert / allain darub / das ſy ſoll fryde hal
ten / Vnd wen die oberkait wütet / raubet /
ſchindet / ſchabet / frißt armer leut ſchweiß
vnd blüt / ſo thut ſy wie die ſchriſt vñ jr ſa
get / die die Fürſten heiſſet Montes pædæ
cionum / raube berge / vnd Sotios furum /
im Jeſaia / geſellen der diebe vnd mörder /
Denn wenn Got ain land hoch begnaden
will / ſo gibt er im ainen Fürſten der fryde
macht vnd helt. Herwiderumb wen er ain
land auffſs höchſte ſtraffen will / ſo gybt er
im ainen Tyrannen. Darumb haben die
bauren vnrecht / vñ ſeind durch den teuffel
verfüret wordē / die diſe freyhait des gewiſſ
ſens vnd der ſeelen vor Got innerlich / wol
ten gelten laſſen vor der welt vnd oberkait
euſſerlich / Es ſeind dem flaiſch vnd blüt
harte ſprüche die Chriſtus ſagt / Gebt dem
Kayſer was des Kayſers iſt Mathei. 22.
vnd. 10. Ir ſolt die nit fürchtē die euch dem

leyb künden tödten. Da er über vnser leben
den Tyrannen gewalt gibt / Vezund kan
man den zornigen tollen Fürsten nit wyr-
ser thun / den wenn man jr aigen schwerdt
wider sy gebraucht / vn̄ sagt. Ich will mich
vor dir nit fürchten / denn du wirst mir die
seele nit nemen / wen̄ du mir schon den leib
nympt / Den̄ die Christen brauchen allait
diser gaystlichen freyhait recht wider das
flaysch / Die vnchristen brauchen jr aber
flaischlich / wider den gaist / Darumb thun
vns die lestermeuler vnrecht / vnd liegens
(mit vrlaub) auff vns / das wir zu auffrur
predigen / vnd die leut vnruwig machen.

Vom Ergernuß.

Den spruch den Christus sagt / Es müs-
sen ergernuß kômen / Wee aber durch wen
Vnd den S. Paulus schreibet 1. Cor. 11. Es
müssen spaltûg sein / auf das die / so bewert
seind / offenbar vnter euch werden / sayget
an / wie ain grosse ergernus sey der lere hal-
ben / vnd welche hie ergernus vnnd rotten
machen / vnd vō der raynē lere abfallē / die
seind nitt bewert / vnd man muß dieselben
faren lassen / vn̄ sagen / wie Christus lernē

Sinite 2c. Last sy gehen / sy seind blind vnd blindenlayter / Das geschicht aber / das sy von der raynen lere abfallen / weñ sy die gewissen anders den auff Christū allain führen / In des Papsts vnraynen lere vnd rotterey / seynd zway fürnemliche stücke die man muß überschreytē / es stosse sich dran wer da wölle / dieweil sy one mittel der raynen lere vnd also Got entgegen seind / vnd muß aintweder Gott verleügnēt werden oder sy müssen überfaren werden.

1 Das erste stücke ist die Meß / die Christus leyden vnd sterben hinweg nympt vñ verlestert wie dioben gesagt ist.

2 Das ander stücke seind die Clöster gelübde / das gelübdt des gehorsams ist wider das vierdte gebott / da Got den eltern befiehlt die kinder zucht / vnd das man in thū / was sy vns gethon haben / Der dienst vnd gehorsam der eltern ist hie durch verlestert vnd Gott verachtet / Das gelübde der keuschait ist wider Gottes schöpfung vnd gebott / das / wa ain mändlin ist / da soll auch ain weiblin sein / vnd herwiderüb auß not der schöpfung / Zu dem so erweyset der spruch Mat. 22. das die natürliche

zichtung mans/weibs vñ der kinder müsse
nothalben sein / dieweyl die menschen hie
leben auff erden / Darnach aber werden sy
sein / wie die Engel Gotes. Item Christus
Math. 18. freyet niemandt von diser not /
den allain die von Got die hohe gnad der
keüschait habē / Aber die seind selzam / Vñ
man sihet nun vor augen / wazü der stand
vnd das gelübde geraden ist / dennes ist
doch erger worden / Natur laßt iren gang
vñ fließen doch nit / man wöire jr wie man
wölle / Sodoma vñnd Gomorra ist in die
Clöster gepflanzt / Gott rotte sy auß mitt
fewer / Amen.

Da gelübde der armüt ist wider Gotes
gebot / da er spricht / im schwayß deins
angesichts soltu dein brot essen. Den gayst
liche vnd Christliche armüt steet im geben
vnd nit im nemen / Ephe. 4. Wer gestolen
hat der steele nymmer / sonder er arbayte /
vnd schaffe mit seinen henden etwas red
lichs / auff das er habe zü geben den dürff
tigen Prouerb. 5. sagt Solomon / Trinck
wasser auß deiner grübē ic. Arbayte schaf
fe vnd halt dein gütt zürate / das dein an
der leutte genyssen künden.

In den andern stücken/als da ist flaisch
vnd fisch essen/ soll man schon faren / vnd
vmb der schwachen willen etwas nachge-
ben/wie die sprüche Pauli lautten Ro. 14.
Ergere den nit vmb welchs willē Christus
gestorben ist/vnd. 1. Cor. 8. Ich meinē
brüder wolt ergern/Ich wolt ee nymmer
kein flaisch essen. Den so man yemañt
gewinnen möcht/vnd an den örtern were/
da Christus wort nye ist gehört worden/
so soll die liebe in allen disen stücken dienē/
vnd seiner freyhait nitt brauchen vmb der
andern willen/ die wir tragen müssen/bis
so lang sy auch starck werden.

Wie ist aber die frage / Wer schwach vñ
nit schwach sey? vñ wie lang man soll den
schwachen zügüt halten vñd sy tragen?
Darauff ich nitt kan gewiß antwortten/
Den der dienst der liebe ist an kein zeit/per-
son noch stette gebunden/sonder ergibt vñ
ergeüßet sich/an allen örtern / wa man jr
bedarff. Aber das kan vñ muß ich schlies-
sen/Wa krankē seind/da ist's zeyt/vnd die
also krank seind auß schwachait vnd wol-
ten gerne stercker sein / vñ nit auß bößhait
Darumb wenn vnser Juncfherin wollen

mit gewalt drauffdringen. Man solle es
thûn/ vnd wöllen also ain nott drauß ma-
chen / Das weñ wirs nit thûn vnd enthal-
ten vns des flaisch essens auff den freytag
nit/ so sündigen wir wider Gott/ So sagen
wir/ Nayn/ wir sündigen nit/ vñ wöllens
nun nur dester meer thûn / vnsere freyhait
wider iren trug vnd Tyranny zû gebraus-
chen/ die weyl Christus sagt/ Was zû man
de eingeet das befleckt den menschen nitt/
Den weñ wir hie weychen / vnd lassen ain
not machen/ da kaine ist/ so verleügnē wir
Got vñ sein Euāgelion/ das an disen din-
gen kain not leyden kan/ wie der text lau-
tet. Laßt euch nyemānt gewissen machen
weder über speyse noch über tranck. Vnd
wenn sy weyter sagen / Es gebe ergernus/
vnd Sant Paulus spreche / Le ich wolt
meinen brüder ergern / Ich wolt ee verres-
den flaisch zû essen. 1. Corinth. 8. So ant-
worten wir also / Sant Paulus redet von
brüdern/ Sy aber seind nitt brüder / wider
die wir handelen / Sonder sy seind verfol-
ger/ Denn ain brüder laßt sich weysen vnd
folget / Wenn man in ain mal oder zway
drey vermanet/ vnd ains bessern erinnert/

steet auch endtlich seins irthumbs abe/ Di-
se aber lassen in weder singen noch sagen/
Die sache des Euangelij ist nu auff dreyen
Reychstagen/ vnd schier auff vieren offen-
lich gehandelt vnnnd verhöret worden/ zū
Augsburg erstlich/ Hernach zū Wormbs/
vñ zū Nürnberg/ Vezund hie zū Speyer/
zū dem/ so ist es zū allen landē geprediget/
durch den druck außgebrayttet / das kein
winckel in Teutschen landē ist/ man waist
hieuon zū singen/ vnd zū sagen. Noch wöl-
len sy brüder sein/ vnd man sihet/ das sy ye
lenger ye serer darwider toben vnd wüten.
Es ist auch über das alles auch das mira-
ckel/ dz sy billich zur büsse raytzen solt/ Das
dise lere obgesiget hat wider solche gewalt
die doch/ wa sy von menschen allain were/
lang hett zū bodem geen müssen.

Hie frage ich sy/ dieweil sy sich rhümen/
sy haben in irer kirchen nu Fünffzehenhun-
dert Jar/ das Euangelion gehabt / Was
doch das für ain loß Euangelion sey/ das
in so langer zeyt ir nye kainen hatt stercker
gemacht / sonder laßt sy ymmer schwach
bleyben? So doch des Euangelions art ist
das es mache ain zū nemen vonn Glau-

ben zu Glauben / von Tugent zu Tugent /
Ja auch herin des teuffels vnd des todts?
Darumb muß jr Kirch das Euāgelion nit
haben / oder sy müssen zunemen / denn die
weil sy nit künden über ain stuck flaisch vñ
fisch springen / vñd on schew jrs gewissen
essen / wie wöllen sy über den tod springen?
Schrecket sy ain zeytlich ding / vnd nympt
sy gefangen / vil mer wirt sy ain ewig ding
der teuffel vnd der todt schrecken vnd ge-
fangen nemen. Wir müssen auch wider sy
schliessen / das sy Gottes gaysts beraubet
seind / den wa der gayst des Herren ist / da
ist freyhait. 2. Cor. 3. Item syntemal sy ge-
wissen machen an solchen schlechten din-
gen / So müssen sy diß wort Pauli nit wis-
sen / Niemandt soll euch gewissen machen
weder über tranck noch über speyse. Item
sy seind auch durch Christū mit Herren des
Sabbaths / vnd haben gar nichts vñ Got
noch von Christo / vor der kirchen behütte
vns Gott Amen.

Die stiftte vnd Clöster seind schülen ge-
wesen / darinne man die jugent zu Got-
tes dienst / vnd aller erbarkeit aufgezogen
hatt / Vnd auff das man jren synn breche /

hat man erfundē/ so vnterschaydliche spey
sen/zeyt/stunden/ singen/ klayden/ lesen/
betten/aufsteen/schlaffen geen/ Darnach
hat man dise gebrochne leut zum regimēt/
zū predigern/vñ allen notdürfftigen sten-
den gebraucht/Die junckfrawen auch also
das beweysen die namen der stiffte/das ai-
ner haisset Prepositus Probst/dem das re-
giment der schule befolhen ist gewesen/al-
lenthalben zūzusehen / das es ordenlich zū
gehe. Der ander Dechant/ dem die gayst-
liche zucht befolhen war/ dieselbige zū ver-
sorgen/mit singē/lesen/bettē/aufsteen/ny-
dergeen. Der dritt Scolasticus/schulmay-
ster/ der sy zungen vñ sprachen geleret hat
Cantor/der die gesenge der kirchen/vñ die
Musica regiert hat/Custos/dem die klai-
dung vnd kirchenzier befolhen gewesen ist
Dise bleyben yetz jr lebenslang in den kindi-
schen stucken/Zūuor waren darinne junge
kinder/die im alter anderstwa zū dienten/
Nezund seind es eytel alte kinder / vñ alte-
narien. Das sey genüg von Ceremonien ge-
redet/den ainfeltigē zū güt/ den mans nit
grob genüg sagen kan/Vnd wöllen das an-
der / warū die Messe kein opffer sein kan

Auch wie gewulich die irren/die im Sacra-
ment des altars nit wollen flaisch vñ blüt
bleyben lassen/auff ain ander zeyt sparen.

Lasset euch nyemant das zil ver-
rucken/der nach aygner wal einher-
geet/in demüt vnd gaystligkeit der
Engel/des er nyekaines gesehē hat
vnd ist on sache auffgeblasen in sei-
nem flaischlichen syn/ vnd helt sich
nit an dem haupt/auß welchem der
gantz leib durch gelenck vnd fügen
handtraychung empfehet/ vnd an
ainander sich enthellt/ vñnd also
wechsztur grösse/ die Gott gibt.

Es spot hie S. Paulus der philosophhey
die da außserhalb Christo vnd der gaystli-
chen freyhait/die gewissen auff werck vnd
menschen sagung hefften vnd füren will/
Er braucht aber irer aigenen wortt/ da sy
sagen/ Du solt das nitt essen/ Du solt diß
nit anrüren/ Vnd füren die seele des men-
schen/ die ewig mitt Gott leben soll/ auff
die ding die vergengtlich seind/ als solt er

sagen/Wa bleybt die seele/ wenn diß alles
vnterhandē verzeret wirt? da hat sy nichts
darauff sy rüwen mag.

Brabeute haissen die im schiessen vñ an
deren burgerlichen kürzweylen die vnkost
verlegen / wal vnd malstetten anzaygen/
wie ferz/ wie nach/ der stand sein soll/ Die
auch die klainot auffwerffen/ darüb man
schiessen vnd arbayten soll/ Das seind vn-
ser den Chriſten güte prediger/ Bischoffe
vnd pfarrer/ die nichts leren den das Chri-
ſtus sey vnser gerechtigkeit / erlösung vnd
zyl/ darnach wir eilen sollē/ vnd außserhalb
im nichts wissen / Den was außserhalb im
ist/ist lose verführung vnd philosophhey.

Katabrabeute seind / die das widerspyl
treiben/ das fänlin außreyssen/ das zil ver-
rucken / vñnd falche klainot auffwerffen/
das ist/ die etwas anders leren denn Chri-
stum/ Wie man durch werck/essen/trinckē
vnd grawe rōcke zc. sollen selig werdē/ wie
der Bapst gethon hat/ mit allem seinē an-
hang. Nun ist das grōste hieran gelegen/
das man das volck recht fñre/ Vnd die ge-
maine wisse aygentlich zñ vnterschayden/
vnter der Chriſtlichen raynē lere/ vnd vn-

ter der phariseischen vnraynē lere/ Wa die
lere rayn ist / vnd geet im schwanc da kan
man raten vnd helffen/ allen die sündigen
vnd in ainem bösen leben seind/ Wa die le-
re fälet/ da ist kein radt/ Es ist auch kein
werck dz vor Got beston mag/ ausserthalb
der rainen lere/ den wer das liecht nit hat/
der wandert im finsternuß vñ stoffet sich.

Paulus sagt/ Ro. 1. Die lere des Euā-
gelij richte ainen gehorsam des glaubens
auff. Wie setzt er das widerspil/ das die von
disem gehorsam nit seind/ die sich dem euā-
gelio nit vntergeben / in aygener erlesener
waleinhergeen/ Darüß muß jr leere falsch
vñ lügen sein/ die vor Got nit besteen kan/
dauon drobē weitleufftig genüß geredt ist.

In demüt vnd gaystligkait der Engel/
Es steet hie das wörtlin Tapeinophrosine
das da haisset also gesinnet sein/ das ainer
wenig von jm selbs halte/ vnd von ain an-
dern vil/ also das es jm auch wolthüt/ das
er so veracht vñ geringes ansehens sey/
Darauß den folget / das er trachtet nach
geringen verachtē dingen/ vnd faren laßt
alles was hoch/ groß/ vnd tapffer ist/ So
war Maria gesinnet / wie Lucas schreybē

die da sagt / Den er hat angesehen die nichtigkait seiner magt ic. In diser demüt werden die falschen leerer / die außserhalbten Christo etwas anders leren / einher schleychen / nit anderst / als were es in ernst / vnd die leut verführen / Denn die welt sihet nur was gleysset / vnd verachtet das nit gleysset / vñ eben durch diß stücke hat der bapst durch seine Pfaffen vñ Mönich / die welt an sich gebracht / Der sich schreybet ainen knecht aller knecht / vñ sein herze ist doch drauff gericht / das er ain Herre aller Herren sey / Er hats auch dahin bracht / das ers ist / Gott wäre es in ain mal.

Gaystligkait der Engel / hallt ich für keuschait / das sy sich stellen als bedürffent sy der weyber nit / Wie sy auch der Pfaffen vñ Mönich vñ Tinnen vnkeusche keuschait ain Englich leben genennet haben / Den brauch helt auch Christus Math. 22 In ihenem leben werdē sy sein wie die Engel Gottes / das ist / gayst vnd keüsch / weyl sy aber hie leben / so seind sy nit gayst / sonder flaisch / vnd müssen des flaisch / wie es Got erschaffen hat / gebrauchē / Doch halte hie ain yeder was er will.

Wenn er spricht/der sy kains gesehen ha-
ben/halte ich/rede er auf ains sprichworts
weyse/damit man sagt / Sy werden dau-
halten vnnnd reden/ wie der blinde von der
farbe / vnnnd eben die maynung sey die er/
1. Timoth. 4. nennet/ das sy nit verstehen
wa von sy sagen vnd setzen.

Das auffgeblasen sein in seinem flaisch-
lichen sinne / ist die frucht der erdichten
Englischē gaystligkait/ Lusserlich hat es
ain ansehen/gleych als wer etwas da ver-
handen / Innerlich aber ist es eytel flaisch
aigenduncfel vnd lügen/ Das hernach fol-
get/wie er sich helt am haupt 2c. begreiffet
das er auß der gemaine der hailigen ver-
stossen ist / vnd ist Christus gelid nit/son-
der der Widerchrist/Wie aber das wach-
sen zûgehe/ist droben genûg gesagt.

So jr den nun gestorben seyt mit
Christo von den weltlichen sarnun-
gen/was lasset jr euch denn fangen
mit sarnunge/als weret jr lebendig
Die da sagen/ du solt das nitt anrû-
ren/du solt das nit essen noch trinck

en/ du solt das nitt anlegen/ welchs
sich doch alles vnter handen verze-
ret/ vnd ist nach geboten vnd leren
der menschen.

Summa/ jr seyt der philosophhey gestor-
ben/ das ist / Jr seyt von jr frey vnd ledig/
Darumb bleybt ledig/ vnnd laßt euch von
jr nit fahen.

Welche haben wol ainen scheyn
der weyßhait / durch selbs erwölete
gaystligkait vnd demüt/ vnd durch
das sy des leybes nit verschonen/ vñ
ann das flaisch kain kost wenden zñ
seiner notdurfft.

Hie ist verantworret alles was mā kan
auffbringen/ vnd sagen/ Ey solt den Clo-
ster leben/ die Messe / das Casteyen vñ an-
dere haligkait nit güt sein? Ja es hat ain
scheyn/ als were es hailig vñ güt/ aber an
im selbs ist es falsch.

Es steet hie ain wort Apocrisi / dz sich
vnterhandē verzeret/ vñ haist also vil/ als
die da genüg seind zñ gegenwertigen nutzē

vnd brauch / weyl man sein darff so weret
es / wenn man sein nymmer darff / so ist es
kein nütze / das mā zū latein sagt / *sufficere*
ad presentē vsum satis esse / Das aber mir
zūnutz geschaffen ist zū meinem täglichen
brauch / wie sollich dem dienen / vnd mich
von im fahen vnd bindē lassen / So es doch
nichts mer seind den gebot vñ lere der men
schen. Verflucht vñ verbannet seind hie vō
S. Paulus / die iren leyb anders casteyen /
den allain zum dienst des nächsten. Gott
hat leyb vnd seel erschaffen / vnd der seelen
liecht vnd leben gebē / das sy den leib regie
ren soll zum dienst des nächsten. Daneben
ist befolhen / das man in erze / weñ in hun
gert / trencke / weñ in dürstet / schlaffen le
ge / weñ in schläffert / Widerüb auffwecke
wenn er arbayten soll / vnd in treybe / erze
trencke / zū seiner notdurfft / denn die not
durfft ist von Got in der schöpffung gebot
ten. Die übermaß vnd überfluß ist verbot
ten / Wen nun yemandt seinē leyb über die
maß casteyen wolt / der thet wider Gott /
Die Juristen sagen recht / Es sey niemant
kein Herre über sein aygen gelyd / Den wa
ich mir ain finger oder fuß selbs abhüwe /

so thette ich wider Gottes schöpffung/ vñ
thete das/ darzû ich kein recht hette/ Dar
umb ist es ain lügen/ das sy von S. Mar-
cus liegen/ er habe jm selbs ainen daumen
abgehawen/ das er nit dürffte Messe hal-
ten/ vnd weñ ers thon hette/ so wer er ain
Gotslesterer/ der Gottes geschöpff wider
recht vneerte vnd schendte. Man list von
sant Bernhart/ das er sich also gemartert
hat/ das jm sein athem also übel roch/ das
nyemañt mit jm kund zû schaffen haben/
vnd mitt jm vmbgehen. Er war auch nie-
mandt kein nütze/ darumb vermante er
seine Junger/ Sy wölten ye an sich halten
vnd den leyb nit zû hardt beschwären/ Er
hette vnrecht gethon/ Sy aber solten also
leben/ das sy anderen leutten dienen kün-
den/ vnd sich selbs nitt verderben vnd vn-
tüchtig machen/ Den was hat dir der ar-
me leyb gethon/ das du in martern
wilt? Gyb dem Esel sein fütter/
vnd were gleychwol das er
nitt zû gayle werde/
vnd schlahe auß
dem geschirre.



Das Dritte

Capitel.

Eyt jr nun mit Christo auf
erstanden / So süchet was
doben ist / da Christus ist / sitzend zu
der rechten Gottes.

Bis hieher hat S. paulus das gewissen
gebawet / auff Gottes güte vnd barmher
zigkeit / also das ains yeglichen Christen
herge hierauß kundtschafft vnd warhafft
tigen bericht habe / wes es sich zu Got ver
sehen soll / nämlich / alles güten / vñ wie er
durch Christus des aingebornen suns Got
tes / zeytlichs sterbē / ewiges leben / vnd die
kindtschafft Gotes / zu ewiger rñw vñ selig
kait / auß lautern gnaden überkömen habe
on alle sein zůthün vnd verdienst. Zum let
sten auch / wie er allain an Gottes worten
vnd wercken / dem gewissen nach / hangen
soll / vnd sich von kainer Creatur weder vō
Engeln oder teufeln / menschen oð Sabba
thern / Philosophen noch menschlicher satz
ung binden lassen / Den er ist nu durch das

vertrawen an Got / vor Got selig vnd ge-
recht / vnd ain herre aller ding / die Got ge-
schaffen hat / im hymel vnd erden / vñ lebt
auch allain in ainē hymelischen wesen. Tu
wirt er forthin auch gar beschaidenlich bes-
ser / den alle welt vnd geseze bücher / gütte
werck leeren / wie man die thün solle / auff
das Gott daran gepreyset werde.

Er taylet hie / ain glaubigen menschen /
in zway tayl / ain tayl ist im himel / da Chri-
stus sitzt / nämlich / zu der rechtē hand des
Vaters / das ist / er sucht nichts an Christo
eusserlich noch flaischlich. Das ander tayl
lebet auferden / vnd soll sterben / Vnd wenn
das tayl stirbt / so lebet es / Das sterben ist
ablegen vnd außziehen / alle vnlust vnd ge-
such der Natur vnd vnnsers sündlichen
willens . Das leben ist anziehen vnd anle-
gen herglichen erbarmen / sänfftmut ꝛc.
wie wir hören werden.

Wenn er spricht / Seyt jr nun aufferstan-
den / so suchet was droben ist / ist eben also
vil / als / Suchet nichts flaischlichen an Chri-
sto / sonder laßt euch an dem wort des ge-
creüzigten genügen / darinne jr freude vñ
güter fülauf habet / so sagt er auch 2. Cor. 5

Von nu an kennen wir niemant nach dem
flaisch ic. Das ist/ wir sein newe creaturen
vnd leben im hymnischen wesen/ Vnd eben
da Christus sitzt zur rechten des Vatters/
das ist/ wie ers selbs deuttet/ wir seind ge-
sinnet/ des das drobē ist/ das ist/ gaystlich
vnd nit des das auff erdē ist/ das ist/ flays-
schlich/ Wir haben ain andern willē Got-
tes lernen kennen/ das vns schlahe/ vñ vn-
sern willen breche vnd tödte / vns zū gūte/
als ain Vater / das ist/ gaystlich gesinnet
sein/ Sonst sagt vnser flaisch/ got schlecht
bricht vnd tödte meinen willen/ Darumb
das er mich verdamme/ das ist/ flaischlich
gesinnet sein. Paulus sagt zun Corinthern
Ir solt nit das joch ziehen mit den Haydē/
das ist / Ir solt euch der ding nit verwun-
dern/ der sich die welt vñ wundert. Die welt
flaisch vnd blūt / ist flaischlich gesinnet/
darumb sagen sy/ wem es hie wol geet/ den
hat Gott lieb/ Wem es übel geet/ dem ist
er feynd. Das wort Gottes der glaube/ vñ
ain glaubiges hertze ist gaystlich gesinnet/
Darumb sagt es/ Non sit discipulus supra
magistrum. Der schüler soll nitt über den
maister sein/ Gottes wolgefalle ist vns zū

thun/wie er sein sun gethon hat/Vñ wie
er seinen son geschlagen hat/auff das er in
haylete vnd erhöhete / also schlecht er vns
auch/auff das er vns seinen willen lerne
der vns seliget / vnd vnsern willen breche/
der vns verdampft/Da von haben wir dro-
ben forhin mer gesagt.

Seyt des gesynnet was droben
ist/nit des das auff erden ist / den jr
seyt gestorben / vnnd ewer leben ist
verborgen mit Christo in Gott.

Ain theüre leere ist das / daran die welt
zū schandē wirt/vnd den hals daran stür-
zet.Philosophhey leret/was auff erden ist/
vnd ist flaischlich gesinnet/ Gottes wortt
leret/Was über die erde ist/ vnd ist gayst-
lich gesinnet/ Philosophhey leeret/ Wer da
lebt der lebt/ Gots wort vnd Euangelion
leret/ was da lebt das stirbt / vnd was da
stirbt das lebt/vñ dieweil mā noch flaisch
vnd blüt/nit kan sterben leben hayssen/vñ
leben sterben/So muß ain hoher verstand
da sein/der flaisch vnd blüt die augen ver-
blende/ vnd füre den menschē durchs glau-
bens auge/ auff Gottes auge/ Also/ das/

was das flaisch auge sterbē hayſſe (den̄ es
ſihet nit anders) ain Chriſtlich lebē hayſſe
nach des glaubens auge/ denn er ſihet wie
Got ſihet/der die ding die nit ſeind/ rüſſet
als weren ſy Rom. 4. Darumb iſt auch al-
ler Chriſten leben verborren mitt Chriſto
in Got/flaiſch vnd blūt haſſet es ſterben/
Gott vnd der glaube haſſet es leben.

Da Chriſtus am Creütze hieng / vor ſein
ſelbs aller welt augen euſſerlich/ vnd ver-
meledet / vnnd auffſ ergelte zügericht/
auff den des geſetzs vrtayl gefallen iſt/ vn̄
ſpricht/ Vermaledet ſey vor Got der am
holz ſtirbt / Da kan niemañt anderſt rich-
ten/den̄ es ſey nun geſchehen vmb in/ vnd
diuweyl in Gott also ſeer ſincken laßt/das
in Gottes vrtayl im geſetze gegeben trifft/
So müſſen alle menſchē ſagē/Nein/nain
Es iſt eytel betriegerey vn̄ verführung mit
im gewesen/den̄ wie ſolt Got ſeinē ſun ver-
laſſen? den̄ das geſchray/Mein Got mein
Got/wie haſtu mich verlaſſen/ hatt diſen
gedancken aller menſchen ſeer geſtercket/
das ſy nun vergeſſen / aller ſeiner predige/
güts geruchts/wunderzaichē vn̄ wolthat
die er allē menſchē beweiset hat/also auch

das die zwen Junger die gen Emmauß gieng
gen / selbs sagten . Wir hetten gemainet /
Er solt Israel erlöset haben / als sprechen
sy / Es ist nichts / es ist auß / er hat vns be-
trogen / wir seind verführet zc . Vnd ob wol
alle menschen / seine besten freünd / seine
eigen Junger / nit anderst von jm halten /
den er sey von Gott verlassen / verdampt /
vnd müsse in die helle faren / darumb das
er ain verführer gewesen sey / vnd von Gott
vermaledeyet / So ist doch gleychwol sein
leben vnd Gotthait in Got verborgen / vnd
mit eusserlichen leyden zü gedeckt / welchs
sich hernaher auch gar gewaltigklich hatt
sehen lassen / da er vom tode ersteet / Denn
ob er wol / als ain verlassener mensch / den
todt fürchtet / vnd in die helle fert / So kan
er doch vom tode nitt verschlunden / noch
von der hellen gefangen behalten werdē /
den der spruch wirt Christus menschait ge-
tröstet haben / den S. Peter führt / auß dem
15. Psalm / Den auch mein flaisch wirt rü-
wen in der hoffnung / den du wirst nit züge-
ben / das mein seele inn der helle bleybe zc .
Item hart zünüo: Acto . 2. sagt S. Peter /
Den hat Gott aufferweckt / vnd auffgelō

set die schmerzen des todes / nach dem es
vnmüglich war / das er solt von jm gehalten
werden.

Wie nun Christus lebē verborgen ist vor
Gott / vnd ain lauter gehaymnus / das nie
mandts erkennet / den̄ wem es Got offensa
bart / Also ist aller hailigen leben mit Chri
sto (das ist wen̄ sy verfolget werdē / getödt
et / tragen jr creütze / sterben vnd verderbē
vor der welt augē) vnd jr lebē ist mit Chri
sto verborgen vor Got / vñ in Got / das ist /
Got helt es für ein leben / obs wol die welt
für sterben helt / Das sagt Jesaia. 11. Sein
tod vñ rñwe wirt herlich sein. Itē psal. 116
Wie thewr ist der tod seiner hailigen / vor
dem Herin. Der prophet Jesaias sagt von
Christus Künigreiche / das gar vil ain an
der ankunfft hatt den̄ der welt reych / Die
welt hebet jr reych also an / das sy die feyn
de / die sich wider jr herschafft legen / todts
schlabe / auf das jr reych lebe vñ starck sey /
Vnd dieweyl der selbe künig lebet / dieweyl
ist er in grossen eeren / wol vnd mechtig ge
halten / Aber also bald er stirbet / so ist seyn
cere mit jm dahin / die forcht vñ macht ist
auß / vnd man trachtet nach seinem tode /

nach ainē andern Könige/ Christus keret
diß alles vmb/dieweyl er lebet/ ist er vnge-
achtet/ Ja er laßt sich von seinen feynden
schlahen/erwürgen vnd tödten/ Aber in
tode/ da die feynde frölich seind/ als het-
ten sy gewonnen/ vnd schryen juch zū/ Da
gehet seine eere an/vnd regieret mit gewalt
über alle seine feynde/ Darüb ist sein reich
durch den todt gaystlich vnnnd ewig/ Der
welt reych aber/ durch jr leben/ flaischlich
vnd zeytlich/Vnd diß ist die visach/ War-
umb Paulus also mit frewden schreyet vñ
leeret/ Er wisse vnnnd predige nichts denn
den gecreüzigten Christū. Item wir seind
geachtet wie das kerich. 1. Corin. 4. Item
wir seind geachtet wie die schlacht schaff/
psalm. 43. Item wir predigen das wort
des Creüßs. 1. Corinth. 1. Vnd der gleychē
vil mer orten/ Den diß ist die schatzkamer
darinne alle fülle der Weyßhait Gottes
leyplich wonet/ Collo. 2. Aber verborren/
1. Corinth. 2. Da wir aber von reden/ das
ist ain weyßhait die den voltkömen aygent
vnd nitt ain weyßhait diser welt/ Sonder
wir reden von der Göttlichen weyßhait/
Welche im gehaymnuß ist/vnd verborren

ligt zc. Wir haben aber Christus synn.

So ist das nun S. Paulus maynung/
Ir seyt erstanden mitt Christo / Darumb
sücht was droben ist da Christus ist / das
ist süchet hymlische ding / sitzend zur rech-
ten Gottes / an dem ir nichts mer flaisch-
liches süchen noch gewarten sollet / sonder
euch seins worts allain rhümen vnd trös-
sten / Das ist aber das ir hymelisch / gayst-
lich / nit flaischlich / nitt zeytlich / nitt nach
dem das da gleisset / mit reychtūb vñ eere /
sonder mit schande vnd Creutz beladen ist
gesinnet seyt / Denn ewere flaischliche ge-
danken / die allain fürchten / gūt / eere /
vnd was euch wolgesiel / haben nun auff
gehöret / vnd ewer hertze ist euch nun an-
derst worden / vnd gar vernewet / also das
euch yetzund durch ewer gaystlich lyecht
das Creuze vnd alles vnglück wolgefelt /
für welchen ir zūvor lieffet / auff die selige
hoffnūg / das es Got also wolgefalle / Es
myßfalle der welt / dem flaisch vñnd dem
blüt / wie lang vnd ser es wölle / Ewer lebē
ist verborgen in Gott / der kennet es allain
flaisch vnd blüt sihet es nit.

Wenn aber Christus ewer leben
sich offenbaren wirt / denn werdet
ir auch offenbar werden mit im in
der herligkeit.

Hie gibt S. Paulus dem verborgenen le-
ben der Christen in Got / sein maß vnd zeit
vnd will / das der Christen leben (wie dro-
ben genüg gesagt ist von der hoffnung) sey
ain lanterers sehnen nach der volckömenhait
vnd wecklagen über die vnuolkömenhait
Denn es werdens die Christen nit weytter
bringen / denn das sy gerne wolten anderst
sein / keüsch / sänfft / stille / nit vngedultig /
nit zornig / nit geyzig ic. Wen es ymmer ge
sein künde / Den sy finden irs vnglücks vñ
flaischs also vil / das sy schier darvor müs-
sen zûbodem sincken. Ir hertz ist so vol bö-
ses / so vol vnglaubens vnd Gotslesterung
das sy es auch selbs nit erforschen künden.
Wie es der hailige gayst beürtet Hiere. 17.
Vñnd wenn sy disen jamer ires hertzens /
vnd Gottes zorns / Damit er dise boßhaite
straffen will / sehen / so müsten sy vñ stund
an sterbē / Zû dem / so ist vnser schwachait
also groß / das wir müssen on vnterlass in

far steen/das vns begegē müge/alles was
wir sehen/das andern leutten an leyb vnd
seele gleich begegnet/ mit ferner/ mit was-
ser/ mit schwert/mit rade/ mit galgē/mit
allerlay plagen/franckhait/hunger/pesti-
lencz/gehen tod/auch mit sündē vnd schā-
den/teuffel/tod/helle/in eytel forcht vnd
zittern vor Gott vnd seinem gerichte/mit
vnglück an weybe/kinde/hauß vnd hoffē/
vyhe/vnd allem damit wir vmbgeen/Dē
wir finden hie weder fryde noch frewde/
sonder eytel vnflat vñ stanck. Wir müssen
sehen vor vnsern augen/also vil grewlicher
Gotslestung/mit abgöttereyen/messen
orden/Secten/myßbrauch des hailigē na-
mens/leydens/sterbens/Creützs/blüt vñ
wunden Christi eusserlich von der welt/
paffen/Papst/bischoffen/Clunnē/Mün-
chen/landtsknechten/Kriegern/vnd von
den Newen Propheten/felschern Gottes
worts/schwertern vnd röttengaystern/
das/wa wir solche schrüch nit hetten/wir
aygenlich verzagen müßten/dadurch wir
getröst werdē/Gott wölle vnd künde vns
disen jamer alle zū gütt haltē/nit straffen
noch rechen/sonder zūdeckē/gnadē/helfē

fen vnd trösten/ Wa wirs allain erkenteit
vnd wolten sein gerne loß sein/vnd schrien
Ich vnseeliger mensch/wer wirt mich erlö-
sen vō disem sterblichen leib/ der mich zum
tode vnd in die helle/in leyde vnd angst ge-
denckt zūnerderbē. Ich dancke Got/durch
Jesum Chrust vnsern herin Ro.7. Den also
muß man die armen gewissen trösten/ Es
ist ye war/was du sagst/ Wir seind also al-
le/vñ ist keiner anderst/ Aber halt/warte
auß / Du solt es nit besser haben denn dein
Herre Jesus Christus/ Du solt es auch nit
erger haben / Es gieng jm auch also / vnd
gehet jm noch also / diuweyl Christen auff
erden seind/ Vezt gilt es nichts den leyden
vnd sterbē/ Aber wen er nun offenbar wirt
werdē/ in der herligkait am Jüngsten tag
So wirsen auch herlich sein / halt jm ain
klaine zeyt zū güt/ Denn zū der zeyt wirt es
geen/wie Sapie.5. geschriben steet/ Wen
die Gottlosen vor angst ires gaysts sagen
werden. Das seind sy die wir etwann ver-
spottet vnd verlacht haben/Wir wansin-
nigen/wir maineten/ jr leben were ain vn-
sinnigkait/vnd jr ende were on eere. Sihe/
nu seind sy gerechnet vnter die kinder Got

tes/vñ jr losung ist vnter den hailigē Got
tes. Wir habē geirret vō dem weg der war
hait/vnd das liecht der gerechtigkeit/hat
vns nit geleuchtet zc. Laß dir hie dieweyl
an dem genügen/ Das Christus dir wordē
ist dein gerechtigkeit/hailigkeit/erlösung
vnd weyßhait von Got. 1. Cor. 1. Bistu ain
sünder/vnrein/vnhailig/ain narz/ain teu
fels kind/ Wolan so ferest du daher wie auff
aim seyden küssen/ in seiner gerechtigkeit/
raynheit/hailigkeit/erlösung/weyßhait zc
Den alles was Christi ist/dz ist dein Ro. 8
Weyler vns den sun geschenckt hatt/ Wie
solt er vns auch nitt alles mit jm geschēckt
haben? Zu dem/ so müstu selbs bekennen/
wie er dich so manchfeltig behüttet vñ be
waret hat/im schlaff/ im feld vnd hauß/
Besihe dein leben/wie es so offft wider deis
nen willen gangen ist / das dirs auch vn
möglich ist zūbegreyffen/Vnd zum letzten
so hast du deß ain gewisses vnterpfind /
vnd liebzaychen / das er also ist / vnd über
dir halten will / dieweyl er seinen aynigen
son/das liebste/vnd das beste das er hatt/
für dich sterbē leßt/Darumb sey güt ding
Es wirt bald besser werdē/ diß ist zeytlich

ihens wirt ewig sein / Leyde mit Christo / so
wirstu auch der herligkeit taylhafftig / in
seiner offenbarung Ro. 6. Das leyde ist dir
aber wol zûtragen / Sintemal er dir hilfft
tragen / vnd dein leyden ist sein leidē Ro. 8
Der gayst hilfft vnser schwachait / Vnd
Jesa. 40. Die schwangern lemmer will ich
in mein schoß fassen / vnd hinnach tragen /
2. Timoth. 2. Sy seind wol kinder Gotes /
aber denn werden sy allererst erscheynen
kinder Gottes / in der zûkûnfftigen auff-
erstehung.

Der Papst mit seinē hauffen / hatt dise
leere gar verdempfft / denn er hat gesagt /
Wen die kirch rûwe habe / singe vñ lese / vñ
habe keinen mangel an yrgent ainē ding /
weder an gelt / noch eere / noch gûit / so geet
es recht / so schûtzet Got die Kirch / So ist
Got jr gnediger Vatter / wie den zû Papa
Juli zeytē / der Augustiner Cardinal Egi-
dius von Viterb durch Italias zogen ist /
auß Papa Juli befelch vnd außgeschryen /
Bon tempo / Bon tempo / Aber lieber herz
got / hiedurch seind vnser forfaren vnd die
gantz welt zur helle geschwenmet / layder
Den das Creutz ist der Christen kranz vñ

rûm / vnd durch vil trûbsalen müssen wir
eingeen ins reych der hymel.

So tödtet nun ewere gelider die
aufferden seind hûrerer / vnrainig
kait / lûste / böse begirde / vnkeuschait
vñ den geytz (welchs ist abgöterey)
vmb welcher willen kompt der zorn
Gotts / über die kinder des vnglau
bens / in welchẽ auch jr weyland ge
wandelt hapt / da jr drinnẽ lebetet.

Wie gar vil anderst leeren gütte werck
thûn / Moses / das geseze / menschliche ord
nung / weltliche satzung / Philosophhey / vñ
die Apostel durchs Euangelion / Das ge
seze vnd Philosophhey gebietẽ stracks / wie
droben in spott von S. Paulus geredet ist /
Du müßt das nit essen / das nitt anrûren /
dis nit anlegen / Vñnd hie ist geschwigen /
bayde im geseze vñnd in der Philosophhey /
der maß vnd weyse / wie man müge darzü
kõmen / das man sich dem gebott vnd ver
bott nach halte / vnd es wirt on mittel auf
das gebott zûhalten / vnd das verbott zû
meyden / gedungen. Geseze vnd Philosoph

phey zucken das schwert/wa dz gebot über
schritten wirt. Ainen dieb hencfet man/ai
nem mörder schlecht man den kopff ab/dz
ers nimmer thū/vnd ist eyttel not vnd ge
zwang/ja straffe vnd Tyranny/der nye
mandts entlassen kan/vñ ye weyter er da
von laufft/ye meer er zur straffe/in jamer
vnd not kompt. Euāgelion thūt nit also/
sonder das widerspil/Denn gleich als das
eusserlich gesetz vñ Philosophhey lernet euf
serlich frömkait/das wer eusserlich nit tod
schlecht/raubet/aufürisch ist/ist vor dem
gesetz gefreyet/Gal. 3. wer des gesetz werck
thūt/der wirt in jn lebē. Also leret dz Euā
gelion/wie dem gesetz durch Christū inner
lich genūg geschehe/welcher vnser hertzen
durch den hailigē gayst erleucht/rūwig vñ
lustig macht/von jm selbs zūthūn/alles
was das gesetz erfordert/Darumb sagt
auch hie S. Paulus/Dieweyl jr darzū auß
gnaden kōmen seyt/das jr kündt hymnisch
leben/vnnd zur rechten Gottes mit Chri
sto sitzen/So tödtet ewere glyder die noch
aufferdē seind/auff das ewer himnisch we
sen zū neme/den so vil den glydern auffer
den abgeet/also vil geet dem gayste zū/vñ

so vil die glyder stercker werden / also vil
geet dem gayste zu schaden / So vil auß / so
vil ein / So vil ein / so vil auß.

Hie merck nu was gute werck seind / nem
lich / die zur tödtung des alten mensche / in
gedult vñ langtmüt geschehē / dadurch vn
ser will gebrochē wirt / S. Paulus erzelet sy
vnd nennet sy Hürerey / vnrainigkait / luste
böse begirde / vnd den geytz. Itē zorn / grimm
boßhait / lesterung 2c. Dise stück aber die al
lein im hertzen geschehē / wirstu mit keiner
kappen / blattē / closter / fasten / vñ klaidūg
dempffen / Ja es seind nit grösser hürerey /
vnainigkait / luste / böse begirden / geytziger
zorniger / vnarmherziger / grimmiger / vn
leidlicher / neydischer leut auf erdē / den ebē
in den kappen / blatten / clöstern. Darauß
den folget / das jr werck nit Gottes werck
vñ güt seind / sonder ain grewel vñ stanck.

Zun Römern am 12. bittet vñ flehet S.
Paulus durch die barmherzigkait Gotes
sy wölten vmb der gnade willen / die sy er
kant habē / ire leyb Got opffern 2c. Stöck
vnd zwingt niemant / sonder vermanet vñ
bittet. 1. Corin. 12. sagt Paulus / Ir wisset /
das jr Hayden seyt gewesen / vund hingen

gangen zu den stümen gözen / wie jr geführt
wurdet / als spreche er / die weyl jr dem nun
loß seyt / vñ auß dem gefencknuß der Göz-
en erlöset / Wolan dancket nun Got dafür
vnd sehet wie er euch forthin führen will / zu
dienst vnter ainander / auff das jr auch an-
dern müget zur besserung dienē / vnd thün
wie euch geschehen ist . Zu vnsern zeytten
müssen wir also sagen / Ir waret Hayden /
bestriekt mit des Bapsts vnd Antichrists
gebotten / gefangen mit ainē stück flaisch /
vnd fisch / also das jr gemaint hettet / Got
zürnte feyndtlich wenn jr am freytag ain
stück flaisch assiet / vnd lachete frölich weñ
jr fische assiet / weñ ewer töther vnd süne /
paffen / münch vñ munnē wurdē / den gros-
sen grewel vnd Gotslesterung / hapt jr für
hailig gütt ding gehalten / Vez seyt jr von
den teuffels banden allen loß . Das Euan-
gelion das yezt widerumb durch Gottes
grosse wunder leüchtet / hatt euch heraus-
gerissen / darumb dancket jm dafür / vnnd
dienet ainander / seyt gaystlich / nit flaisch-
liche menschen / das man die werck vnnd
dienst zum nächstē / auß dem hertzen das
nun glaubig worden ist / heraus führe / vnd

nit außserhalb in das hertze füre / den was
nit mit lust geschicht / das gefellt Got nit /
Wie das sprichwort lauttet / Gezwungen
dienst gefellt Gott nit.

So ist das nun S. Paulus maynung /
Tödtet ewere glider außser den 2c. auff das
ir nit mit der welt verdampt werdet / vnd
dem zorn Gottes als die glaubigē entlauf
fen müget / Denn vmb der hürerey / vnrai
nigkait / luste / bösen begyrden / vnkeuschait
vnd des geytz willen / kompt der zorn Got
tes / über die kinder des vnglaubēs / Ir seyt
aber nun glenbig / Tödtung der gelyder ge
schicht im gayst / das ist durch gebett vnd
anruffung des hailigen gaysts / vnd im se
nen nach der vollkōmenhait Gala. 5. Wan
delt im gayste / so werdet ir die luste des
flaischs nit vollbringē / Werdet ir die wer
cke des flaischs durch den gayst tödten / so
werdet ir leben / das ist / werdet ir euch seh
nen der bösen lüste loß zū sein vnd schreyen /
Ein new hertze vnd rainigkait schaffe Her
re in mir. Item wie will ich doch dises vn
flats loß werden? So werdet ir leben / das
ist / der selbe gebreche soll euch zum lebē nit
hinderen / Den das liecht des Euāgelions

weyset ain yegklichen / wa er gewesen sey /
in der finsternuß / wie er herauß kōmen sey /
durch das wort vñ Euangelion von Chri-
sto / was er yetz sey / ain newe Creatur / vnd
was er sein soll / rayn von sündē / Darumb
erwecket es auch ain sehnen zū der künfftig-
gen hailigkait. Dieweil aber diß sehnen wi-
der flaisch vñ blūt / weret / geet / so sterben
vnd werden getōdtet die lüste des flaischs
Als heütte sicht mich an vnkeuschait / so
lauffe ich zū Got / vñ klage jm mein anligē
vnd sage / Herre hie regt sich vñ leckt mein
flaisch vnd blūt / vnd will mich zū sünden
vnd schandē machē / laß deins suns meins
Herzn Jesu Christo gehorsam vñ gayst mir
zūhilffe kōmen / Got der hilfft / endert mir
das hertze / Ich werde der vnlust loß auff
das mal / Morgen kompt zorn / geytz / vn-
gedult / vnd andere stacheln vnser gyfftig-
gen natur / so thū ich aber also / Vnd wa
solch sehnen vnd bitten ist / da ist Gott / da
ist der glaube in seiner yebūg / da seind Got-
tes kinder / die der hailige gayst füret vnd
laytet. Wa es aber nit ist / vnd wir bleyben
heütte wie fernd / morgen wie heüt / gleych
geyzig / vngedultig / zornig zc. Da ist Gott

nicht / da seind Gottes kinder auch nicht.

Vnreinigkeit ist alle hurerrey außserhalb
der natur / die Moses verbotē hat Deu. 27

Geytz haisset billich der abgötter dienst
den wa Pleonexia ist / da erhebet sich des
menschen hertze / vnd macht jm ain aygen
vertrauen vnd Abgot in seinē hertzen. Es
ist ain ellender jamer / das ainer mer müts
haben soll / weñ er ainen guldin hat / denn
weñ er keinen hat / den das haisset ain Ab
got habē / darauf sich ainer gedencft zuuer
lassen. Sicht yemant etwas an / so gedēckt
er / Es gee wie es wölle / so hastu noch also
vil vorradts. Vnd diser glaubet / dieweil dz
korn auff dem bodē ist / der weyn im Keller /
das gelt im seckel vnd kassen / Weñ weyn /
korn / vnd gelt auffhöret / so waist er niē
dert zu bleyben / Es ist aber nit ain Christ /
sonder ain Abgötter / ain Konglauber /
ain täschen vnd weyn glauber / wie Chris
tus sagt / Wa des menschen schatz ist / da
ist auch sein hertz / Pleonexia kompt vom
plus habendo / das ainer zu vil hatt / oder
zu vil haben will das ist geytz / dazu kompt
hernach die fahr / dauon geschriben stehet
1. Timo. 6. Den die da reych werden wölle

(merck was das sey/werdē wollen) die fal-
len in versuchung vnd stricke/vnd vil thö-
richter vnd schöddlicher lüste / welche ver-
sencken die menschen ins verderben vñ ver-
damnus / Denn geytz ist ain wurzel alles
üfels/welcher hat ettliche gelustet / vñnd
seind vom glauben irre gegangen/vnd ha-
ben sich selbs gemenget vnter vil schmer-
zen/Aber du mensch Gottes fleüch solchs
Es laßt es natur nit/auch in den hailigen
weñ sy mit gelt vnd güte vmb gehet / sy be-
schmigt sich damit / Vnd weñ sich ain fal-
begibt/das sy haymlich yemandt kan über-
eylen/so übergibt sy jr vortayl nit/ vnd ge-
denckt / Es schadet nichts / Gott wirdt
dirs verzeyhen/ Es hatt nit nott/sündiget
also auff Gottes barmherzigkait/ vnd in
den hailigen hayst/ rechens für kein sünde
sonder geet dahin/Über die kömet Gottes
zorn. Die Hayden als Cato zu Rom/habē
den ackerbaw/vyhezucht/weynberge/gär-
ten vnd wyse wachs / für die erstliche na-
rung gehalten/kauffmanschafft/ aber für
die vnerlichste / dieweyle es on grosse müe-
vnd arbeit/färligkait vnd wücher nit wol
kan abgeen/ Vnd ainen wücherer habē die

Hayden zweymal also hoch gestraffet als
ainen dieb / Vnd wiewol die kauffhandel
auch mit gutem gewissen künden getriben
werden / so ist doch meer färligkeit darbey
dan beym ackerbaw. So ist auch ain ver-
mütung darbey / Wer gelt in ain handel le-
get / der gedencft reich zu werden / vnd geet
vor dem spruch Pauli über. 1. Tim. 6. Wenn
wir aber füter vnd decke habē / so laßt vns
genügen. Itē Eccle. 3. Wer die färligkeit
liebet / der soll dünne verderbē / Vñ Pro. 13
Wer das pech rüret / der wirdt sich damit
besudeln. Wir Teutschen sagen / Weyt abe
ist gut für die schüsse / vnd auß dem stocke
ist gut dingen / Damit die natürliche erfa-
rung lernet / man solle sich vor den färlich-
en sachen vnd hendeln auff erden hüten.

Nun aber leget alles von euch /
den zorn / grym / boßhait / lesterung /
schandpare wort auß ewerē munde
lieget nit vnter ainander / ziehet den
alten menschen mitt seinen wercken
auß / vñ ziehet den newen an / der da
vernewert wirdt zu der erkendtnuß

Gotes/nach dem ebenbilde des/der
in geschaffen hat/da nicht ist/Krie
che/Jude/beschneydūg/Vorhaut/
vnkrieche/Schyta/knecht/freyer/
sonder alles vnd in allen Christus.

Das tödten der glyder auff erden taylet
Paulus inn zway vnterschaydene nöttige
werck/nämlich / in ablegen vnd anlegen/
oder in außziehen vnd anziehen. Ablegen
vñ außziehē geschicht/ weñ man sich ains
klaydes schämet / vnd darff vor schanden
nit für die leüt gon/dieweiles ain vnchrist
lich klayd ist/ Wie Christus im Euangelio
den verdampt / welcher zur hochzeyt war
eingangen/ vñ het kein hochzeytlich klayd
an/vnd het den altē wandel nit abgelegt/
Anlegen vñ anziehē ist gewisse zūversicht/
das alle vnser werck nu Got gefallen/ vñ
wir frisch thūn sollē/was vns für die hand
stosset/ Wenn man zur hochzeyt gehet/ so
schmückt man sich in klayder/der mainūg
das man wölle mit braut vñ brēutigam frö
lich sein/singen/tanzen vnd springen/deñ
wir wissen/das wir darumb geladen seind
vnd thūn dem Brēutigam willen daran/

Also seind wir nun gûter ding vnd frölich/
diu weyl wir durch Gottes gnade zû ainem
neuen leben berûffen seind / Das ist das
hochzeyt klayd vñ schmuck / der vns durch
seinen hailigē gaist fûren vnd layten will/
in dem wir auch wachsen vñ zûnemen in
glauben vñnd in gûten wercken / wie wir
doben vil mal erzelet haben.

So will S. Paulus also sagē. Nun aber
legt alles von euch / den zorn / grym / boß-
hait ꝛc. Das ist / befindet in euch andere ge-
danckē / andere luste / also das es euch wol
thû / nit zûrnen / warhafftig sein / niemant
zû verfortaylen im handel ꝛc. Den der alte
mensch rattet vnd treybt zum widerspil /
vnd rechnet es im für ain geschicklichkeit /
das er mit finangen vñnd bösen falschen
griffen / ainen andern beliegen vnd verfort-
tayle / sich allain schmucke / vñnd im gûts
thue. Der newe mensch aber / der hailige
gayst / bittet dafür als für seine grösste feyn-
de / vnd wolt gerne dauon loß sein / Sinte-
mal er auch der massen geschaffen ist / das
er soll diser ding loß vñ ab sein / wie Got ist
nach des bilde der in erschaffen hatt / also
das er allain Christum kenne vñnd daran

volle Kroppe habe / außgezogen von allen
Creaturen/personen/stetten/geberden/zey
ten / Ceremonien vnd alles was eusserlich
mag genent werden / speyse / tranc / klay
dung / newe monden vñ Sabbather / Das
diuweyl er lebē muß / also diß lebens gebrau
che / als ainer not vñ vnuoltkōmenhait / der
er gerne loß wer / vnd wer nit darinne. Hat
er ain weyb / so braucht ers als hette er es
nit. 1. Cor. 7. Er zürne mit kainem feynde /
denn sy tünden im nitt schaden / Er boche
mit kainem freünde / denn er kan im nichts
frōmen / Sein haupt stuck daran er hanget
ist Christus Jesus / dadurch er aller ding
im hymel vnd erden ain Herr ist.

Das bilde des menschen / das nach Got
geschaffen ist / ist zum ersten die gewalt vñ
reginēt über alles das geschaffen ist Ge. 1
vñ. 2. Zum andern gesinnet sein / hailig vñ
gerecht / wie got ist / Den also sagt Paulus
Ephesi. 4. Erneuert euch aber im gayst
ewers gemüts / vnd ziehet den newen men
schen an / der nach Gott geschaffen ist in
rechtschaffner gerechtigkeit vñ hailigkeit
Darumb legt die lügen ab zc. Zu disem bil
de vnd gleichnuß Gottes gehört das Chri

stus sagt Math. 5. Seyt barmhertzig wie
ewer hymliſcher Vatter barmhertzig iſt/
Der ſein Sonn ſcheynē laßt den gerechten
vnd vngerechten/vnd laßt regen gūten vñ
böſen/Vnd was Gott vns haiffet/das hat
er zūuoꝛ gethon. Also gilt es den hailigen
auch gleychvil/sy dienē wem sy wöllen/ gū
ten oder böſen / ſo iſt in daran genūg/ das
sy dienen vnd das man bey in finde dienſt/
hilffe vnd radt/Vnd gleych wie allen men
ſchen geholffen wirt/die zū Gott kommen
vnd hilffe vō in begeren/ also wirt den hai
ligen keinē menſchen/Er ſey Jude/Heyde
Krieche/Scyta/knecht/magt/hoch oder
nyder ſtandes / dienſt vnd hilffe verſagt/
Das iſt das gleychnuß vñ bilde Gotes des
newen menſchē. Diweyl nun diß bilde iſt
on vnterſchayd der perſonen/ſtette/ſpeyſe
klaydung ꝛc. So muß nothalben des teuf
fels bilde ſein / vnterſchayd machen vnter
perſonen/vnter pfaſſen vnd Layen/Clun
nen/München/Leſtande/Keuſchait/klay
dung/speyſe/ tranck/ deñ es iſt aygentlich
alles Philoſophey vnd loſe verführung.

So ziehet nun an/ als die außer
wöltē Gotes hailigen vnd geliebē

ten/ hertzlichs erbarmen/ freüntlig/
kait/ demüt/ sanfftmut/ langtmüt/
vñ haltet ainer dem andern zů güt/
vnd vergebet euch vnterainander
so yemandt ain klage hat wider den
anndern / gleych wie Christus euch
vergeben hat/ also auch jr.

Diß seind die rechten gūten werck/ wel-
che die Christē üben/ das sy freüntlich/ mit
leydend/ demütig/ sänfft seind/ vñ künden
aim yeden zů güt haltē vnd vergeben/ was
man in thūt/ welchs denn gar ain selzam
vogel ist auff erdē/ vñ wachset solch kraut
nit in allen gerten/ deñ es seind frucht auß
dem Paradeys/ In Messen/ kappen/ vnd
eusserlichen wercken wirstu sy nitt finden/
Ja dise seind als ain liecht far scheinend in
der welt / mitten vnter dem vnschlachtis-
gen vnd verköreten geschlechte / Philip. 2.

Wenn er spricht/ Gleych wie euch Chri-
stus vergeben hatt/ also auch jr/ setz er die
maß vñ rechtschaffene losung der Christē/
nemlich/ das/ wa ainer dem andern nit zů
gütte hellt/ oder ja den zorn laßt mitt der

Sonnen vntergeen/ **Eph. 4.** ain gewisses
zaichen sey/ Got habe die erkentnuß seiner
gütthät durch Christū/ in disem menschen
noch nit scheine lassen/ **Es** ist auch die grō
ste kunst der Christē/ daran sy jr lebenlang
übrig genūg zū leeren habē/ vnd werden es
nit auß leeren. An Christo Jesu seind bayn
vnd flaisch/ die bain halten das flaisch/ vñ
des flaisch ist vil meer den der bayne. Also
seind in der gemaine starcke vnd schwache
Christen. Die starcken Christen seind Chri
stus knochen/ Die schwachē Christen seind
Christus flaisch/ darüb sollen die schwach
en vnd flaisch vō den starcken vnd baynen
getragē werden vñ getrōstet. Paulus sagt
zun Rōmern vō zwayerlay schwachē/ Im
leben eusserlich/ im glaubē innerlich/ Von
den schwachen im leben steet **Gal. 6.** also
geschriben/ Lieben brüder/ so ain mensch
etwas von ainem fāl/ übereylet wurde/ so
vnterweyset in mit sänfftmutigem gayst/
die jr gaystlich seyt/ Vñnd sihe auff dich
selbs/ das du nit auch versücht werdest.
Ainer trage des andern last/ so werdet jr
das gesetz Christi erfüllen. Lieber sage mir
hie/ was hayst last/ was haysset burde?

Item was haist das geseze Christi? frey-
lich beschwerung/vnlust vnd liebe/ Den fra-
ge Jesum da er das Creutz auff sein halse
zum thore hinauß tregt/was er trage? So
wirt er dir sagen / Onera tua / dein burde.
Tregt er nun vnser burde/ lieber trage dei-
nes nächsten burde auch. Burde haist es/
nit lust/ Den der liebe gegenwurf ist nichts
den vngunst/vnflat/vnlust. Mat. 5. sagt
Christus/ Wen jr die liebet/die euch lieben
vnd denē wolthut/die euch wolthun/was
hapt jr sonderlichs gethon? thun das doch
auch die Hayden vnd Zölner? Ja ain scor-
pion vnnd schlange thut dir auch nichts/
wen du in nichts thust/ Christus gibt liebe
für zorn/also wir auch/wöllē wir anderst/
des hymnlichen vaters kinder sein/vn Chri-
stus geseze erfüllen. Von der schwachait
des glaubens schreybt er Roma. 14. Den
schwachen im glauben nemet auff/ vn ver-
wirret die gewissen nit/Die starcken lassen
es schwärlich/sy verachten die schwachen
vnd wollen ire schwachen nit tragen/ Her
widerumb die schwachē ergern sich leicht
an der starcken glauben/Darumb muß hie
die liebe maysterin sein/ vnnd auff beyden

seytten wören / versünen vnd fryd vnd ay-
nigkait machen / wie denn folget.

Über das alles aber ziehet an die
liebe / die da ist das band der voltkö-
menhait.

In der gemaine seind schwache vñ star-
cke / die allain die liebe beyainander behelt
sonst werden von stundan / Secten vñ rot-
ten darauß / Es seind in der gemaine / der
starcken gabē vil / Propheceyen / mit zungē
redē / krankhait haylen / allerlay essen kün-
den ic. An disen müssen die schwachen ster-
cke leren / vñ die starcken müssen die schwa-
chen herzu lockē / biß sy auch starck werdē /
Den also wirt die rayne lere voltkömen / vñ
bindet die schwachen an die starcken / vnd
die starcken widerumb an die schwachen /
Sonst wēn die starckē allain sich sondern
wöllen / vnd die schwachen verachten / so
ergern sich die schwachen / vnd rotten sich
wider die starckē / Das hat Sant Paulus
maysterlich geleeret. 1. Corin. 12. 13. 14.

Vñ der fryde Gottes behalte die
überhand in ewerem hertzen.

Hie ist der liebe jr maß gegeben / wie weyt

K

sy sich erstrecken soll/ Den also weyt soll jr
fügen/ dienen/ weychen / vnd raum vnn
statt geben / biß Gottes eere vnd der fryde
der gewissen möchte verletzet werden/ als
wenn man wölte auß dem dienst ain nott
machen/ oder die schwachen wölten ewig
schwach bleiben / vnn den gleubigen das
selbige zur schmach irer leer fürwerffen/ so
es doch nit schwachait sonder bosshait ist/
als vns yetzt vnser Juncfherin thun. Da
muß der glaube den fürzug haben/ vnd der
liebe vergessen werden/ nientaüt weichen/
sonder der lere zü eeren / thun was die frey
hait des glaubens fordere. Also thet Pau
lus/ Petrus zü Antiochien/ Gal. 2. Darüb
spricht er auch/ vñ der fride Gottes behal
te die oberhand in ewrem hertzen/ Gottes
fryde geet das gewissen an/ vnd das hertze
die bayde müssen rayn vnd frey bleybē/ vor
Gott/ Es geschehe mit fryde oder vnfyde
Ja es wirt mit vnfyde geschehen/ eusser
lich/ wie Christus sagt / Ich bin nit kōmen
frid (eusserlich) züschicken auff erden/ son
der das schwerdt vnd fwer.

Item meinen frid gybe ich euch zc. nitt
wie die welt Jo. 14. vñ Ro. 12. Ist es müg

lich/so vil an euch ist(Gottes eere sol aber
fürgeen) so hapt mit allē menschen fryde.

Zu welchē jr auch berüffen seyt
in ainem leybe/vnd seyt danckbar.

Dis ist das danckopffer im newen Tes-
tament/mitt liebe/ der schwachen vnlust
tragen/Welchs dem altē menschē/flaisch
vnd blüt/durch leybe vnd leben gehet/vnd
tödtet in Roma. 12. Es ist aber tröstlich/
das wir darzü berüffen seind / den der vns
darzü berüffen hatt/ der wirt auch fleyssig
anhaltē/das angefangene werck zu volen-
den/Vnd wiewol wir darzü berüffen seind
ist es doch vnmüglich wa der alte Esel vñ
tage zu tage / durchs wort Gottes on vn-
terlaß nitt beschnitten vnd getödtet wirt/
Darumb folget weytter.

Lasset das wort Gottes inn euch
reychlich wonen/ in aller weyßhait
leeret vnd vermanen euch selbs mit
psalmen vnd lobsengen vñ gavy-
stlichen liedern in der gnade / vñ sin-
get dem herren in eweren hertzen.

In disem text seind drey stück/ Das erste
Gottes worts wonung in aller weyßhait/
das ist/ in reychē erkentnuß Gottes durch
Christum / wes wir vns zū jm versehen vñ
von jm gewarten sollen / des liebsten vnd
des besten. Das ander / ist das leeren vnd
täglich vermanen mit gaystlichen gesen-
gen/ liedern/ psalmen vnd lobe/ Darinne
die weyßhait getriben wirt/ vnd die gnade
gerümet/ dauon den das hertz frölich sin-
get von der erlangeten gnade. Das dritte/
begreyfft das ganze leben / in essen vnnd
trincken/ vñ eusserlichem wandel/ darinne
kein scheynen/ kein heuchlen/ kein herlig-
keit/ eusserlich gesehen wirt / sonder eyttel
warhait vnd ernst/ vñ das ist das er sagt.

Vnd alles was jr thut mit wortē
oder mit wercken / das thut alles in
dem namen des Herren Jesu / vnd
danckt Gott dem vater durch jm.

Solomon hat diß mit deutlichen wor-
ten außgedruckt / den heuchlern zū schan-
den/im prediger. 9. So gee hin vnd yß dein
brot mit freuden / trinck deinen weyn mit
gütem müt/ Den dein werck gefellt Gott/

Laß deine klayder ymmer weyß sein / vnd
laß deinem hauptē salben nitt mangeln/
Brauch des lebens mit deinem weyb/ das
du lieb hast/so lang du das eytel lebē hast/
Das dir Got vnter der sonnen geben hat/
so lange dein eytel leben weret / Denn das
ist/dein tayl im leben/vnd in deiner arbeit
die dir Gott vnter der sonnen geben hatt/
Alles was dir fürhanden kompt zůthū/
das thū frisch/ Den in der helle da du hin-
faarest/ist weder werck/ kunst/ erkendtnuß
noch weyßhait.

Ir weiber seyt vnterthon ewern
mennern/ wie sichs gebürt inn dem
Herren.

Allen stendē vnter den Christen/die nit
offentlich wider das Euangelion seind/
welche droben im andern Capittel ange-
zayget seind/ muß man sagen / das sy ires
berüffes warten/vnd bey leybe nit darauß
schreyten/ Den der teuffel hat lust/ das er
mag das verderben was gůtt ist / wie Job
sagt / inen die augen blenden / auff ainen
hohen stand führen / iren stand in vnlustig
vnd vntráglich zů machen. Den weybern

ist aufgelegt von Got/ das sy sich vor iren
männern bucken sollē/ Gene. 3. inen gehor-
sam sein/ nichts thun noch gedencē/ noch
fürnemen / on vrlaub vnd radt ires man-
nes/ Denn das haisset vnterthon seyn/ wie
es gehöret im herren / Nämlich / das das
weyb wisse/ ir man sey arm oder reych/ ain
nar: oder weyse / in Eren oder schanden/
das sy den man von Gott habe/ vnd Gott
fordere von ir / gehorsam dem manne zu
laysten/ in in allen dingen zúfolgen/ vnd
iren sinn gefangen geben/ wen sy schon et-
was sich duncken laßt / als wisse sy es bes-
ser. Also rümet Sant Peter die erzmüter
Saram. 1. Petri. 3. Denn also haben sich
auch vor zeytten die hailigen weyber ge-
schmückt/ die ir hoffnung auff Got satzten
vnd iren männern vnterthon waren / wie
die Sara Abraham gehorsam war/ vnd
hieß in Herre/ welcher töchter ir worden
seyt. Dieweyl nun den weybern diß auff-
geleget ist / das der man soll ir Herre sein/
1. Cor. 11. Des weybs haupt ist der man ic.
So wolten sy gerne auß des teuffels einge-
ben selbs herre sein. Wen sy aber nach dem
schwert greyffen/ vnd werden darüber ge-

schlagen / So müßen sy es in haben / denn
wöllen sy nitt in Gottes namen gehorsam
sein / so müssen sy ins Teuffels namen ge-
schlagen werden / Heua / da die Schlange
zü jr kam / wolt auch selbs maister sein / vñ
vnterwand sich der Disputation mitt der
Schlangen / darumb viel sy vnd richte ai-
nen sollichen jamer an / Were sy aber hin-
gangen / vñnd jren man Adam gefragt /
Adam so vnd so geet mirs / Was radtestu
mir / Wie soll ich mich halten / solche rede
hat mir die schlange fürgehalten / So wes-
re sy der schlangen entlauffen / Wenn sy
gesagt hette zur schlangen / Ich kan dich
nit berichten / Ich will meinen man lassen
mit dir handeln.

**Ir menner liebet ewere weyber
vnd seyt nit bitter gegen in.**

Wie feyn taylor S. Paulus vnther den
Eelenten die ämpter auß / Den weybern
gehöret vnterthon zůsein / ains stillen vnd
sänfften gaysts zůsein. 1. Pet. 3. Denn ain
weyß das im laßt die hauß sorge anligen /
kan nit sehen das es vnendlich zůgee / vnd
wenn es nit recht gchet / vnd geschicht vil

schaden vom gesinde/ so wirt sy bewegt zu
vngedult/ schilt/ flucht/ vnd lebet übel im
hause/ Zû dem so ain weyb der eeren frum
ist/ so kan sy nit leyde / ja nit hold sein ain
losen weybe / hudel vnd luder baner / Das
sein eere in die schanze schlecht. Wider di-
se zway laster lernet Petrus die zwû tugêt
sânfft vñ stille sein im gaist/ also das sanft
mût das hertz betreffe / das sich nitt alles
dings so hart anneme / sonder vil lasse für
über gehen/ sonst macht man das gesinde
hauptscheüch vñnd hartnäckig/ Wie das
sprichwort lauttet/ Schlege/ faul/ vnd ist
des flûchens vñ scheltens kein auff hören.
Stille aber bedeuît das eusserliche geberde
gegen allen menschen/ vnd gedencen kan
Gott den hudel leyden/ so leyde du in auch
wer wayßt wie lang du frumme bleybest/
Den mânnern gehört liebe gegen den wey-
ber/ Es lautt aber selzam/ Das man den
mânnern gebietten soll / das sy ire weyber
lieben sollen/ gleych als liebten sy sonst nit
genûg ire weyber / Aber es ist ain nöttige
leere / die da begreyfft in sich / das ganze
heywonnen der mânnern bey iren weybern.
S. Paulus sagt Ephe. 5. Also sollen auch

Die mǎnner ire weyber lieben / als ire aige-
ne leybe / vnnnd wie Chriſtus die gemaine.
Chriſtus liebt die gemaine / vnnnd gibt ſich
für ſy / auff das er ſy hailige / Vnd da er die
gemaine lieben will / da findt er nichts an
ir / das er billich lieben ſolte / ſonder das er
haſſen ſolte / ſchwachait / Franchhait / vnd
alle vnluſt. Also auch / wenn ain man ge-
rechnet wirt / gegen ainem weyb / ſo iſt der
man vil ain müttiger / ſtercker / herlicher
ding den ain weyb / vñ ain weyb iſt gar ain
gebrechlich gefeſſe gegen ainem man ge-
rechnet / das / wa hundred weyber bey ain
ander ſeind / in ſchrecken vnnnd färligkait
des todes / mit also vil müts haben als ain
man.

Darumb ſchleiſſet S. Paulus / Das die
mǎnner ire weyber lieben ſollen / wie Chri-
ſtus die gemain / dz iſt / ſy ſollē ire ſchwach-
hait / waichmüt / vnnnd verzagen / tragen /
vnd mitt vernunfft dulden . Vnd dieweyl
das weyb / ain ſolch ſchwach gefeſſe iſt / ſo
hat es ſeines waichen müts halben / ymer
ſorge / man verachte es / man lieb es nitt /
Derhalben iſt den mǎnnern gebottē / das
ſy in allen jren wortten / wercken / zaychen /

vnd gangem beywonen / den weybern lieb
erzaygen sollen / also das das weyb / alles
was der man mit jr schaffe / nicht anderst
deüten künde / der man maine es trewlich
vnd gütt mit jr. Das sagt hie Paulus/seyt
nit bitter gegen in / das ist / straffe/ zucht
vnd vnterweysung bedürffen sy wol / aber
ain man soll der geschicklichkeit sein / das
ers mit gutem gelimpff thü/ nit mit bitterem
herzen / Sonst gedenckt das weyb/er
sey jr feind/ Den man kan ain weyb nit ge-
nüg lieben/ es hatt noch ymmer sorge/ der
man sey jr nit hold. S. Peter spricht 1. Pe. 3
Ir männer wonet bey ewren weybern mit
vernunfft / vnd gebt dem weybischen/ als
dem schwächsten werckzeüg sein eere/ Das
ist/ ain man/ ain vernünfftige creatur/ soll
wissen/ wie er ain weyb regieren soll/ also/
das er es nit wölle alles schnürgleich ha-
ben/ Er wirt finden/ das dz weyb schwach
ist/ leichtlich zürnet/ vñ vngedultig wirt/
das er da stille halte / vnnd straffe sy aller
erst wenn der zorn über ist / Sonst wirt vn-
ainigkeit drauß/ Denn zween harte stain/
malen selten klain/ Es muß ains dem an-
dern vnderweylen ettwas übersehen/ son

derlich aber der man dem weyb/der schul-
dig ist dem schwachen werckzeüge / von
Gotts gebotts wegen / sein Eere zügeben.
Wa nun störrige / wilde / rohe köpffe seind /
die sollen wissen / das in diß gebott gelte /
das sy sich lernen vor Gott fürchten / vnd
gnade bittē. Got thut allain den weybern
die eere / das er in irem bauche / das hüpsch-
este werck züricht / ainē vernünfftigē men-
schen vnd lebendige seele / zū dem so kömen
alle menner von weybern her. Darumb sey
verbannet von Gott / welcher Gott seyne
werckladen verachtet / darinnen er selbs zū
gericht vnd gemacht ist / Vnnd hie will ich
den weybern nit vrsach geben haben / sich
des zū überheben / denn es gehöret in gleych-
wol forcht vnd gehorsam / nichts zuthun
auß irem güttuncfen / auch nicht vrsach
geben dem manne vnd seinem toben / Dar-
umb will ich hie den frommen weybern zū
vnterricht erzelen / was Sant Augustein
von seiner mütter Monica schreybt / in sei-
nen Beychtbüchern / Da sy züchtigklich
vnd erbarcklich also von iren Eltern auff-
gezogen / vnd nun manbar war / ist sy ainē
manne vertrauet worden / dem dienete sy

als irem Herzen / vnd hatt sich bemühet/
wie sy in dir Herze gewunne vnd redte von
dir mitt ain geberde / dadurch du sy also
schön machtest / das sy ir man mitt eeren
liebte / vnd sich ir wunderte / Was ir aber
geschach von irem manne haymlich / dul-
dete sy alle irs mannes beschwerung also/
das sy noch nye nit / mit irem manne dar-
umb zürnete / Ir man war ain güttiger
man/ aber schnell zû zorn / vnd hatt so ain
bösen synn/ Das/ wenn in sein laun an kam
er vor zorn wüttete/ Sy aber legte sich wi-
der seinen zoren nitt / wenn er in an kam/
weder mitt wortten noch mitt wercken /
Sonder wenn sy in stille/ rûwig/ vnd gûts
mûts fand / So zaygete sy im vrsache an/
wie er one vrsache gezürnet hette / Zum
letsten / wenn vil anndere weyber braun
vnd blaw vnter augen geschlagen waren/
die doch vil güttiger männer hetten / denn
Monica/ vnd über ire männer klagtē wie
sy von in geschlagen wurden / Die straffte
Monica / vnd erinnerte sy/ in ain scherz/
mit ernstten wortten/ irer statuten/ die die
eelichen weyber halten sollen/ vnd brachte
sy dahin/ das sy sich für mayde halten solt

ten/vnd in kainen weg iren stoltz vñ hoch-
müt gegen irē herren brauchē/Vnd da sich
die andern weyber wunderten / dieweyl sy
wüßten / wie Patricius ain herber / heßti-
ger man were / vnd doch kain mensch ye ge-
hört hette / das Patricius sein weyb hette
geschlagen / oder das sy ainen ainigen tag
mit ainander vnains gewesen werē / sagte
Monica jr weyse wie drobē erzelet ist. Wa-
die weyber disem exempel der lieben Mo-
nica folgeten / so wurden sy villeycht meer
rūw/vnd weniger vngemach haben.

Ir kinder seyt gehorsam den El-
tern in allen dingen / Denn das ist
dem Herren gefellig.

Der gehorsam der kinder gegen iren El-
tern/begreyfft/das sy den Eltern thū sol-
len/ gleycherweyse als jnen von den eltern
geschehen ist/ sy hören/hawsen/ versorgen
mit aller notdurft. Zum anderen will das
vierdte gebott/das ain yegklich kind wisse
das jm sein vatter von Gott zūgeben ist/
Er sey ain Narz oder weyse / Reych oder
arm &c.

Ir vetter zanket euch nitt mit
eweren kindern/ auf das sy nit klain
müttig werden.

Zun Ephesern am. 9. sagt sant Paulus
diß mit klärern worten/ Ir vetter / raytze
ewere kinder nitt zû zorn / sonder ziehet sy
auff in der zucht vnd vermanung / an den
Herzē/ das ist/ ziehet sy also/ das die kinder
Gott leren durch euch fürchten / den man
findet manchen zornigē kopff/ der den kin-
dern so hart ist/ das sy lieber durch ain feür
lieffen/ den das sy für in sollen kōmen/ wel-
che forcht inn in also gar bleybet / das sy ir
lebenlang / blöde / verzagte leutte bleyben
müssen / vnd werden vnterweylen die kin-
der verursacht / alle mord vnd vnglück an
zûrichten/ vnd wagen ettwas düber/ das
in sonst layd were / Das auch die Hayden
gescholten haben/ vnd exempel geben/ wie
etlichen veteren die kinder in krieg entlauf-
fen seind/ das hernach die Eltern fast sere
gerawen hatt / Es ist ain böse weyse / das
man die jungen kinder/ will stillen/ wen sy
wainē/ mit dem bösen manne/ vnd andern
dingen/ damit man sy schreckt / denn man

ſoll ain kind nit zûhart/ auch nit zûwaych
ziehen/ darnach ains yetlichen Natur ley-
den will/ ſonder eerlich/ zû zucht vnd ver-
nünfftigem weſen/ nit mit eytel gezwang/
drang vnd ſchrecken. Die rütte ſagt Solo-
mo treybt die tothait weg / welche an das
herge des kindes gebunden iſt/ Prouer. 22.
Item wer ſein kind lieb hatt / der ſchonet
der rütten nit. Eccle. 30.

Ir knechte ſeyt gehorſam in allen
dingen eweren leyplichen Herren/
nit mit dienſt vor augē/ als den men-
ſchen zûgefallen / ſonder mit ainfel-
tigkeit des hertzen/ vnd mit Gottes
forcht / Alles was jr thut das thut
von hertzen/ als dem Herren/ vnnd
nit dem menſchen / vnd wiſſet / das
jr von dem herin empfahen werdet
die vergeltung des erbes / Denn jr
dienet dem Herren in Chriſto.

Diſe leere iſt gar verloſchen / vnnd ich
wayß nicht wes die ſchuld iſt / ob ſy wenig
Chriſten vnder den knechtē ſeind / oder ob

sy der teuffel geblendet hat/ das sy ain sol-
che Gottes gnade vnd reychs versprechen
nit achten/ denn in aller welt geet das ge-
schray / über das gesinde / das es vntrew/
vnfleyssig ist/ vnd ser übel dienet/ knechte/
mayde/ taglõner/ arbayter/ zimmerleutte
maurer/ stainmetzē/ vñ aller hande dienst
volck. Aber lieber Herigott/ wenn sy sehen
küntē/ wie Gott auch für die dienstbottē
sorget/ wie frölich solten sy iren Herrn mit
trewen vnd pflicht dienen/ Darzū so redet
hie S. Paulus von den aigenen leuten/ die
erb vnd leyb aigen waren/ das auch der sel-
ben Gott nitt vergessen will / sonder inen
das erbe geben/ vnd jr dienst soll vor Gott
angenommen werden / nit als geschehe er
iren Herrn/ sonder Jesu Christo selbs. Wie
wolten sy ymermer besser thun/ vnd Gott
näher kōmen? Man sucht des teuffels na-
men in allen stenden/ wie man Gott diene
mit fasten/ Messen/ vnd anderm teuf-
fels werck / vnd dise rechten Gottes gütte
werck will niemandt sehen / Den hie steet
weder vō fasten/ noch in fasten legen/ oder
Ablassbrieffe lösen/ sonder trewlich dienen
hayffet es / das ain dienstbott eben so vil

thue/ wenn der Herr nit zusehet / als wenn
er zusehe/ Das will Gott haben/ man list
das Abraham ainen getrewen knecht ha-
be gehapt/ dem er alle seine güter vertrau-
et hatt/ Genesi. 23. Wir teutschen sagen/
Ainen trewen dienstbotten berattet vnser
Herrigott/ vnd hilfft jm zu eeren.

Wer aber vnrecht thut/ der wirt
empfahen was er vnrecht gethon
hat/ Vñ gilt kein ansehen der person

Des spruchs braucht Paul⁹ gerne Ro. 2
Gala. 2. Ephe. 6. Colo. 2. vnd hie/ Es gilt
nur vor Gott der da recht thut / Es sey
Hayde/ Jude/ Beschnitner/ vnbeschnitner
vnkrieche/ krieche/ Scyta/ knecht/ freyer/
damit bestettiget werde/ die gerechtigkeit
die vor Gott gilt/ das sy allain auß glaubē
kōme/ on alles ansehen der person/ Herwi-
derumb so wirt auch kein ansehen sein im
übelthūn/ Das böse muß gestrafft werde/
das güt muß belonet werden/ Der thut bö-
ses / der Gottes wort nitt glaubet / sücht
auch nit hilff/ wenn er sihet das er jr bedarf
Der thut güt/ der sein vnuermügē empfin-
det/ vnd wolt gern anderst sein. Roma. 7.

Ir Herren was recht vnd gleych
ist/ das beweyset den knechten/ vnd
wisset/ das ir auch ainen Herren im
hymel hapt.

Den Herren gehört irem ampt nach/
das sy gnedige Herren sein / das ist/ gnade
vñ gunst aller welt/ sonderlich irē dienern
erzaygen / vnd in thūn was recht ist/ Das
ist / was inen gebüret / das sy in ir fütter/
zymliche vnterhaltung / vnd der gleychen
geben / Auch was gleych ist/ denn das ain
Herre auff ainē oft ainen vnwillen wirfft
on schuld/ vnd vrsach/ vnnd will in weder
hören noch sehen / auch nit lassen zur ant-
wort kommen / das ist weder gleych noch
recht/ ja vngleych vnnd vnrecht / Vnd die
selben Herren sollen wissen / Das sy auch
knechte seind / vnd haben auch ainen her-
ren im hymel/ der gleichsfallē mit inen ge-
baren will/ Sy bedürffen nicht halb so sere
stolzieren/ Er helt sy so gering wider/ wie
sy ire knechte halten.

Diueyl hie grosse vñ klaine Herren bey
ainander seind/ so dringet mich die not nit
zū schweygen / Das yetzt die Herren iren

dienern nitt vergunnen wöllen/ weyber zū
nemen. Vnd als bald sy die nemē / müssen
sy den hoffmeyden/ allain der vrsach hal-
ben/ Er ziehe dem hoffe zūwil ab/ vñ man
müsse inē den sold bessern / das wurde dem
den Herrn arm machen/ Also gnawe sucht
es der teuffel/ vnd seind in disem stücke/ die
Fürsten vnd Herren auch ain glid des An-
tichrists/ Denn gleych wie der Papst nye-
mandt laßt ainen Pfaffen sein / der ain
weyb hat/ Also lassen dise Fürsten vnd her-
ren auch kainen iren dienen sein / der ain
weyb hat/ zwingen also mit gewalt/ ire die-
ner hürerey/ vnd Lebruch zū yeben/ ob sein
sonst nit genüg were / Vnd wöllen hie der
Gotlosen Fürsten geschweygen / Von den
reden wir aber/ die sich für Christlich Euā-
gelische Fürsten wöllen gerhümet haben/
Das die doch vnserm Herigot zū eeren ain
feyn regimēt anfiengen/ Got wurde in des-
ster mer glücks vnd sigs/ gelt vnd gūts ge-
ben/ Wen sy jm zū eeren / jr gesind züchti-
ger hielten vnd zugen/ das dan nit gesche-
hen kan/ wa diß hoffgesinde nit das meer
tayl beweybet ist. Summa Summarum/
Den Herren gehört auch vnterweylen iren

dienern zu übersehen / Denn sy fälen ires
ampts ja so oft als ain diener. Es hatt
Kayser Friderich / Kayser Maximilians
Vatter / zum sprichwort gehapt / Qui nes-
cit dissimulare / nescit imperare. Wer nitt
kan durch die finger sehen / der dienet zu
Eainem Regiment nitt / Denn es muß ain
Herze hören vnd nitt hören / sehen vnd nitt
sehen / nit alles straffen / sonder allein was
den gemainen frid brechen vnd auffheben
will / Das soll er mit ernst straffen / vñ nit
gedulden / den er ist seinenthaltē allain nit
ain Fürst / sonder der gemain zu güt / die bö-
sen zu straffen / vñnd den frömen fryde zu
schaffen.

Das vierde capitel.

Nach dem S. Paulus vnterricht geben
hat allen stenden / Man / Weyb / Kindern
Eltern / Herren vnd knechten / Darinne al-
le stende begriffen seind / Hebet er nun gar
maysterlich an zu leeren / wie man betten
solle / Den vnmüglich ist es / das yemant in
seinē stande bleybe / wa er durchs wort nit
getriben / krafft vnd stercke im gebette von
Gott erlange / Darumb folget.

IAltet an an dem gebett vnd
wachet in demselbigen mit
dancksagung / vnd bettet zu gleych
auch für vns / auff das Got vns die
thür des wortts auffthue / zu reden
das gehaymnus Christi (Darumb
ich auch gebunden byn / auff das
ich dasselb offenbare) wie ich soll
reden.

Er haisset am gebet anhalten vnd dar
inne wachen / mit dancksagung / das auch
die Christen wol bedürffen / Denn wa das
Euangelion ain wenig beginnet zu leuch
ten / die gewissen zu freyen vnd zu trösten /
So erhebet sich der teuffel mit grosser ge
walt darwider / vñ tobet also fast / das die
Christen deücht / als sey es nun vmb das
Euangelion geschehen / lauffen doch zu got
vnd bitten / er wölle über seynem wort hal
ten / vnd dem teuffel wider / Wenn aber
Got ain zeytlang das vnglück waltē laßt
So fellt hie ainer ab / dort der ander / das
den dise vermanung den leutten groß von

nöthen ist / Das sy darumb gleychwol nit
ablassen/sonder anhalten/vnnd wachen/
auch Got dancken/das er ain klains heuf-
lin erhelt/der hoffnüg/er werde den hauf-
fen bald grösser machen / Auff die weyse
betten die Apostel Acto. 4. Vnd nun herre
sihe an jr tröwen/vnd gib deinen knechten
mit aller fraidigkait zů reden dein wort 2c.

Wandelt weyßlich gegen die draussen seind.

Sant Paulus will haben/man solle die
Hayden mit der schrift bekören / mitt der
weyßhait/ Aber der Bapst mitt Thomas
de Aquin/Scoto/vñ anderen heuschreckē
hat sy wöllen mit philosophhey vñ mensch-
licher kunst bekören/Darüb seind sy Hay-
den worden/vnd die Hayden nit Christen.

Vnnd löset die zeyt.

Die zeyt lösen/ ist eben das er sagt auch
zun Rãmern. 12. Schickt euch in die zeyt/
Es folget aber dem vorigē feyn/Wandelt
in der weyßhait/last ewren glaubē durchs
Euangelion yederman offenbar sein/vnd
löset die zeyt/ Thüt in allen dingen/wie es
sich schicken will/ wie es der gemain vnnd

Euangelions nutz vñ eere erfordert/ Seyt
an kein stette/ort/ weyse/ maß/zeyt gebun-
den/ Vñ diß ist aigentlich geredt wider die
Philosophey / menschliche ordnung vñnd
weltliche sagüng/ die on zeyt/ stette/ person
gebunden ist/ wie droben gemelt.

Wer rede sey allezeyt in der gna-
de mit saltz gewürzet/ das jr wisset/
wie jr ainem yeglichen antworten
sollet.

Im alten Testament müste man zu al-
len opffern saltz haben Leuiti. 2. Christus
legt das auß Mat. 5. Ir seyt das saltz der
erden/ vñ den Aposteln/ die das wort fürē
Item Mar. 9. Hapt saltz in euch ic. Saltz
dient darzu / das es wöre dem stancke vñd
vertreybe die würme / Das Euāgelion die-
net darzu/ das es die lüste vñd würme des
alten Esels dempffe/ sonst würdē die wür-
me lebendig vñd das flaisch stinckend. Nu-
were es nārisch gehandelt/ weñ man wöl-
te salzen ain haile vnuerwundte haut/ die
stain/ den must/ kot/ holz/ vñd etwas des
gleychen/ Darumb wirt hie das Saltz/ für
die leere genōmen. Welche salzen soll die

es bedürffen / das ist / geprediget werden
nach dem die leutte die es hören / geschickt
seind. Die gottlosen soll man hart straffen
vnd inen mitt dem gerichte tröwen / Die
Christen soll man trösten / vnd vergebung
der sünden verkündigen / Also sagt er auch
2. Timo. 2. Besleyß dich Gott züerzaygen
ainen bewerten vnd vnuertadlichen arbai
ter / der da recht schneyde dz wort der war
hait / das ist / der da wisse wie mā sich mit
dem Euangelio nach der leute maß schick
en soll / milch fürtrage den kindern / speyse
vnd starck getranck den männern ꝛc.

Wie es vñ mich steet / wirt euch
kund thun / Tychicos der liebe brü
der vnd getreuer diener / vnd mitt
knecht in dem Herzen / welchen ich
habe zü euch gesandt vmb dasselbi
ge / das ich erfare / wie es sich mitt
euch helt / vnd das er ewere hertzen
ermane / sampt Onesimo dem ge
treuen vnd lieben brüder / welcher
von den eweren ist / alles wie es hie

zusteet/ werden sy euch kund thun.

Es grüßet euch Aristarchus mein
mitgefangener / vnnnd Marcus der
neff Barnabe/ vō welchem jr hapt
gebott empfangen / So er zū euch
komt/ nemet in auff. Vnnnd Jesus
der da hayßt Just / die auß der bes-
chneydung seind. Dise seind allain
meine gehilffen im reych Gottes /
die mir ain trost worden seind.

Es ist ye der größte trost/ in allem anli-
gen yemandts habē/ der des worts bericht
ist vnd glaubet/ Den̄ wem Gott die gnade
thut/ das er in last in nöten zum gehör des
worts kōmen/ der ist genesen. Gotes wort
komt vergebens nit wider/ Es geet auch
on frucht nit auß/ Darūb sagt S. Paulus
billich / Die mir ain trost worden seind ꝛc.
Es ist Got den vātern noch nye so nach ge-
wesen/ als er vns ist/ Das er auf ains yeg-
lichen Christen zunge vñ munde sich will
hören vnd sehen lassen/ zū trost vnd rettūg
im leyden vnnnd sterben. Man liest von S.

Anthonio/das er bey viler marterer sterbē
gewesen sey / vnd wen sy yetz haben wöllen
sincken vnd zagen/ hat er zu in gesprochen
die augen zu/ Es ist vmb ain klains stünd
lin zūthūn/so ist es auß. Hat auch also vil
marterer getröstet/ vnd standthafftig be-
halten/durchs wort/Also sagt S. Paulus
Rom. 1. Das ich sampt euch getröstet wur-
de/durch eweren vnd meinen glauben.

Es grüßet euch Epaphras der
von den eweren ist/ain knecht Chri-
sti/vnd allezeyt ringet für euch mit
gebetten / auff das jr besteet volkō-
men/vnnd erfüllet mit allem willert
Gottes. Ich gebe jm zeügknuß/das
er hat ainē grossen eyfer vmb euch
vnnd vmb die zu Laodicea / vnnd
Hierapoli.

Paulus. 1. Timo. 5. sagt/ Die Eltesten/
die wol fürsteen / die halte man zwifacher
eeren werdt/sonderlich die da arbeiten im
wort vnd in der leere 2c. Nim alten gehōre/
das man vil von jm halte/ Zum andern/

das man in auch versorge/ den ain Ochsen soll man das maul nitt verbinden/ der da dreschet / Vnd Moses lobete Josue vor dem ganzen volck / Also thut hie Paulus auch/ lobet/ preysset/ rümet/ die trew/ glauben/ fleyß / emsiges begyr des Epaphra/ durch welchen sy beköret seind/ auff das sy dester grösser vsach haben/ im zů glauben vnd zů folgen / dieweyle von paulo also hoch gerümet wirt/ Denn er sagt/ Ich gebe im zeügtnuß/ Er hat ainen grossen eyffer vmb euch.

Es grüßet euch Lucas der arzt/ der geliebte / vnd Demas. Grüßet die brüder zů Laodicea / vnnnd den Timphen/ vnd die gemaine in seinem hause. Vnd wenn die Epistel bey euch gelesen ist / so schafft / das sy auch inn der gemaine zů Laodicea gelesen werde/ vnd das jr die vñ Laodicea leset.

Disß ist das Elaine heufflin zů Rom/ das Got glaubet in ainer solchē grossen mecha

tigen statt / Das es noch nitt wunder sey/
das wenig Christen auff erden seind.

Vnd saget dem Archippo / Sihe
auff das ampt / das du empfangen
hast in dem Herren / das du dassel-
bige aufrichtest. Mein gruß mit
meyner Paulus hand. Gedencket
meiner bande. Die gnade sey mitt
euch. A M E N.

Archippus ist der Colosser Bischoff /
Dem befolcht er das er seins ampts warte
das er empfangen hat im Herren / das ist /
das er fortfare one schew seines ampts zu
warten / Es verdrieße wen es wölle / daß es
gilt hie nit / das man thū was mensche ha-
ben wöllen / Gal. 1. Wenn ich den menschen
gefiere / so were ich Christus diener nit.

Das Valet vnn

letster abschyd von
Speyer.

Lieben freunde / dieweyl ich sehe / das
Wolffe nach vns kömen werden / die nitt
ewere seelen / sonder ewer wolle vnd güt be
geren / So will ich dem Euangelio zu güt
daran wir vnwirdigen armen sündler / Geo
orgius Spalatinus / Adam Fulda / vn ich /
auß Gottes wunder grossen gnaden / vnse
ren dienst gethon haben / den ainfeltigen
ain leze lassen / wie sy sich / wider die Wöl
fe schützen sollen / auff das sy irer wayde /
des Götlichen worts nit beraubet werdē.

Das hauptstück der Christlichen kirchē
ist / Wardurch der mensche rechtschaffen
frum werde / vnd lust habe gütts zūthun ?
Das geschicht aber allain auß dem glaubē
habacuck. 2. Der gerechte wirt seins glau
bens leben / on geseze / on zancf / on drancf
Ro. 3. Die gerechtigkait ist on das geseze
erschynen Gal. 2. Den so durch das geseze
gerechtigkait kompt / so ist Christus ver
geblich gestorbē. Darumb wen die Wölffe
werden sagē / wiltu frum werden / so müst
du gütte werck thun / fasten / meßhören ꝛc.
in ain Closter geen ꝛc. So solt ir antwortē
Wolff bistu toll vnd thöricht? Wie reymet
sich es auch nach der vernunfft zūreden?

Mein hertze/ seele/ vnnnd gewissen / ist ain
ewig ding/ Got ist auch ewig/ mein hertze
seele/ vnd gewissen/ ist ain gayst. Gott ist
auch gayst / werck/ Kirchen bawen / Ho-
ras Canonicas betten/ Fasten/ Kappen/
Blatten/ Eiden/ Almüßen geben/ flaisch
essen/ fische essen/ seind zeytlich vnd flaisch
Wie soll nun mein seele/ hertze vnd gewis-
sen / ain ewiges vnd gayst / mit Gott der
ewig vnd ain gayst ist/ durch ain zeytlichs
werck vnd flaisch/ vergleychen werdē? Es
müß ye auch ewig vñ gayst sein/ das sy bay
de vergleycht/ das wort Gottes/ das Got
ist/ ward flaisch/ auff das wir Got würdē
Johan. 1. Die an seinen namen glaubten/
den gab er gewalt kinder Gottes zū werdē
die nit auß dem geblüte/ Das ist von men-
schlicher Natur / leyb vnd seel/ witz/ ver-
stand/ kunst/ weyßhait/ vernunfft/ Noch
auß dem willen des flaischs / Das ist von
den hailigen vättern die darumb gefreyet
vnd kinder gezeüget habē. Dieweil in Got
versprochen hett/ Er wölte in irem somen
gebenedeyen alle geschlechter der erden /
Sonst weren Esau vnd Cain Gottes kin-
der gewesen 2c. Noch auß dem willen des

mannes/ vom geseze vnd wercken des gesetzes/ sonder die auß Got geboren werdē/ das ist/ die er erleucht/ den ers gibt/ das sy in kennen/ vnd ainen vater nennen.

Zum anderen/ So solt jr kein werck güt hayssen / Es geschehe denn dem nächsten zū güt/ Es sey Prophecey/ oder mit zungen reden/ die besten gaben vnd werck Gottes 1. Corinth. 13. vnd. 14. Osee. 6. Ich will güt that haben vnnd nicht opffer. Item/ die werck scind gütte werck/ die mit gedult geschehen/ vnnd das hertze enderen/ als dem feynde hold sein/ Das du weder mit fasten noch almüsen geben erlangen würst / Es muß etwas höhers da sein. Die werck zaygen ainem yegklichen wie nach vnd fer er bey Gott vnd von Gott sey/ Denn wer da findet bey jm / das er mit lust ain andern dienen kan / der hatt ain Sigil/ das Gott inn jm wonet / Herwiderumb/ wa du vnlust empfindest ainem anderen zū dienen/ so fürcht dich/ erschrick vor dir selbs/ vnnd bitte Gott/ das er dir dein hertze vernewen wöll.

Zum letsten/ So hat die liebe kein gegen-
wurff/denn vnlust/vnflat/übelthün/also
das sy das liebe außgnaden / dem sy von
Natur feind ist.

Summa.

- 1 Der glaube gibt dir Christum zu aygen
mit allen seinen güttern Roma. 8.
- 2 Die liebe gibt dich dem nächsten zu ai-
gen/mit allen deinen güttern.

Hierauß folget deñ/Das aller pfaffen/
Münich vnd Nonnen werck / ob sy wol
hüpsch gleyssen/ kein gute werck seind/son-
der ain grewel vor Got/ deñ gaystlich ar-
müt ist im gebē/ nit im nemen/ Die keusch
hait ist wider Gottes schöpffung vnd nōt-
tiges gesetz/wa Gott nit sonderlich hilfft/
das vnter. 3. vnd. 4. hundert mal tausent
nit ainem geschicht/ Der gehorsam ist wie
der die ersten vier gebott.

Von Gottes dienst.

Alle Gottes dienste/sollen mit den kir-
chen gepriengen den Ceremoniē/allain auf

das wort sehen / vnnnd sich auch nach dem
wort richten / Den sy seind alle nichts an-
derst / den ain kinder schule / Wie den alle
Clöster vnd stiffe erst gewesen seind . Die
Ceremoniē sollen auffgehabē vñ angesetzt
werden wie sichs leyde will mit bettē / mit
gesengen allain das die losung der Christē
reychlich getriben werde / mit propheceyen
vnd predigen / Liff Paulum . 1 . Cor . 13 . 14 .

Wenn sy nun sagen werden / Ey solt ain
solche ordnung mit Orgeln / singen / Mess
haltē ꝛc . Gott nit gefallen ? So antwortet
ir / On Gottes wort ist kain gūt / Zū dem
so gefelt Gott nicht / den was er gebotten
hat / Wa hat er euch diß oder ihens gehais-
sen / von euch ist geschribē / Diß volck eeret
mich mit den leffzen ꝛc .

Von der Messe.

Messhalten / ist Christus leyb vnd blūt
geniessen . Das geniessen aber geschicht im
glaubē / Darumb gleych als ain yeglicher
durch seinen aygen glauben muß selig / vnd
durch seinen aygen vnglauben verdampt
werden / Also kan auch niemant für ainen

andern Meßhalten/den leyb vñ blüt Chri
sti essen/Darumb seind alle andere messen
der nit vil zügleich niessen wider das Euā
gelion/das da spricht/ Accipite/ Nemet/
holet / Vnd ist die gröste Gottslesterung/
wie droben auß iren aigen büchern erwey
set ist / vnd wenn sy nach vnserm abschyd
werden darwider schreyen/ So antwortet
Warumb redetet jr nitt / da sy da verhan
den waren? Stünden sy doch zū gebott/jr
leere zūuerantworten? Ich habe auch ainē
auß den fürnemsten des widertails ainem
prediger geschriben/ Doctor Sabri von Co
stentz/ in lügen gestraft seiner Predige hal
ben / darinne er die schrifft gefelscht hatt/
brüderlich vermant / dauon abzūsteen/ oð
wifach zūgeben/ Er soll aber noch antwor
ten/ Wenn man ainem handtwercks man
ain ding zūsagt/vnd er kan sich nit verant
worten/ so wirt er zū ain schelmen vnd lü
genman. Aber disen leutten gilt es alles
gleych/ Ich will jm noch ain weyle zūgütt
halten / Vnd wa er nitt kommet vnd sich
entschuldiget / So will ich jm zū eeren ain
mal im druck lassen außgeen/die selbe ver
manung.

Das Sacrament soll baider gestalt genossen werden / oder gar nachgelassen / Dann Sant Ciprian / Sermone. 5. de lapsis / hat auch den kindern das blüt Christi lassen eingiessen / Wiewol sy sich brachten / Vnnd hilfft jr behelff nit / da sy sagen / Man habe layen den Kelch vmb färligkeit willen verbottē. Item es steet geschriben / De conse. distinc. 25. Comperimus / Das alle die / die das brot allain nyessen / sacrilegi seind / vnd lestern Gott.

Das die Messe kein opffer sey / beweyset sich darauß starck / das da Christus diese Ceremonien einsatzte / sagte / Nemet esset / trincket ic. gedenckt mein. So haysset ye Nemen / Essen / Trincken / Gedencken / nitt Opffern. Zū dem / dieweyl die Messe ain trost zaychen ist des Newen Testaments / kans kein Opffer sein / Denn wa vergebung der sünden ist / da ist kein Opffer / Hebre. 10.

Von der Beycht.

Wenn man euch dringen will / in todes
nötten / wie ich denn bericht bin / es sey
hie auch in vnserm beywesen oft geschehen
Ir solt (wölt ir von in Absoluiert / bericht
vnd in ire Sinagogen begraben werden)
das Euangelion / die newe leere / wie sy es
haissen / verleßigen zc. So solt ir sy faren
lassen / vnnnd ainem ewer nachbawren /
der Got kennet / vnd sein wort hat / zu euch
fordern / denselben von Gottes wegen vnr
adt ersuchen / Denn Gott wirt durch den
euch gewislich trost widerfarē lassen / den
Gott ligt yezung ain yeglichen Christen
im maul / vnd auff der zungen / hole du in
nur / vnd höre was er dir sagt.

Vom flaisch essen.

Dieweyl dise leut wöllen ain not mach
en / da kainē ist / vñ die gewissen binden an
zeytlich ding / die doch allain an Got han
gen sollen / vnd seinem wort / So müßet ir
dise freyhait erretten / vnd ee sterben / ee ir
das als ain nötig ding / solt billichen.

Von Christlicher Freyhait.

¶ Es sollē aber gewarnet sein/ alle leut vñ
seelen auff erden/ Das das Euāgelion le-
ret freyhait der gewissen/ wie die seele mit
Got vñ allen Creaturē fride habe/ Vnd dz
herze vnd gewissen sey allaine frey/ das es
Gott allain vnterwirfft / welchen leyb vñ
das gūt vnterwirfft das Euangelion von
Gottes wegen alle Creaturen / Darumb
wenn man will eusserlich frey sein / weder
rendte/ noch schoß / noch strewer geben/ so
ist der Christlichen freyhait gefälet/ vñnd
ist flaisch worden.

Das Euangelion freyet das gewissen/
vñnd setzt es über alle Creaturen zū irem
Herren/ Das sy jm alle zur seligkeit dienen
Den leyb vnd das gūt aber wirfft es vnter
alle creaturen/ also das der mensch damit
allen Creaturen dienen muß / vñnd über
kaine regieren.

Dise vermanung/ lieben freunde/ vñnd
vnsern armen dienst am wort des Euang-
gelij/lasset euch alles zū hertzen geen. Den


wir wissen / das wir recht geleeret haben/
vnd wollen also/ wa jr der leere nit folgen
wurdet/vnschuldig sein/ vnd frey vor Got
ewerer seelen vnd blüts/ Denn wir habens
euch gesagt / vnd euch trewlich vor scha-
den gewarnet/ Laßt euch aber vmb Got-
tes willē/ auch vns in ewer gebet befolh en
sein / Gott sey mit euch / vnnnd stercke euch
durch seynen hayligen gayst / Das jr
dem teuffel vnd seinem anhang
manlich widersteen/ vnnnd
aller anfechtūg starck
genūg sein müget
Amen .












Österreichische Nationalbibliothek



+Z185465100

